

ଯୋହନଙ୍କ ପ୍ରତି ପ୍ରକାଶିତ ବାକ୍ୟ ଯୋହାନ୍‌ଆଃ ନାଗେନ୍ତେ ଉନ୍ନୁଦୁବ୍ କାଜି ପାରିଟାଏ

ଯୋହାନ୍‌ଆଃ ଉନ୍ନୁଦୁବ୍ କାଜି ନାଞ୍ଜା ନିୟାମ୍‌ରେୟାଃ ଟୁଣ୍ଡୁପୁଥୁ ତାନାଃ । ନେ ପୁଥୁ ଯୀଶୁଆଃ ଜାନାମ୍‌ରେୟାଃ ୯୫ ଦିପିଲିକରେ ଯୋହାନ୍‌ଆଃ ହରାତେ ଅଲ୍‌କାନ୍ ତାଇକେନା, ୧:୧ । ଇନିଃ ଯୋହାନ୍ ପୁକୁକାଜିଲ୍‌ଲଃ ଆତଃ ଆପିୟା ଚିଟାଉ ହଗି ଅଲ୍‌କାଦାଏ, ଏନା ହବାଅଃତାନା, ୧ ଯୋହାନ୍, ୨ ଯୋହାନ୍ ଆତଃ ୩ ଯୋହାନ୍ । ନେ ଯୋହାନ୍‌କେ ଯୀଶୁ ପୁରାଃଗି ଦୁଲ୍‌ଲାଡ୍ ତାଇକେନା ମେନ୍ତେ ସାରିୟଃ ତାଇକେନା, ଯୋହାନ୍ ୧୩:୨୩ । ଯୋହାନ୍ ଆଇସ୍‌ଲ୍ୟାଣ୍ଡ୍‌ରେୟାଃ ପାଡ଼ମସ୍ ଟାପୁରେ ତାଇକେନ୍ ଇମ୍‌ତା, ନେ ଉନ୍ନୁଦୁବ୍ କାଜିକେ ଅଲ୍‌କାଦ୍ ତାଇକେନା । ଚିୟାଃଚି ଯୀଶୁ ଖ୍ରୀଷ୍ଟ୍‌ଆଃ ସୁକୁକାଜି ଉଦୁବ୍ ନାଗେନ୍ତେ ଏନ୍ତାଃତେ ଇନିଃକେ କୁଲ୍‌କାନ୍ ତାଇକେନା, ୧:୯ ।

ଯୀଶୁଆଃ ହିନିଜୁଃ ଦିପିଲି ସେଟେର୍ ତାଇକେନ୍ ହରାତେ, ଯୀଶୁ ଖ୍ରୀଷ୍ଟ୍‌ତାଃରେ ପାତିୟାର୍‌ରଃ ଲେକା ତାଇନଃ ନାଗେନ୍ତେ ନେ ପୁଥୁକେ ପାଡ଼ାଅ ହଡ଼କକେ ଜୀଉରେ କେଟେଦ୍ ଆତଃ ଆସ୍ତା ଏମ୍ ନାଗେନ୍ତେ ଯୋହାନ୍ ନେ ଚିଟାଉ ଅଲ୍‌କାଦାଏ, ୧:୩:୨୨:୭ । ଇନିଃ ସବେନ୍ ବିଶ୍ୱାସୀକକେ ଆତଃ ବିଶେଷ୍‌କେଦ୍‌ତେ ଏୟା କାଲିସିୟାକକେ ନେ ଚିଟାଉ ଅଲ୍‌କାଦାଏ, ୨-୩ । ଯୋହାନ୍ ଆୟାଃ ଅନଲ୍‌ରେ ଆୟାର୍‌କାଜି ୧:୩ ଆତଃ ଆଇଃକ୍ ନେଲ୍‌କାଦ୍ ରାକାମ୍ ରାକାମ୍ ମୁରୁଡ୍ ବିଷାଏରେ ଅଲ୍‌କାଦା । ନେ ପୁଥୁରେୟାଃ ଚିମିନ୍ ଅନଲ୍‌ତେୟାଃ ମାରି ନିୟାମ୍‌ରେୟାଃ ଅନଲ୍‌ଲଃ ମିଦ୍‌ଗିୟା, ବିଶେଷ୍‌କେଦ୍‌ତେ ଜାଖ୍‌ରିୟା ୬:୧-୮ ରେ ନାମେ ତାନାବୁ ।

ଏନା ହବାଅଃତାନା ଏୟା ବିକ୍ଳୁଲ୍‌ବାଜା ଆତଃ ଏୟା ତୁଭାରେୟାଃ ବିଷାଏରେ ଅକଆଃଚି ପାର୍‌ମେଶ୍ୱାର୍ ମିସାର୍‌ରେନ୍ ହଡ଼କକେ ସାସାତି ଏମ୍ ନାଗେନ୍ତେ ଦୁକୁହାସୁ କୁଲ୍‌କେଦା ହରାସେନ୍‌ପୁଥୁ ୭-୯ । ଉନ୍ନୁଦୁବ୍‌ରେୟାଃ ପୁଥୁ ଟୁଣ୍ଡୁଦିପିଲିକେ ଉଦୁବେ ତାନା । ଯୀଶୁ ଟୁଣ୍ଡୁରେ ଜିତାଅଃଖା ଆତଃ ଅକ ହଡ଼କ ଆୟାଃତାଃରେ ଆସ୍ତା

ଦହେୟାକ, ଇନ୍ଦ୍ରକୁ ଜାନାଅ ଜାନାଅଗି ଆୟାଃଲଃ ତାଇନାଃକ ।
ନେ ପୁଅ ଆପାନକେ ଚେତାଅ ଆତଃ ଆସ୍ତା ଏମ୍ ତାନାଏ ଯେ, ଯାଶୁ
ଜାଲ୍‌ଦିଗି ହିଜୁଃତାନା ।

ପୁଅ ଭିତରରେ ତାଇକାନ୍ କାଜି

୧. ଯୋହାନ୍‌ଆଃ ପାରିତାଏ ଆତଃ ଆଇଃକ୍ ନେଲାଇକାଦ୍
ଆୟାର୍‌କାଜିରେୟାଃ ଦାର୍‌ଶାନ୍ । ୧:୧-୨୦
୨. ଯାଶୁ ଶ୍ରୀଷ୍ଟିଃଏତେ ଏୟା କାଲିସିୟା ନାଗେନ୍ତେ ଯୋହାନ୍‌ଆଃ
କାନାଜି । ୧:୧-୩:୨୨
୩. ଏୟା ମୋହର । ୪:୧-୮:୫
୪. ଏୟା ବିଜୁଲ୍‌ବାଜା । ୮:୬-୧୧:୧୯
୫. ସାଏତାନଲିଃ ହନ୍‌କଆଃ ଲାଡ଼ାଇ । ୧୨:୧-୧୪:୨୦
୬. ଶ୍ଵରେୟାଃ ଏୟା ତୁଭା । ୧୫:୧-୧୭:୧-୧୮
୭. ପାର୍‌ମେଶ୍ଵାର୍ ସିର୍ମା ଦିଶ୍ଵମ୍‌ରେ ଆୟାଃ ବାଭରି ସାଏତାନକେ
ହାରାଅଇୟା । ୧୭:୧-୨୦:୧୫
୮. ନାଞ୍ଜା ସିର୍ମା ଦିଶ୍ଵମ୍ ଆତଃ ନାଞ୍ଜା ଅତେଦିଶ୍ଵମ୍ । ୨୧:୧-୨୨:୨୧

^୧ ପାର୍‌ମେଶ୍ଵାର୍, ଯାଶୁ ଶ୍ରୀଷ୍ଟିଃରେ ଉଦୁବାକାଦ୍ କାଜିକ ନେ
ପୁଅରେ ଅଲାଇକାନା, ଅକଆଃଚି ହୁଡ଼ିଙ୍ଗ୍ ଦିପିଲିରେଗି ହବାଅଃ
ଲାଗାତିଙ୍ଗ୍‌ୟାଃ । ଏନ୍ ସବେନାଃ ଆୟାଃ ଦାସିକକେ ଉଦୁବାକ
ନାଙ୍ଗ୍ ଶ୍ରୀଷ୍ଟି ଆୟାଃ ଦାସି ଯୋହାନ୍‌କେ ନେ ସବେନାଃ ସାରିକାଏ
ମେନ୍ତେ ମିଆଁଦ୍ ଦୁଁଡ଼କେ ଇନିଃତାଃତେ କୁଲ୍‌କିୟା । ^୨ ଆତଃ
ଯୋହାନ୍ ଆଇଃକ୍‌ଗି ନେଲାଇକାଦ୍‌ତେୟାଃ ସବେନାଃଏ ଉଦୁବକେଦା
। ନେ ଅନଲ୍‌ରେ ପାର୍‌ମେଶ୍ଵାର୍‌ଆଃ କାନାଜି ଆତଃ ଯାଶୁ ଶ୍ରୀଷ୍ଟିଆଃ
ହରାତେ ସାର୍‌ତି କାଜିକ ଉଦୁବାକାନା । ^୩ ଜେତାଏ ନେ ଚିଟାଉରେ
ଅଲାଇକାନ୍ କାଜିକ ପାଢ଼ାଅୟାଏ ଆତଃ ଅକନ୍‌କ ଏନାରେ ଅଲାଇକାନ୍
ଆୟାର୍‌କାଜିକେ ଆୟୁମ୍‌କେଦ୍‌ତେକ ମାନାତିୟେଆ, ଇନ୍‌କୁ
ସୁକୁତାନ୍‌ଗିୟା, ଚିଆଃଚି ଏନ୍ ସବେନାଃ ହବାଅଃରେୟାଃ ନେତା
ନାଡ଼େଃଗିୟା ।

ଏୟା କାଲିସିୟାକକେ ଜହାର୍

୪ ✧ଯୋହାନ୍ ଏସିଆ ପାର୍ଗାନ୍ରେ ତାଇନ୍ତାନ୍ ଏୟା କାଲିସିୟାକକେ ଆଇୟାଃ ଜହାର୍ । ପାର୍ମେଶ୍ୱାର୍ତାଃଏତେ ଆପେୟାଃ ସାୟାଦ୍ ଆତଃ ଜୀଉସୁକୁ ହବାଅଃକା, ଅକ୍ନିଃଚି ମେନାଇନିଃ, ତାଇକେନ୍ନିଃ, ହିଜୁଃନିଃ, ଆତଃ ଆୟାଃ ରାଜ୍ଗାଦି ସାମ୍ନାଙ୍ଗ୍ରେ ତାଇକାନ୍ ଏୟା ଆମ୍ବାତାଃଏତେ, ୫ ଆତଃ ଗନଏଃକଏତେ ପାହିଲା ଜୀଉ ବିରିଦାକାନ୍ନିଃ, ପାତିୟାର୍ତଃ ଲେକାନ୍ ଗାଞ୍ଜା ଆତଃ ଅତେଦିଶୁମ୍ରେନ୍ ରାଜାକଆଃ ରାଜା ଯୀଶୁ ଖ୍ରୀଷ୍ଟଆଃ ସାୟାଦ୍ ଆତଃ ଜୀଉସୁକୁ ଆପେୟାଃ ହବାଅଃକା । ଇନିଃ ଆବୁକେ ଦୁଲାଡ୍ ରିକାଃଏ ଆତଃ ଆୟାଃ ଦାଣ୍ଟି ରକାଦ୍ ଗନଏଃ ହରାତେ ଆବୁକେ ପାପ୍ହେତେ ରାଡାକାଦ୍ବୁଆ । ୬ ✧ଆତଃ ଆୟାଃ ଆପୁ ପାର୍ମେଶ୍ୱାର୍ତାଃ ସେଞ୍ଜା ନାଗେନ୍ତେ ଇନିଃ ଆବୁକେ ରାଇଜ୍ ରିକାଏ ଲେକା ରାଜାଉଡି କିଲି ଆତଃ ମିଆଁଦ୍ ଯାଜାକ ଲେକାଏ ବାଇୟାକାଦ୍ବୁଆ । ସବେନ୍ ମାନାରାଙ୍ଗ୍ ଆତଃ ପେଡେଃ ଜାନାଅ ଜାନାଅ ଜାକେଦ୍ ଯୀଶୁ ଖ୍ରୀଷ୍ଟଆଃ ହବାଅଃକା ! ଆମେନ୍ ।

୭ ✧ନେଲେପେ, ଇନିଃ ରିମିଲ୍ରେ ହିଜୁଃତାନା, ଅତେଦିଶୁମ୍ରେନ୍ ସବେନ୍ ହଡକ ଇନିଃକେ ନେଲିୟାକ, ଆତଃ ଅକନ୍କ ଆଇଃକକେ କିଲାକାଇ ତାଇକେନାକ ଇନ୍ଦୁକୁ ହଗି ଇନିଃକେ ନେଲ୍କେଦ୍ତେ ବରଞ୍ଜାଇତାନଲଃ ଏୟମେୟାକ । ନେ ସବେନାଃ ସାର୍ତିଗି ହବାଅଆଃ ! ଆମେନ୍ ।

୮ ✧ପେଡେୟାନ୍ ପ୍ରାଭୁ ପାର୍ମେଶ୍ୱାର୍ କାଜିତାନାଏ, “ଆଇଙ୍ଗି ଏନେଟେଦ୍ ଆତଃ ଚୁଣ୍ଟୁ ତ୍ରାନିଙ୍ଗ୍,” ସିଦାରେ ତାଇକେନାଇଙ୍ଗ୍, ନାହିଁଃ ମେନାଇୟା ଆତଃ ହିଜୁଃ ଦିପିଲିରେଇଙ୍ଗ୍ ହିଜୁଃଆ ।

ଯୀଶୁ ଖ୍ରୀଷ୍ଟଆଃ ଉତୁବେନ୍

୯ ଆଇଙ୍ଗ୍ ଯୋହାନ୍, ଆପେୟାଃ ହାଗା, ଆତଃ ଯୀଶୁଆଃ ଅତଙ୍ଗ୍ନିଃ ହବାୟାନ୍ତେ ଆୟାଃ ରାଇଜ୍ରେୟାଃ ହଡକ ଚେତାନ୍ରେ ହବାଅଃତାନ୍ ଦୁକୁହାସୁକେ ଧ୍ରାଜ୍ ସାବ୍କେଦ୍ତେ ସାହାଡିଙ୍ଗ୍ ନାଗେନ୍ତେ ଆଇଙ୍ଗ୍ ଆପେୟାଃ ମିଆଁଦ୍ ହିସାଦାର୍ ତାନିଙ୍ଗ୍ ।

✧ ୧:୪ ୧:୪ ଉତ୍କଳ କାଳି ୪:୫. ✧ ୧:୬ ୧:୬ ଉତ୍କଳ କାଳି ୫:୧୦. ✧ ୧:୭ ୧:୭ ମାଥୁଉ ୨୪:୩୦; ମାର୍କ ୧୩:୨୬; ଲୁକ ୨୧:୨୭; ୧ ଥେସଲନିକା ୪:୧୭; ଯୋହାନ୍ ୧୯:୩୪, ୩୭; ମାଥୁଉ ୨୪:୩୦. ✧ ୧:୮ ୧:୮ ଉତ୍କଳ କାଳି ୨୨:୧୩.

ୟାଣ୍ଡ ଉତ୍କଳବନ୍ଦ ସାନାଠି ଆଡ଼ଠ ପାରମେଶ୍ଵାରୀଆଠ ବାଚାନ୍ ଉତ୍କଳକେଦ୍ ହରାତେ ଆଇଙ୍ଗ ପାଡ଼ମସ୍ ଟାପୁଡେଇଙ୍ଗ କୁଳାକାନ୍ ତାଇକେନା । ୧୦ ପ୍ରାଭୁଆଠ ହୁଲାଙ୍ଗରେ ପାବିତାର ଆମ୍ ଆଇଙ୍ଗକେ ଆବରାଅକେଦିୟାଁ, ଆଡ଼ଠ ଆଇଁୟାଠ ତାୟମସାଠରେ ବିଙ୍ଗୁଲ୍ ବାଜା ସାଡ଼ିଲେକା ମିଆଁଦ୍ ପୁରାଠଗି ସାଡ଼ିଇଙ୍ଗ ଆୟୁମ୍କେଦା । ୧୧ ଜେତାଏ ମିହୁଡ୍ ଆଇଙ୍ଗକେ କାଜିକେଦିୟାଁ, “ଆମ୍ ନେଲ୍ତାନ୍ତେୟାଠ ମିଆଁଦ୍ ପୁଥ୍ରେ ଅଲ୍କେଦ୍ତେ ଦହେମେ ଆଡ଼ଠ ଏଡ଼ିସୁସ୍, ସ୍ଵର୍ଣ୍ଣା, ପାର୍ଗାମ୍, ଥୁୟଡିରା, ସାଦ୍ ସ, ଫିଲାଦେଲ୍ଫିୟା, ଆଡ଼ଠ ଲାଉଦିକିଆ, ନେ ଏୟା କାଲିସିୟାତାଠତେ ନେ ପୁଥ୍କେ କୁଲ୍ତାମେ ।”

୧୨ ଅକଏ ଆଇଁୟାଠଲଠ ଜାଗାର୍ତାନାଏ, ନେଆଁ ନେଲ୍ ନାଗେନ୍ତେଇଙ୍ଗ ହେତାରୁହାଡ଼କେଦା ଆଡ଼ଠ ଏୟା ସୋନାରାଠ ଦିଆ ମାଣ୍ଡାଅତେୟାଠ, ୧୩ ଆଡ଼ଠ ଏନ୍ ଦିଆ ମାଣ୍ଡାଅତେୟାଠରାଠ ଆଲାରେ ମାନଝାହନ୍ଲେକା ମିହୁଡ଼କେଇଙ୍ଗ ନେଲ୍କିୟା । ଆୟାଠ କାଟା ଜାକେଦ୍ ଜିଲିଙ୍ଗ ଲିଜାଠ ତୁସିଙ୍ଗିୟାକାନ୍ ଆଡ଼ଠ ଆୟାଠ କୁଡାମ୍ରେ ସୋନାରାଠ କାସନାତେ ତଲ୍ବିହୁରାକାନ୍ ତାଇକେନା । ୧୪ ଇନିୟାଠ ବହଠରାଠ ଉବ୍, କପା ଟାଏ ବାରାଦ୍ ଲେକା ପୁଣ୍ଡିଗି ତାଇକେନା ଆଡ଼ଠ ଆୟାଠ ମେଦ୍ ସେଙ୍ଗେଲ୍ ଲେକା ଜୁଲଠତାଇକେନା । ୧୫ ଇନିୟାଠ କାଟା ସେଙ୍ଗେଲ୍ ଭାଟିରେ ଫାର୍ଡିକେଦ୍ତେ ଟାମକାଅଠତାନ୍ ପିତାଲ୍ ଲେକା ଝାଲ୍ସାଠଅ ତାଇକେନା ଆଡ଼ଠ ଆୟାଠ ସାଡ଼ି ଲିଙ୍ଗିୟାଠତାନ୍ ଦାଆଠରାଠ ସାଡ଼ି ଲେକା ଆୟୁମ୍ଠ ତାଇକେନା । ୧୬ ଇନିଠ ଆୟାଠ ଜମ୍ଡିସାଠରେ ଏୟା ଇପିଲ୍କକେ ସାବାକାଦକ ତାଇକେନାଏ, ଆଡ଼ଠ ଆୟାଠ ମଟାଏତେ ବାରାନ୍ସାଠ ଲେସେରାକାନ୍ ତାରାଉଡ଼ି ଅଡଙ୍ଗଅଠ ତାଇକେନା, ଆଡ଼ଠ ଆୟାଠ ମେଦ୍ମୁହାଁଡ୍ ତିକିନ୍ ସିଙ୍ଗି ଲେକା ଜୁଲଠ ତାଇକେନା । ୧୭ ✨ଆଇଙ୍ଗ ଇନିଠକେ ନେଲ୍ଲଠଗି ଇନିୟାଠ କାଟା ସୁବାରେ ଗଜାକାନ୍ନିଠ ଲେକାଈଙ୍ଗ ଉୟୁଠୟାନା । ଇନିଠ ଆଇଁୟାଠ ଚେତାନ୍ରେ ଆୟାଠ ଜମ୍ଡିଠଇ ଦହକେଦ୍ତେ କାଜିକେଦା, “ଆଲମ୍ ବରଏୟା ! ଆଇଙ୍ଗଦ୍ ଏନେଟେଦ୍ ଆଡ଼ଠ ଚୁଣ୍ଡୁ ତାନିଙ୍ଗ । ୧୮ ଆଇଙ୍ଗି ଜାନିଦ୍ନିଠ ତାନିଙ୍ଗ, ଆଇଙ୍ଗ ଗଜାକାନ୍ ତାଇକେନାଈଙ୍ଗ, ମେନ୍ଦ୍ ନାହାଁଠ ଆଇଙ୍ଗ ଜାନାଅ ଜାନାଅ ଜାନିଦ୍ଗି

✨ ୧:୧୭ ୧:୧୭ ଉତ୍କଳ କାଜି ୨:୮; ୨୨:୧୩.

ତାଙ୍କନାଈଁ । ଗନ-ଏଃ ଆତଃ ହୁଆଈଁଗାଡ଼ା ଚେତାନ୍ରେ ଆଇଁୟାଃ
ଆକୃତେୟାର୍ ମେନାଃ । ^{୧୯} ଏନାମେନ୍ତେ, ଆମ୍ ନେଲକାଦ୍ତେୟାଃ,
ନାହାଃ ହବାଅଃତାନ୍ତେୟାଃ, ଆତଃ ତାୟମ୍ତେ ହବାଅଃତେୟାଃ
ଅଲ୍ଲକେଦ୍ତେ ଦହେମେ । ^{୨୦} ଆଇଁୟାଃ ଜମ୍ତଃଈରେ ମେନାକ
ଏୟା ଈପିଲ୍ଲକ ଆତଃ ଏୟା ସୋନାରାଃ ଦିଆ ମାଣ୍ଡାଅତେୟାଃରାଃ
ମୁଣ୍ଡି ହବାଅଃ ତାନା, ଏନ୍ ଏୟା ଈପିଲ୍ଲକ ମେନ୍ଲେରେ ଏୟା
କାଲିସିୟାରେନ୍ ଦୁଁଡକ ତାନ୍କ ଆତଃ ଏୟା ଦିଆ ମେନ୍ଲେରେ
ଏୟା କାଲିସିୟା ତାନାଃ ।

୨

ଏଫିସୁସ୍ କାଲିସିୟା ନାଗେନ୍ତେ କାନାଜି

^୧ “ଏଫିସୁସ୍ କାଲିସିୟାରେନ୍ ଦୁଁଡ଼ତାଃତେ ଅଲେମେ, ଜେତାଏ
ଆୟାଃ ଜମ୍ ତଃଈରେ ଏୟା ଈପିଲ୍ ଆତଃ ଏୟା ସୋନାରେୟାଃ
ଦିଆ ଆଲ୍ଲାରେ ହିଜୁଃସେନଃ ରିକାଃଏ, ଈନିଃ ନେଆଁ କାଜିତାନାଏ,
^୨ ଆଇଈଁ ଆମାଃ କାଜିକାମିକ, କେଚେଦ୍ କାମିକ, ଆତଃ
ଧୂରାଜକେଇଈଁ ସାରିତାନା । ଆମ୍ ଏଡକାନ୍ କାମିତାନ୍କକେ
କାମ୍ ସାହାତିଈଁ ଦାଡିୟା, ଏନାହ ଆଇଈଁ ସାରିତାନାଈଁ । ଅକ
ହଡକ, ଆପାନ୍କେ ପ୍ରେରିଡ୍ ମେନ୍ତେକ କାଜିନ୍ତାନା, ମେନ୍ଦ
ସାର୍ଡିରେ ଈନ୍କୁ ପ୍ରେରିଡ୍ ନାହାଁଲକ, ଈନ୍କୁକେ ବିଡାଅକେଦ୍ତେ
ହସଡତାନ୍କ ମେନ୍ତେମ୍ ଆଚ୍ଚକାର୍କାଦକଆ । ^୩ ଆମ୍ ଧୂରାଜ
ସାବାକାଦ୍ ହଡ୍ ତାନ୍ମେ । ଆଇଁୟାଃ ନୁଡୁମ୍ ନାଗେନ୍ତେ ଆମ୍
ଦୁକୁ ସାହାତିଈଁକେଦ୍ରେୟ କାମ୍ ଲାଗାୟାନା । ^୪ ଏନ୍ରେୟ
ଆମାଃ ବିରୁଧରେ ଆଇଁୟାଃ କାଜି ମେନାଃ, ଆମ୍ ସିଦାରେ ଚିଲ୍ଲକା
ଦୁଲ୍ଲାଡ୍ ତାଈକେନାମ୍, ଏନ୍ଲେକା ଆମ୍ ନାହାଁଃ କାମ୍ ଦୁଲ୍ଲାଡ୍
ତାନା । ^୫ ଆମ୍ ଅକ୍ତାଃଏତେମ୍ ଉୟୁଗାକାନା, ଏନା ପାହାମେମେ,
ଆମାଃ ପାପ୍ହେତେ ମନ୍ରୁହାଡେମେ ଆତଃ ସିଦା ଲେକା ବୁଗିନ୍
କାମିକ କାମିମେ । ପାପ୍ହେତେ ମନ୍ କାମ୍ ରୁହାଡେରେଦ୍, ଆଇଈଁ
ଆମାଃତାଃତେ ହିଜୁଃକେଦ୍ତେ ଆମାଃ ଦିଆ ଦହତେୟାଃକେଇଈଁ
ଆତମେୟାଁ । ^୬ ମେନ୍ଦ ମିଆଁଦ୍ ବୁଗିନ୍ କାଜି ଆମାଃତାଃରେ
ମେନାଃ, ଏନା ହବାଅଃତାନା, ଆଇଈଁ ନିକଲ୍ଲାତାୟକଆଃ

ସବେନ୍ କାଳିକାମିକକକ୍ଷ୍ ହିଲାକ୍ଷ୍ମେତାନ୍ ଲେକା ଆମ୍ ହରିମ୍ ହିଲାକ୍ଷ୍ମେତାନା ।

୭ ☆“ପାବିତାର୍ ଆମ୍ କାଲିସିୟାକକେ ଚିନାଃଏ କାଳିତାନା, ଏନା ଆୟୁମେ ନାଗେନ୍ତେ ଜେତାଏୟାଃ ଲୁତୁର୍ ମେନାଃନିଃ ଆୟୁମେକାଏ । ଅକ ହତ୍ତକ ଜିତାଅଃଃକ, ଆକ୍ଷ୍ ଇନ୍କୁକେ ପାର୍ମେଶ୍ଵାର୍ଆଃ ପାରାଦେସ୍ରେୟାଃ ବାଗାକଚାରେ ଜ'ଅଃତାନ୍ ଜୀଦାନ୍ ଦାରୁରାଃ ଜ ଜମେନାକ୍ ଆକ୍ତେୟାର୍ ଏମାକ୍ଷ୍ମାକ୍ଷ୍ ।

ସ୍ଵର୍ଣ୍ଣା କାଲିସିୟା ନାଗେନ୍ତେ କାନାଜି

୮ ☆“ସ୍ଵର୍ଣ୍ଣା କାଲିସିୟାରେନ୍ ଦୁଁତ୍ତଃତେ ଅଲେମେ, ଅକଏ ପାହିଲା ଆତଃ ତୁଶ୍ଵ ତାନିଃ, ଗଏଃକେଦ୍ତେ ଆତଃମିସା ଜୀଉବିରିଦ୍ଧ୍ୟାନାଏ, ଇନିଃ ନେଆଁ କାଳିତାନାଏ, ୯ ଆକ୍ଷ୍ ଆମାଃ ସବେନ୍ ନାରାଦୁରା ଆତଃ ଗାରିବ୍ତେୟାଃକକ୍ଷ୍ ସାରିତାନା, ମେନ୍ଦ୍ ସାର୍ତ୍ତ କାଜିଲେରେ ଆମ୍ କିସ୍ତାନ୍ ତାନ୍ମେ । ଅକ ହତ୍ତକ ଆପାନ୍କେ ଯିହୁଦୀ ମେନ୍ତେକ କାଜିନ୍ତାନା, ଇନ୍କୁ ଯିହୁଦୀ ନାହାଁଲାକ ମେନ୍ଦ୍ ସାଏତାନ୍ରାଃ ଝୁଶ୍ରେନ୍ ତାନ୍କ, ଇନ୍କୁଆଃ ନିଦା କାଜିକକ୍ଷ୍ ସାରିତାନା । ୧୦ ଆମ୍ ଅକ ଦୁକୁହାସୁ ନାମେ ନାଗେନ୍ତେମ୍ ସେନ୍ତାନା, ଏନା ନାଗେନ୍ତେ ଆଲମ୍ ବରଏୟା । ଆୟୁମେମେ, ସାଏତାନ୍ ଆମାଃଏତେ ଚିମିନ୍ ହତ୍ତକକେ ଜେହେଲ୍ ଇଦିକେଦ୍ତେ ବିଡ଼ାଅକଆ । ମେନ୍ଦ୍ ଆମାଃ ନେ ନାରାଦୁରା ଗେଲେୟା ହୁଲାକ୍ ଜାକେଦ୍ ହବାଅଃଆ । ନେଆଁରେ ଗନଏଃରାଃ ବର ତାଇନ୍ରେୟ ଆମ୍ ଆକ୍ଷ୍ମାଃ ନାକ୍ ପାତିୟାର୍ରାଃ ଲେକାମ୍ ତାଇନଃ ରେଦ୍, ଆକ୍ଷ୍ ଆମ୍କେ ଜୀଦାନ୍ରେୟାଃ ମୁକୁର୍ ଏମାମେୟାକ୍ଷ୍ ।

୧୧ ☆“ପାବିତାର୍ ଆମ୍ କାଲିସିୟାକକେ ଚିନାଃଏ କାଳିତାନା, ଏନା ଆୟୁମେ ନାଗେନ୍ତେ ଜେତାଏୟାଃ ଲୁତୁର୍ ମେନାଃନିଃ ଆୟୁମେକାଏ । ଅକନ୍ କିତାଅଃଃକ, ଇନ୍କୁଆଃ ବାର୍ସା ଗନଏଃ ହବାଅଃରେୟ ଜେତନାଃ କା ହାନିୟଃଆ ।

ପାର୍ଗାମ୍ କାଲିସିୟା ନାଗେନ୍ତେ କାନାଜି

☆ ୨:୭ ୨:୭ ଉତ୍କଳ କାଳି ୨୨:୨. ☆ ୨:୮ ୨:୮ ଉତ୍କଳ କାଳି ୧:୧୭; ୨୨:୧୩.
☆ ୨:୧୧ ୨:୧୧ ଉତ୍କଳ କାଳି ୨୦:୧୪; ୨୧:୮.

୧୨ “ପାର୍ଗାମ୍ କାଲିସିୟାରେନ୍ ଦୁର୍ଭତାଃତେ ଅଲେମେ, ଅକଏତାଃରେ ବାରାନ୍‌ସାଃ ଲେସେରାକାନ୍ ତାରାଉଡ଼ି ମେନାଃ, ଇନିଃ ନେଆଁ କାଜିତାନାଏ, ୧୩ ଆଇଙ୍ଗ୍ ସାରିତାନାଇଙ୍ଗ୍, ଆମ୍ ସାଏତାନ୍‌ରାଃ ରାଜଗାଦି ଆୟାରରେମ୍ ତାଇନଃତାନା । ଏନ୍‌ରେୟ୍ ଆମ୍ ଆଇଁୟାଃ ନୁତୁମ୍‌କେ କେଟେୟାନ୍‌ଗି ସାବାକାଦାମ୍, ଆତଃ ଆମ୍ ଆଇଁୟାଃ ନାଗେନ୍ତେ ପାତିୟାରରଃ ଲେକାନ୍‌ନିଃ ତାନ୍‌ମେ । ଆତଃ ଚିମ୍‌ତା ସାଏତାନ୍‌ରାଃ ତାଇନଃ ଠାୟାଦ୍‌ତାଃରେ ଆଇଁୟାଃ ମିଆଁଦ୍ ପାତିୟାରରଃ ଲେକାନ୍ ଗାଞ୍ଜା ଏମ୍‌ନିଃ ଆଦ୍ରିପାକେ ଗଏଃକିୟାକ, ଇମ୍‌ତାହଗି ଆମ୍ ଆମାଃ ବିଶ୍ୱାସ୍ କାମ୍ ବାଗିକେଦା । ୧୪ ମେନ୍‌ଦ୍ ଆଇଁୟାଃ, ଆମାଃ ବିରୁଧ୍‌ରେ ଚିମିନ୍ କାଜିକ ମେନାଃ । ଏନ୍ତାଃରେ ଆମାଃଲଃ ତାଇନତାନ୍ ଚିମିନ୍ ହଡ଼କ ବାଲାମ୍‌ଆଃ ଇନିତୁକେ ଅତଙ୍ଗତାନାକ । ମୁରୁଡ଼ତାଃରେ ଦାନ୍ ରାକାବାକାନ୍ ଜମେୟାଃକେ ଜମନାଙ୍ଗ୍ ଆତଃ ଆପାଙ୍ଗିର୍ କାମିକ ରିକା ନାଗେନ୍ତେ ଇସ୍ତାଏଲ୍ ହଡ଼କକେ ଆତୁକ ନାଙ୍ଗ୍, ବାଲାମ୍, ବାଲାକ୍‌କେ ଇତୁକାଇ ତାଇକେନା । ୧୫ ଏନ୍‌ଲେକାଗି ନିକଲାତାୟ୍ ହଡ଼କଆଃ ଇନିତୁକେ ଅତଙ୍ଗତାନ୍ ଚିମିନ୍ ହଡ଼କ ଆମାଃ ଆଲାରେ ମେନାକଥା । ୧୬ ଏନାତେ ଆମ୍ ପାପ୍‌ହେତେ ମନ୍‌ରୁହାଡ଼େମେ, କା'ରେଦ୍ ଆଇଙ୍ଗ୍ ଜାଲ୍‌ଦିଗି ଆମାଃତାଃତେ ହିଜୁଃକେଦ୍‌ତେ ଆଇଁୟାଃ ମତାଏତେ ଅତଙ୍ଗଅଃତାନ୍ ତାରାଉଡ଼ିଲଃ ଇନ୍‌କୁଆଃ ବିରୁଧ୍‌ରେଇଙ୍ଗ୍ ଲାଡ଼ାଇୟା ।

୧୭ ☆“ପାବିତାର୍ ଆମ୍ କାଲିସିୟାକକେ ଚିନାଃଏ କାଜିତାନା, ଏନା ଆୟୁମେ ନାଗେନ୍ତେ ଜେତାଏୟାଃ ଲୁତୁର୍ ମେନାଃନିଃ ଆୟୁମେକାଏ । ଅକ ହଡ଼କ ଜିତାଏଞ୍ଜାଃକ, ଆଇଙ୍ଗ୍ ଇନ୍‌କୁକେ ଉକୁଆକାନ୍ ମାନ୍ନା ଏମାକଆଇଙ୍ଗ୍, ଇନ୍‌କୁଏତେ ମିପିଆଦ୍ ହଡ଼କକେ ନାଞ୍ଜା ନୁତୁମ୍ ଅଲାକାନ୍ ମିଆଁଦ୍ ପୁଣ୍ଡି ଦିରି ଏମାକଆଇଙ୍ଗ୍ । ଏନ୍ ନାଞ୍ଜା ନୁତୁମ୍ ଚିନାଃ ତାନାଃ, ଏନା ଏନ୍ ଦିରିକେ ନାମେ ହଡ଼ ବାଗିକେଦ୍‌ତେ ଏଟାଃ ଜେତା ହଡ଼ କାକ ସାରି ଦାଡ଼ିୟା ।

ଧୁୟତିରା କାଲିସିୟା ନାଗେନ୍ତେ କାନାଜି

୧୮ “ଧୁୟତିରା କାଲିସିୟାରେନ୍ ଦୁର୍ଭତାଃତେ ଅଲେମେ, ଅକଏୟାଃ ମେଦ୍ ଜୁଲଃତାନ୍ ସେଙ୍ଗେଲ୍ ଲେକା ଆତଃ ଆୟାଃ ବାରାନ୍ କାଟା

ଚାମ୍ପାଅଃତାନ ପିତାଲ ଲେକା ନେଲଃତାନା, ଏନ୍ ପାରମେଶ୍ଵାରଆଃ ହନ୍, ନେଆଁଏ କାଜିତାନା, ୧୯ ଆଇଙ୍ଗ୍ ଆମାଃ କାଜିକାମିକଇଙ୍ଗ୍ ସାରିତାନା । ଆମାଃ ଦୁଲ୍ଲାଡ଼, ବିଶ୍ଵାସ, ସୁସାର, ଆତଃ ଧୂରାଜ ଜୀଞ୍ଜାନ୍ ସାରିତାନାଇଙ୍ଗ୍ । ନାହାଁଃ ଆମ୍ କାମିତାନତେୟାଃ, ସିଦାମ୍ କାମି ତାଇକେନ୍ତାଃଏତେ ଆଦକାମ୍ କାମିତାନା । ୨୦ ମେନ୍ଦ ଆମାଃ ବିରୁଧରେ ଆଇଁୟାଃ ମିଆଁଦ୍ କାଜି ମେନାଃ, ଏନା ହବାଅଃତାନା, କୁଡ଼ିନାବୀ ତାନିଙ୍ଗ୍ ମେନ୍ତେ ଆପାନ୍କେ କାଜିନ୍ତାନ୍ ଯିଜେବଲ୍ ନୁଡ଼ମ୍ କୁଡ଼ିକେ ଆମ୍ ଆସା ଏମାକାଇଙ୍ଗାମ୍ । ଇନିଃ ଆଇଁୟାଃ ଦାସିକକେ ଆପାଙ୍ଗିର୍ କାମିକ ରିକା ନାଗେନ୍ତେ ଆତଃ ମୁରୁଡ଼କତାଃରେ ଦାନ୍ ରାକାବାକାନ୍ ଜଜମାଃକ ଜମେ ନାଗେନ୍ତେ ଇନ୍କୁକେ ଇଡୁତାନ୍ଲଃ ଏଟାଃ ହରାତେ ସୁଡ଼ଃଇଦିକତାନା । ୨୧ ଏନାମେନ୍ତେ ଇନିଃକେ ପାପହେତେ ମନ୍ରୁହାଡ଼ ନାଙ୍ଗ୍ ନେତା ଏମାକାନା, ମେନ୍ଦ ଇନିଃ ଆୟାଃ ଆପାଙ୍ଗିର୍ କାମିକେ ବାଗି ନାଗେନ୍ତେ କାଏ ସାନାଙ୍ଗ୍ତାନା । ୨୨ ଏନାତେ ଆଇଙ୍ଗ୍ ଇନିଃକେ ଆତଃ ଇନିଃଲଃ ଆପାଙ୍ଗିର୍ କାମିତାନ୍ ସବେନ୍ଦକ ଆକଆଃ ଏଡ଼କାନ୍ କାମିଏତେ କାକ ମନ୍ରୁହାଡ଼େରେ, ପୁରାଃଗି ବରଞ୍ଜାନ୍ ଦୁକୁରେଇଙ୍ଗ୍ ଉୟାଃକଆ । ୨୩ ଆୟାଃ ହନ୍କକେ ହଗି ଗଏଃକଆଇଙ୍ଗ୍ । ଏନାରେ ସବେନ୍ କାଲିସିୟାକ ସାରିୟାକ ଯେ, ଆଇଙ୍ଗ୍ ମନ୍ସୁରୁଦ୍ ସାରିନିଃ, ମାନଞ୍ଜାରାଃ ସବେନ୍ ଉଡ଼ୁଆତଃ ଇଛାସାନାଙ୍ଗ୍ ସାରିନିଃ ତାନିଙ୍ଗ୍ । ଆପେ ମିପିହୁଡ଼୍ ରିକାକାଦ୍ କାମି ଲେକାଗି ଆଇଙ୍ଗ୍ ଏମ୍ ରୁହାଡ଼ପେୟାଇଙ୍ଗ୍ ।

୨୪ “ମେନ୍ଦ ଥୁୟଡ଼ିରାରେ ଆପେକଏତେ ଅକନ୍ ହଡ଼କ ନେ ହସଡ଼ ଇନିଡୁ କାପେ ଅତଙ୍ଗକାଦା ଆତଃ ଅକ୍ନାଃକେ ସାଏତାନ୍ରାଃ ଇକିର୍ ଇନିଡୁ ମେନ୍ତେ କାଜିୟାଃକ, ଏନାକେ କାପେ ଇଡୁକାନା, ଇନ୍କୁକେ ଆଇଙ୍ଗ୍ କାଜିକତାନାଇଙ୍ଗ୍, ଆଇଙ୍ଗ୍ ଆପେ ଚେତାନ୍ରେ ଆତଃ ଜେତାନ୍ ବାହାରମ୍ କାଇଙ୍ଗ୍ ଲାଦିପେୟା । ୨୫ ଆପେତାଃରେ ଅକ୍ନାଃ ମେନାଃ, ଏନା ଏସକାର୍ ଆଇଁୟାଃ ହିଜୁଃ ଜାକେଦ୍ ପୁରାଃ କେଟେଦ୍ୟାନ୍ଗି ସାବ୍କେଦ୍ତେ ଦହକାପେ । ୨୬ ଅକ ହଡ଼କ ଜିତାଅଞ୍ଜାଃକ, ଆତଃ ଚୁଣ୍ଡୁଜାକେଦ୍ ଆଇଁୟାଃ ଇଛାସାନାଙ୍ଗ୍ ଲେକାତେ କାମିୟାକ, ଆଇଙ୍ଗ୍ ଆପୁତାଃଏତେ ଅକ ଆକ୍ତେୟାର୍ ନାମାକାଦାଇଙ୍ଗ୍, ଏନା ଇନ୍କୁକେଇଙ୍ଗ୍ ଏମାକଆ

। ୨୭ ଅତେଦିଶ୍ୱମରେୟାଃ ଏଚାଃ ଏଚାଃ କିଲିରେନ୍ ହତକକେ ମେତ୍ତେଦ୍ ସଚାତେ ସାଜାଇ ଏମାକ ନାଗେନ୍ତେ ଆତଃ ହାସାରାଃ ଚାଚୁ ଲେକା ମିଦ୍ ବାଚ୍ ହିସା ରାପୁଦଃ ନାଜ୍, ଆଇଜ୍ ଇନ୍କୁକେ ଆକ୍ତେୟାର୍ ଏମାକଆଇଜ୍ । ୨୮ ଆଇଜ୍ ଇନ୍କୁକେ ଆଜ୍ଅଃ ଇପିଲ୍ ହଗି ଏମାକଆଇଜ୍ ।

୨୯ “ପାବିତାର୍ ଆମ୍ବା କାଲିସିୟାକକେ ଚିନାଃଏ କାଜିତାନା, ଏନା ଆୟୁମେ ନାଗେନ୍ତେ ଜେତାଏୟାଃ ଲୁତୁର୍ ମେନାଃନିଃ ଆୟୁମେକାଏ ।

୩

ସାଦର୍ସ୍ କାଲିସିୟା ନାଗେନ୍ତେ କାନାଜି

୧ “ସାଦର୍ସ୍ କାଲିସିୟାରେନ୍ ଦୁଁତ୍ତଃତେ ଅଲେମେ, ପାରମେଶ୍ୱାର୍ଆଃ ଏୟା ଆମ୍ବା ଆତଃ ଏୟା ଇପିଲ୍ ସାବାକାଦ୍ନିଃତାଃଏତେ ନେ କାନାଜି । ଆଇଜ୍ ଆମାଃ କାମିକଇଜ୍ ସାରିତାନା, ଆମ୍ ନୁତୁମ୍ତେ ଏସ୍କାର୍ ଜାନିଦ୍ ମେନାମେୟା, ମେନ୍ଦ୍ ସାର୍ତି କାଜିଲେରେ ଗଜାକାନାମ୍ । ୨ ଏନାମେନ୍ତେ ଏୟନଃମେ ଆତଃ ଆମାଃତାଃରେ ଅକଆଃ ମେନାଃ, ଏନା ପୁରାଃଗି ଜିୟନଃ ସିଦାରେ ଏନାକେ ପକ୍ତାଏମେ । ଚିୟାଃଗି ଆଇଜ୍ ସାରିତାନାଇଜ୍, ଆମାଃ କାମିକ ପାରମେଶ୍ୱାର୍ଆଃ ଆୟାର୍ରେ ନାହାଃ ଜାକେଦ୍ କା ପକ୍ତାକାନା । ୩ ☆ଆମ୍ବକେ ଅକଆଃ ଇତୁଆକାନ୍ ତାଇକେନା ଆତଃ ଆମ୍ ଅକଆଃ ଆୟୁମାକାଦ୍ ତାଇକେନାମ୍, ଏନାକେ ପାହାମକେଦ୍ତେ ମାନାତିୟେମେ ଆତଃ ଆମାଃ ପାପହେତେ ମନ୍ରୁହାଡ୍ମେ । ଆମ୍ କାମ୍ ଏୟନଃରେଦ୍, ଆଇଜ୍ ଆମାଃତାଃତେ କୁମ୍ବୁକୁ ଲେକାଇଜ୍ ହିଜୁଃଆ । ଅକ ଦିପିଲିରେଇଜ୍ ହିଜୁଃଆ, ଏନା ଆମ୍ କାମ୍ ସାରିଦାଡ୍ମିୟା । ୪ ମେନ୍ଦ୍ ସାଦର୍ସ୍ରେ ଆପେକଏତେ ଚିମିନ୍ ହତକ ଏସ୍କାର୍ ଆକଆଃ ଲିଜାଃ ନିରାଲ୍ଗି ଦହକାଦାକ । ଇନ୍କୁ ପୁଣ୍ଡି ଲିଜାଃ ତୁସିଜ୍କେଦ୍ତେ ଆଇୟାଃଲଃ ହିଜୁଃସେନଃ ରିକାଏୟାକ, ଚିଆଃଗି ଇନ୍କୁ ନେଆଁ ରିକା ଦାଡ୍ମିକାଦାକ । ୫ ☆ଅକ ହତକ ଜିତାଅଃଃଃକ, ଇନ୍କୁ ନେଲେକା ପୁଣ୍ଡି ଲିଜାଃ ତୁସିଜ୍ଅଃଆକ

☆ ୩:୩ ୩:୩ ମାଧୁର ୨୪:୪୩,୪୪; ଲୁକ ୧୨:୩୯,୪୦; ଉତ୍କଳ କାଜି ୧୨:୧୫. ☆ ୩:୫ ୩:୫ ଉତ୍କଳ କାଜି ୨୦:୧୨; ମାଧୁର ୧୦:୩୨; ଲୁକ ୧୨:୮.

। ଜୀଦାନରେୟାଃ ପୁଅକଏତେ ଇନ୍କୁଆଃ ନୁତୁମ୍ ଚିତ୍ତଲାହ କା ଜିୟନଃଆ । ଆଇୟାଃ ଆପୁ ଆତଃ ଆୟାଃ ଦୁତକଆଃ ଆୟାରରେ ଇନ୍କୁକେ ଆଇଙ୍ଗ୍, ଆଇଙ୍ଗ୍‌କେ ଅତଙ୍ଗତାନ୍ ହତକତାନ୍‌କ ମେନ୍ତେଇଙ୍ଗ୍ କାଜିୟା ।

୬ “ପାବିତାର୍ ଆମ୍ବା କାଲିସିୟାକକେ ଚିନାଃଏ କାଜିତାନା, ଏନା ଆୟୁମେ ନାଗେନ୍ତେ ଜେତାଏୟାଃ ଲୁତୁର୍ ମେନାଃନିଃ ଆୟୁମେକାଏ ।

ଫିଲାଦେଲ୍‌ଫିୟା କାଲିସିୟା ନାଗେନ୍ତେ କାନାଜି

୭ “ଫିଲାଦେଲ୍‌ଫିୟା କାଲିସିୟାରେନ୍ ଦୁତ୍ତତାଃତେ ଅଲେମେ, ଜେତାଏ ପାବିତାର୍ ଆତଃ ସାର୍‌ତିନିଃ ତାନିଃ, ଇନିଃତାଃଏତେ ନେ କାନାଜି ଆୟୁମେପେ, ଇନିଃତାଃରେ ଦାଉଦ୍‌ଆଃ ଚାଭି ମେନାଃ, ଇନିଃ ଅକ ଦୁଆର୍ ନିଜାଃଏ, ଏନାକେ ଜେତାଏ କାକ ହାଣ୍ଡେଦ୍ ଦାଡ଼ିୟା ଆତଃ ଇନିଃ ଅକ୍‌ନାଃ ହାଣ୍ଡେଦାଃଏ, ଏନାକେ ଜେତାଏ କାକ ନିଜ୍ ଦାଡ଼ିୟା । ୮ ଆଇଙ୍ଗ୍ ଆମାଃ କାଜି କାମିକଇଙ୍ଗ୍ ସାରିତାନା, ନାହାଁଃ ଜାକେଦ୍ ଆମାଃ କାଟିଃଲେକା ପେଡେଃ ମେନାଃ, ନେଆଁହଗି ସାରିତାନାଇଙ୍ଗ୍ । ଆମ୍ ଆଇୟାଃ ଇନିତୁକମ୍ ମାନାତିଙ୍ଗ୍‌କାଦା ଆତଃ ଆଇୟାଃ ନୁତୁମ୍ କାମ୍ ବାଗିୟାକାଦା । ଏନାତେ ଆଇଙ୍ଗ୍ ଆମାଃ ଆୟାରରେ ମିଆଁଦ୍ ଦୁଆର୍ ନିଜାକାଦାଇଙ୍ଗ୍, ଏନାକେ ଜେତାଏ କାକ ହାଣ୍ଡେଦ୍ ଦାଡ଼ିୟା । ୯ ଆୟୁମେମେ, ଅକ ହତକ ଯିହୁଦୀ ନାହାଁଲାଃକ, ମେନ୍‌ଦ ବେଦାତେ ଆପାନ୍‌କେ ଯିହୁଦୀ ମେନ୍ତେକ କାଜିନ୍‌ତାନା, ନେ'ଲେକାନ୍ ସାଏତାନ୍‌ରାଃ ଝୁଣ୍ଡରେନ୍ ହତକକେ ଆଇଙ୍ଗ୍ ଆମାଃ କାଟା ଲାତାରରେଇଙ୍ଗ୍ ଜହାର୍‌ଇଟିକିଆ । ଆତଃ ଆଇଙ୍ଗ୍ ଆମ୍‌କେ ଦୁଲାଡ଼ତାନାଇଙ୍ଗ୍ ମେନ୍ତେ ଇନ୍କୁ ସାରିୟାକ । ୧୦ ଚିୟାଃଟି ଆମ୍ ଆଇୟାଃ କାନାଜି ଧୂରାଜ୍ ସାବ୍‌କେଦ୍‌ତେମ୍ ମାନାତିଙ୍ଗ୍‌କାଦା । ଏନାତେ ଅତେଦିଶୁମ୍‌ରେନ୍ ହତକକେ ବିଡ଼ାଅକ ନାଗେନ୍ତେ ଗଟା ଅତେଦିଶୁମ୍‌ରେ ସାସାତିରାଃ ବିନିଡ଼ାଅ ହିଜୁଃଆ ଇମ୍‌ତା ଆଇଙ୍ଗ୍ ଆମ୍‌କେ ଏନାଏତେ ବାଞ୍ଛାଅମେୟାଁଇଙ୍ଗ୍ । ୧୧ ଆଇଙ୍ଗ୍ ଜାଲ୍‌ଦିଗିଇଙ୍ଗ୍ ହିଜୁଃଆ, ଆମାଃତାଃରେ ଅକଆଃ ମେନାଃ, ଏନାକେ ବାଞ୍ଛାଅକେଦ୍‌ତେ ଦହକାମେ, ଜେ'ଲେକାଟି ଆମାଃତାଃଏତେ ଆମାଃ ଜିନିତାଅ ମୁକୁର୍‌କେ ଜେତାଏ ଆଲକାକ କୁମ୍‌ତୁଲୁକା ।

୧୭ ☆ ଜିତାଅକାନ୍ନିଃକେ, ଆଇଙ୍ଗ ଆଇଁୟାଃ ପାର୍ବେଶ୍ୱାର୍ଥାଃ
 ମାନ୍ଦିରେ ଖୁଣ୍ଟୁ ଲେକାଇଙ୍ଗ ବାଇୟା ଆତଃ ଇନିଃ ତିଭଲୀଅ
 ଏନ୍ତାଃଏତେ କାଏ ସେନଃଆ । ଆଇଙ୍ଗ ଆୟାଃ ଚେତାନ୍ରେ
 ପାର୍ବେଶ୍ୱାର୍ଥାଃ ନୁତୁମ୍ ଅଲେୟାଇଙ୍ଗ । ସିର୍ମା ଦିଶୁମ୍ରେନ୍
 ଆଇଁୟାଃ ପାର୍ବେଶ୍ୱାର୍ତାଃଏତେ ହିନ୍ତୁଃତାନ୍ ପାର୍ବେଶ୍ୱାର୍ଥାଃ
 ନାଗାର୍ରେୟାଃ ନୁତୁମ୍ ହଗି ଆୟାଃ ଚେତାନ୍ରେ ଅଲେୟାଇଙ୍ଗ ।
 ଏନ୍ ନାଗାର୍ରେୟାଃ ନୁତୁମ୍ ନାଞ୍ଜା ଯୀରୁଗାଲେମ୍ । ଆଇଙ୍ଗ ଆଇଁୟାଃ
 ନାଞ୍ଜା ନୁତୁମ୍ ହଗି ଆୟାଃ ଚେତାନ୍ରେ ଅଲେୟାଇଙ୍ଗ ।

୧୩ “ପାବିତାର୍ ଆମ୍ କାଲିସିୟାକକେ ଚିନାଃଏ କାଜିତାନା, ଏନା
 ଆୟୁମେ ନାଗେନ୍ତେ ଜେତାଏୟାଃ ଲୁତୁର୍ ମେନାଃନିଃ ଆୟୁମେକାଏ
 ।

ଲାଭଦିକିଆ କାଲିସିୟା ନାଗେନ୍ତେ କାନାଜି

୧୪ “ଲାଭଦିକିଆ କାଲିସିୟାରେନ୍ ଦୁର୍ତ୍ତାଃତେ ଅଲେମେ, ଅକଏ
 ନେ ସବେନ୍ ଆମ୍‌କେ କାଜିତାନାଏ, ଇନିଃ ଆମେନ୍, ପାତିୟାର୍ରେଃ
 ଲେକାନ୍ନିଃ ଆତଃ ସାର୍ତି ଗାଞ୍ଜା ତାନିଃ । ପାର୍ବେଶ୍ୱାର୍
 ବାଇୟାକାଦ୍ ସବେନ୍ ବିଷାଏରେୟାଃ ଏନେଚେଦ୍ନିଃ, ନେଆଁଏ
 କାଜିତାନା, ୧୫ ଆଇଙ୍ଗ ଆମାଃ କାଜି କାମିକଇଙ୍ଗ ସାରିତାନା, ଆମ୍
 ରେହାଡ୍ ବାଙ୍ଗମେୟାଁ ଚାଏ ଲଲ ବାଙ୍ଗମେୟାଁ, ନେଆଁ ଆଇଙ୍ଗ
 ସାରିତାନାଇଙ୍ଗ । ଆମ୍ ରେହାଡ୍ ଚାଏ ଲଲ ତାଇନ୍‌କାରେଦ୍,
 ବୁଗିନାଃ ହବାଅଃତେୟାଃ । ୧୬ ମେନ୍‌ଦ୍ ଆମ୍ ରେହାଡ୍ ଚାଏ
 ଲଲ କା ହବାକେଦ୍‌ତେ ଉର୍ଗୁମ୍‌ଗି ମେନାମେ ହରାତେ, ଆଇଙ୍ଗ
 ଆମ୍‌କେ ଆଇଁୟାଃ ମଚାଏତେଇଙ୍ଗ ବେଏକ୍ ଅତଙ୍ଗମେୟାଁ ।
 ୧୭ ଆମ୍ କାଜିତାନାମ୍, ‘ଆଇଙ୍ଗ କିସାଁଶ୍ୱାରିୟାଇଙ୍ଗ ଆତଃ ପୁରାଃଗି
 ଖୁଜ୍ କ ମେନାଃ, ଆଇଁୟାଃ ଲାଗାତିଙ୍ଗ୍‌ତେୟାଃକ ସବେନାଃ
 ମେନାଃ ।’ ଏନ୍‌ରେୟ ଆମ୍ ସାର୍ତିଗି ଚିମିନ୍ ନାରାଦୁରା ଆତଃ
 ଲିନିବୁଇ ନାମେ ଲେକାନିଃ ତାନ୍‌ମେ, ନେଆଁ କାମ୍‌ସାରିତାନା ।
 ଆମ୍ ଗାରିବ୍, ସାମାହଡ୍‌ମ୍, ମେଦ୍ କା ନେଲ୍ ଦାଡ୍‌ନିଃ ତାନ୍‌ମେ ।
 ୧୮ ଏନାମେନ୍ତେ ଆଇଙ୍ଗ ଆମ୍‌କେଇଙ୍ଗ ଆରୁମେତାନା, କିସାଁଶ୍ୱା
 ନାଗେନ୍ତେ ଆଇଙ୍ଗ୍‌ତାଃଏତେ ଫାର୍ତି ସୋନା କିରିଙ୍ଗ୍‌ୟେମେ,

☆ ୩:୧୨ ୩:୧୨ ଉତ୍କଳ କାଜି ୨୧:୨.

ଆତଃ ପୁଣି ଲିଜାଃ ହରି କିରିଙ୍ଗ୍‌ୟେମେ, ଏନାରେ ଆମ୍ ଆମାଃ ଗିହୁଗାନ୍ ସାମାହତ୍ତମକେ ଦାନାଙ୍ଗ ଦାଡ଼ିୟାମେ । ନେଲ୍ ଦାଡ଼ି ନାଗେନ୍ତେ ମେଦ୍‌ରେ ଗସଃ ନାଙ୍ଗ ଆଇଙ୍ଗ୍‌ତାଃଏତେ କାଜାଲ୍ କିରିଙ୍ଗ୍‌ୟେମେ । ^{୧୯} ✽ଆଇଙ୍ଗ୍ ଅକ ହତ୍ତକକେ ଦୁଲ୍ଲାଡ଼ାଃଇଙ୍ଗ୍, ଇନ୍‌କୁକେ ସୁଧରାଅ ନାଙ୍ଗ ସାଜାଇ ଏମାଃଇଙ୍ଗ୍ । ଏନାମେନ୍ତେ ଆମାଃ ମନ୍‌ସୁରୁଦ୍‌ଲଃ ପାପ୍ ହରାଏତେ ମନ୍‌ରୁହାଡ଼େମେ । ^{୨୦} ନେଲେମେ, ଆଇଙ୍ଗ୍ ଦୁଆର୍‌ତାଃରେ ତିଙ୍ଗ୍‌କେଦ୍‌ତେ ଦୁଆର୍ ଠକ୍ ଠକାଅ ତାନାଇଙ୍ଗ୍, ଜେତାଏ ଆଇଁୟାଃ ଲାବ୍‌ଜା ଆୟୁମ୍‌କେଦ୍‌ତେ ଦୁଆର୍ ନିଜେୟାଏ, ଆଇଙ୍ଗ୍ ଆୟାଃ ଅଡ଼ାଃ ଭିତାର୍‌ତେ ହିଜୁଃକେଦ୍‌ତେ ଆୟାଃଲଃ ଜମେୟା଼ଇଙ୍ଗ୍ ଆତଃ ଇନିଃ ଆଇଁୟାଃଲଃ ଜମେୟା଼ଏ । ^{୨୧} ଆଇଙ୍ଗ୍ ଜେ'ଲେକା ଜିତାଅକେଦ୍‌ତେ, ଆଇଁୟାଃ ଆପୁଲଃ ଆୟାଃ ରାଜ୍‌ଗାଦିରେ ଦୁବାକାନାଇଙ୍ଗ୍, ଏନ୍ ଲେକାଗି ଅକ ହତ୍ତକ ଜିତାଅଝାଃକ, ଆଇଙ୍ଗ୍ ଇନ୍‌କୁକେ ଆଇଁୟାଃଲଃ ଆଇଁୟାଃ ରାଜ୍‌ଗାଦିରେ ଦୁବ୍ ନାଗେନ୍ତେଇଙ୍ଗ୍ ଏମାକଆ ।

^{୨୨} “ପାବିତାର୍ ଆମ୍ କାଲିସିୟାକକେ ଚିନାଃଏ କାଜିତାନା, ଏନା ଆୟୁମେ ନାଗେନ୍ତେ ଜେତାଏୟାଃ ଲୁଡୁର୍ ମେନାଃନିଃ ଆୟୁମେକାଏ ।”

୪

ସିର୍ମାରେ ପାର୍‌ମେଶ୍‌ବାର୍‌ଆଃ ସୁନ୍‌ସାର୍

^୧ ନେ ନେତାରେଗି ଆଇଙ୍ଗ୍ ଆତଃମିଆଁଦ୍ ଦାର୍‌ଗାନ୍ ନେଲ୍‌କେଦାଇଙ୍ଗ୍ । ସିର୍ମା ଦିଶୁମ୍‌ରେ ଦୁଆର୍ ନିଜାକାନ୍ ତାଇକେନା ଆତଃ ବିଙ୍ଗୁଲ୍ ବାଜା ସାଡ଼ି ଲେକା ମିଆଁଦ୍ ଲାବ୍‌ଜା ଆଇଙ୍ଗ୍‌କେ କାଜିତାନ୍ ଆୟୁମ୍‌କେଦାଇଙ୍ଗ୍, “ନେତାଃତେ ହିଜୁଃମେ, ଆତଃ ତାୟମ୍‌ତେ ଅକ୍‌ନାଃ ହବାଅଃଆ ଏନା ଆଇଙ୍ଗ୍ ଆମ୍‌କେଇଙ୍ଗ୍ ଉଦୁବାମେୟା ।” ^୨ ଆଇଙ୍ଗ୍ ଇମ୍‌ତାଗି ପାବିତାର୍ ଆମ୍‌ତେଇଙ୍ଗ୍ ପେରେଃୟାନା ଆତଃ ନେଲ୍‌କେଦାଇଙ୍ଗ୍, ସିର୍ମା ଦିଶୁମ୍‌ରେୟାଃ ମିଆଁଦ୍ ରାଜ୍‌ଗାଦିରେ ଜେତାଏ ମିହୁଡ୍ ଦୁବାକାନାଏ । ^୩ ଆୟାଃ ମେଦ୍‌ମୁହାଁଡ୍ ହିରା ଆତଃ ମତି ଲେକା ଝାଲ୍‌ସାଃଅ ତାଇକେନା,

✽ ୩:୧୯ ୩:୧୯ ଏବଂ ୧୨:୭.

ଆତଃ ରାଜଗାଦିରେୟାଃ ଚାରିୟସାଃରେ ଗନଙ୍ଗାନ୍ ଦିରି ଲେକା
 ମିଆଁଦ୍ ଲୁରବିଙ୍ଗ* ତାଇକେନା । ୪ ଆତଃ ଏନ୍ ରାଜଗାଦିରାଃ
 ଚାରିୟସାଃରେ ବାର୍ହିସି ଉପୁନିୟା ଏଟାଃ ରାଜଗାଦି ତାଇକେନା
 । ଏନ୍ ବାର୍ହିସି ଉପୁନିୟା ରାଜଗାଦିରେ ବାର୍ହିସି ଉପୁନିୟା
 ପ୍ରାଚିନକ ଦୁବାକାନ୍ ତାଇକେନା । ଇନ୍କୁ ପୁଣ୍ଡି ଲିଜାଃ ଆତଃ
 ଆକଆଃ ବହଃରେ ସୋନାରେୟାଃ ମୁକୁଟ୍ ତୁସିଙ୍ଗାନ୍ ତାଇକେନାକ
 । ୫ ☆ଏନ୍ ରାଜଗାଦିଏତେ ହିଚିରରାଃ ମାର୍ଯ୍ୟାଲ୍ ଆତଃ ରିମିଲରାଃ
 ସାଡ଼ି ଆୟୁମଃ ତାଇକେନା । ରାଜଗାଦି ହେପାଦରେ ଏୟା ଜୁଲତାନ୍
 ଦିଆ ତାଇକେନା । ନେ ଦିଆ ପାରମେଶ୍ଵାରଆଃ ଏୟା ଆମ୍ ତାନାଃ
 । ୬ ଆତଃ ରାଜଗାଦି ଆୟାରରେ କାଁର୍ ଲେକା ନିରାଲ୍ ଦରେୟା
 ନେଲଃ ତାଇକେନା । ଏନ୍ ରାଜଗାଦିରାଃ ଚାରିୟସାଃରେ ଉପୁନିୟା
 ଜାନିଦ୍ ଜାଁତୁ ତାଇକେନାକ । ଏନ୍ ଜାନିଦ୍ ଜାଁତୁକଆଃ ଆୟୁର୍
 ତାୟମ୍ ବାରାନ୍ସାଃରେ ମେଦ୍ତେ ପେରେଜାକାନ୍ ତାଇକେନା ।
 ୭ ପାହିଲା ଜାଁତୁ କୁଲା ଲେକାଏ ନେଲଃ ତାଇକେନା, ଏଟାଃନିଃ ବାଛା
 ଲେକାଏ ନେଲଃ ତାଇକେନା । ଆପିୟାନିୟାଃ ମେଦ୍ମୁହାଁଡ୍ ହଡ଼ରାଃ
 ମେଦ୍ମୁହାଁଡ୍ ଲେକା ତାଇକେନା ଆତଃ ଉପୁନିୟାନିଃ ଆଦିରତାନ୍
 ବାଜ୍ ଲେକାଏ ନେଲଃ ତାଇକେନା । ୮ ନେ ଉପୁନିୟା ଜାଁତୁକଆଃ
 ତୁରିୟା ଆପରର୍ ତାଇକେନା । ନେ ଜାଁତୁକଆଃ ଭିତାର୍ ଆତଃ
 ବାହାରି ଚାରିୟସାଃରେ ମେଦ୍ତେ ପେରେଜାକାନ୍ ତାଇକେନା ।
 ଇନ୍କୁ ନିଦାସିଙ୍ଗି ବେଗାର୍ ରୁଡ଼ୁତ କାଜିତାଇକେନାକ,
 “ସବେନ୍ ପେଡେୟାନ୍ ପ୍ରାଭୁ ପାରମେଶ୍ଵାର୍ ପାବିତାର୍, ପାବିତାର୍,
 ପାବିତାର୍ ।

ଇନିଃ ସିଦା ତାଇକେନିଃ, ନାହାଁଃ ମେନାଇନିଃ ଆତଃ ହିଜୁଃ
 ଦିପିଲିରେ ତାଇନଃନିଃ ।”

୯ ଏନ୍ ଉପୁନ୍ ଜାନିଦ୍ ଜାଁତୁକ ରାଜଗାଦିରେ ଦୁବାକାନ୍ ଜାନାଅ
 ଜାନାଅ ଜାକେଦ୍ ତାଇନଃନିଃକେ ମାନାରାଙ୍ଗ, ମାଇନାନ୍ ଆତଃ
 ଧାନ୍ୟାବାଦ୍ ଏମ୍କେଦ୍ତେ ଆୟାଃ ଦୁରାଙ୍ଗତାନ୍ ତାଇକେନ୍ ଇମ୍ତା,
 ୧୦ ସିଦାରେନ୍ ଏନ୍ ବାର୍ହିସି ଉପୁନ୍ ପ୍ରାଚିନକ ଜାନାଅ ଜାନାଅ
 ଜାନିଦ୍ ତାଇନଃନିଃତାଃରେ ଅମ୍ପାଃକେଦ୍ତେ ଜହାରତାନ୍ଲଃ ଆୟାଃ

* ୪:୩ 4:3 ଇନ୍ଦ୍ରଧନୁ ☆ ୪:୫ ୪:୫ ଉତ୍କଳ କାଜି ୮:୫; ୧୧:୧୯; ୧୭:୧୮; ଉତ୍କଳ
 କାଜି ୧:୪.

ସୁନୁସାର ରିକାକେଦାକ । ଆତଃ ରାଜଗାଦି ଲାଡ଼ାରରେ ଆକଥାଃ
ଆପ୍ତନାଃ ମୁକୁଟ୍ ଦହକେଦ୍‌ତେ କାଜିକେଦାକ,

୧୧ “ହେ ପ୍ରାଭୁ ଆଲେୟାଃ ପାର୍ମେଶ୍ଵାର୍,

ଆମ୍‌ଗି ମାନାରାଜ୍, ମାଇନାନ୍ ଆତଃ ପେଡ଼େଃ ନାମେ
ଲେକାନ୍‌ନିଃ ତାନ୍‌ମେ,

ଚିଆଃଚି ଆମ୍‌ଗି ନେ ସବେନାଃମ୍ ବାଇୟାକାଦା,

ଆତଃ ଆମାଃ ଇଛାସାନାଜ୍ ଲେକାତେ ଏନାକ ତାଇନ୍‌ୟାନା
ଆତଃ ଜାନିଦ୍ ହବାୟାନା ।”



ପୁଅ ଆତଃ ମିଶ୍ଟିହନ୍

୧ ଆଇଜ୍ ରାଜଗାଦିରେ ଦୁବାକାନ୍‌ନିୟାଃ ଜମ୍ ତିଃଇରେ
ମିଆଁଦ୍ ମାରି ପୁଅ ନେଲ୍‌କେଦାଇଜ୍, ଏନାରେୟାଃ ବାରାନ୍‌ସାଃରେ
ଅଲ୍‌କାନ୍ ତାଇକେନା ଆତଃ ଏନାରେ ଏୟା ମୋହ୍‌ରାଃ ଚିହ୍ନାଁ
ତାଇକେନା । ୨ ଆତଃ ଆଇଜ୍ ମିଆଁଦ୍ ପୁରାଃ ପେଡ଼େୟାନ୍
ଦୁଁଦ୍‌କେଇଜ୍ ନେଲ୍‌କିୟା, ଇନିଃ ପୁରାଃ କାଉରିତାନ୍‌ଲଃ
କାଜିକେଦାଏ, “ମୋହ୍‌ରକେ ରାଡ଼ାକେଦ୍‌ତେ, ନେ ମାରି ପୁଅକେ
ଜେତାଏ ଅଟାଃ ଦାଡ଼ି ଲେକାନ୍‌ନିଃ ମେନାଇରେଦ୍ ଅତଜ୍‌ଅଃକାଏ ।”
୩ ମେନ୍‌ଦ୍ ଏନ୍ ମାରି ପୁଅ ଅଟାଃକେଦ୍‌ତେ ଏନାରେ ଅଲ୍‌କାନ୍‌ତେୟାଃ
ପାଢ଼ାଅ ନାଗେନ୍ତେ ସିର୍ମାରେ, ଅତେରେ ଚାଏ ହୁଆଜ୍‌ଗାଡ଼ାରେ
ଜେତାଏ କାକ ଅତଜ୍‌ୟାନା । ୪ ଏନ୍ ମାରି ପୁଅକେ ଅଟାଃକେଦ୍‌ତେ
ଏନାରେ ଚିନାଃ ଅଲ୍‌କାନା, ଏନା ପାଢ଼ାଅ ନାଗେନ୍ତେ ଜେତାଏ
ମିହୁଡ୍ ହଗି ପାଢ଼ାଏ ଲେକାନ୍ ହଡ଼କ କାକ ନାମ୍‌ୟାନ୍ ହରାତେ
ଆଇଜ୍ ପୁରାଃଗିଇଜ୍ ରାଆଃକେଦା । ୫ ଏନ୍ତେ ପ୍ରାଚିନ୍‌କଏତେ ମିହୁଡ୍
ଆଇଜ୍‌କେ କାଜିକେଦିୟାଁ, “ଆଲ୍‌ମ୍ ରାଆଃଏୟା, ନେଲେମେ !
ଦାଉଦ୍‌ଆଃ ମାରାଜ୍ କିଲି, ଯିହୁଦା କିଲିରେନ୍ କୁଲ୍‌ମା ଜିତାଅକେଦ୍‌ତେ
ହିଜୁଃତାନା, ଇନିଃ ନେ ଏୟା ମୋହ୍‌ର ରାଡ଼ାକେଦ୍‌ତେ ମାରି ପୁଅ
ଅଟାଃ ନାଗେନ୍ତେ ଦାଡ଼ିୟା ।”

୬ ଏନ୍ତେ ରାଜଗାଦିରେୟାଃ ଆଲାମାଲ୍‌ରେ ସିଦାରେନ୍ ଉପୁନିୟା
ଜାଁତୁ ଆତଃ ପ୍ରାଚିନ୍‌କଆଃ ଆଲାରେ ମିଆଁଦ୍ ମିଶ୍ଟିହନ୍‌କେ

ତିକ୍ଷ୍ଣୁଆକାନ୍ ନେଲ୍‌କିୟାଈଈ । ମିଶ୍ରିହନ୍ ଦାଣ୍ଠେରାକାବ୍‌କାନ୍
 ଲେକାଏ ଆର୍‌କାରଃ ତାଇକେନା । ଆୟାଃ ଏୟା ଦିରିଈ ଆତଃ
 ଏୟା ମେଦ୍ ତାଇକେନା । ଏନ୍ ମେଦ୍‌କ ସବେନ୍ ଅତେଦିଶ୍ୱମ୍‌ତେ
 କୁଲ୍‌କାନ୍ ପାର୍‌ମେଶ୍ୱାର୍‌ଆଃ ଏୟା ଆମ୍‌ ତାନାଃ ।^୭ ଏନ୍ ମିଶ୍ରିହନ୍
 ରାଜ୍‌ଗାଦିରେ ଦୁବାକାନ୍‌ନିଃତାଃତେ ସେନ୍‌କେଦ୍‌ତେ, ଈନିୟାଃ ଜମ୍
 ତିଃଈଏତେ ମାରି ପୁଥ୍‌କେ ଇଦିକେଦା । 「ଆତଃ ଈନିଃ ମାରି
 ପୁଥ୍‌ ତେଲାକେଦ୍ ଇମ୍‌ତାଗି, ଉପୁନିୟା ଜାତୁ ଆତଃ ମିଦ୍‌ହିସି ଉପୁନ୍
 ପ୍ରାଚିନ୍‌କ ମିଶ୍ରିହନ୍‌ଆଃ ଆୟାର୍‌ରେ ଅମ୍‌ୟାୟାନାକ । ଈନ୍‌କୁ ସବେନ୍‌କ
 ମିପିଆଦ୍ ବାନାମ୍, ଆତଃ ବୁଗିନ୍ ସହାନ୍ ଧୁଆନ୍‌ତେ ପେରେଜାକାନ୍
 ସୋନାରେୟାଃ ତୁଭା ସାବାକାଦ୍ ତାଇକେନାକ । ଏନ୍ ବୁଗିନ୍ ସହାନ୍
 ଧୁଆନ୍‌ରାଃ ତୁଭାକ ହବାଅଃତାନା, ପାର୍‌ମେଶ୍ୱାର୍‌ଆଃ ହଡ଼କଆଃ ବିକ୍ତି
 ।^୮ ଈନ୍‌କୁ ମିଆଁଦ୍ ନାଞ୍ଜା ଦୁରାଈକ୍ ଦୁରାଈକେଦା,

“ମାରି ପୁଥ୍‌ ତେଲାକେଦ୍‌ତେ

ଏନାରେୟାଃ ମୋହର୍ ରାଡ଼ା ନାଈ ଆମ୍ ଏସ୍‌କାର୍ ଦାଡ଼ିୟାମେ
 ।

ତିୟାଃଚି ଆମ୍ ଦାଣ୍ଠେକାନ୍ ତାଇକେନାମ୍, ଆମ୍‌କେ ଦାଣ୍ଠେ ଗନଏଃ
 ହବାୟାନ୍ ହରାତେ

ସବେନ୍ କିଲି, ଏଟାଃ ଏଟାଃ ଜାଗାର୍‌ତାନ୍‌କ, ଦିଶ୍ୱମ୍ ଆତଃ
 ଜାତକଏତେ ପାର୍‌ମେଶ୍ୱାର୍‌ଆଃ ନାଈ ହଡ଼କକେମ୍
 କିରିଈକାଦ୍‌କଆ ।

^{୧୦} *ଆତଃ ପାର୍‌ମେଶ୍ୱାର୍‌ଆଃ ସେଞ୍ଜା ରିକା ନାଗେନ୍ତେ ଈନ୍‌କୁକେ
 ମିଆଁଦ୍ ରାଜାଉଡ଼ି ଆତଃ ଯାଜାକ୍ କିଲିରେମ୍
 ବାଇକେଦ୍‌କଆ

ଆତଃ ଈନ୍‌କୁ ଅତେରେକ ରାଇଜେୟା ।”

^{୧୧} ଆଈଈ ଆତଃଗିଈଈ ନେଲ୍‌କେଦା, କାକ ଲେକା
 ଦାଡ଼ିୟାଃ ଦୁଡ଼କ ରାଜ୍‌ଗାଦିକେ, ଉପୁନିୟା ଜାତୁ ଆତଃ
 ପ୍ରାଚିନ୍‌କଆଃ ଚାରିୟାଃରେ ତିକ୍ଷ୍ଣୁଆକାନାକ ।^{୧୨} କାଉରିକେଦ୍‌ତେ
 ଦୁରାଈକ୍‌ତାନଲଃ କାଜିକେଦାକ, “ଦାଣ୍ଠେ ରାକାବାକାନ୍ ଏନ୍ ମିଶ୍ରିହନ୍
 ପେଡ଼େଃ, କିସାଣି, ସେଣାଁ, ଆକ୍‌ତେୟାର୍, ମାନାରାଈ, ମାଇନାନ୍
 ଆତଃ ସାହାରାଅ ନାମେ ଲେକାନ୍‌ନିଃ ତାନିଃ ।”

☆ ୫:୧୦ ୫:୧୦ ଉତ୍କଳ କାଳି ୧:୬.

୧୩ ଆତଃ ଆଇଙ୍ଗ ସିର୍ମା ଦିଶୁମ୍, ଅତେ, ହୁଆଙ୍ଗାଡ଼ା ଆତଃ ଦରେୟାରେନ୍ ସବେନ୍ ଜାନିଦ୍ ଜାଁତୁକ ଆତଃ ଅତେଦିଶୁମ୍ରେନ୍ ସବେନ୍ ଜାଁତୁକକେ ଦୁରାଙ୍ଗତାନ ଆୟୁମ୍କେଦକଆଇଙ୍ଗ । ଇନ୍କୁ “ରାଜ୍‌ଗାଦିରେ ଦୁବାକାନିନ୍ୟାଃ ଆତଃ ଆୟାଃ ମିଶ୍ଟିହନ୍‌ଆଃ ସାହାରାଅ, ମାନାରାଙ୍ଗ, ମାଇନାନ୍ ଆତଃ ପେଡ଼େଃ ଜାନାଅ ଜାନାଅ ତାଇନାଃ !” ମେନ୍ତେକ ଦୁରାଙ୍ଗ ତାଇକେନା ।

୧୪ ଏନ୍ ଉପୁନିୟା ଜାଁତୁକ କାଜିରୁହାଡ଼୍ ତାଇକେନାକ, “ଆମେନ୍ !” ଆତଃ ପ୍ରାତିନ୍‌କ ଅମ୍ପାଃକେଦ୍‌ତେ ଇନିଃକେ ଜହାରକିୟାକ ।



ମୋହର୍ ଏମାକାନ କାଜିରାଃ ମୁଣ୍ଡି

୧ ଏନ୍ତେ ଆଇଙ୍ଗ ନେଲ୍‌କିୟାଇଙ୍ଗ, ଏନ୍ ମିଶ୍ଟିହନ୍ ଏୟା ମୋହର୍‌ଏତେ ପାହିଲ୍ଲା ମୋହର୍‌କେ ରାଡ଼ାକେଦା, ଆତଃ ଉପୁନିୟା ଜାଁତୁକଏତେ ମିଆଁଦିନିଃ ଆଇଙ୍ଗକେ ହିଚିର୍ ସାଡ଼ି ଲେକାଏ କାଜିକେଦିୟା, “ହିଜୁଃମେ !” ୨ ଆଇଙ୍ଗ ଆରିଦ୍ ରାକାବ୍‌କେଦ୍‌ତେ ମିଆଁଦ୍ ପୁଣ୍ଡି ରାଙ୍ଗରେନ୍ ସାଦମ୍ ଆତଃ ସାଦମ୍ ଚେତାନରେ ଦୁବାକାନିନିଃକେ ଧାନୁ ସାବାକାଦ୍‌ତେୟାଃ ନେଲ୍‌କିୟାଇଙ୍ଗ । ଇନିଃକେ ମିଆଁଦ୍ ମୁକୁର୍ ଏମ୍‌ୟାନା ଆତଃ ଜିତାଅଃ ନାଗେନ୍ତେ ଅତଙ୍ଗୟାନା ।

୩ ଏନ୍ତେ ମିଶ୍ଟିହନ୍ ଏଗାଃ ଆତଃମିଆଁଦ୍ ମୋହର୍ ରାଡ଼ାକେଦାଏ ଆତଃ ଏଗାଃ ଆତଃମିଆଁଦ୍ ଜାଁତୁ ଆଇଙ୍ଗକେ କାଜିକେଦିୟା, “ହିଜୁଃମେ !” ୪ ଆଇଙ୍ଗ ଆରାଃ ରାଙ୍ଗରେନ୍ ଆତଃମିଆଁଦ୍ ସାଦମ୍‌କେ ନେଲ୍‌କିୟାଇଙ୍ଗ, ଏନ୍ ସାଦମ୍ ଚେତାନରେ ଦୁବାକାନିନିଃକେ ଅତେଦିଶୁମ୍‌ଏତେ ଜାଉସୁକୁ ସାଜିନେ ନାଗେନ୍ତେ ଆକ୍‌ତେୟାର୍ ଏମ୍‌ୟାନା । ହତକ ଲାପ୍‌ଡ଼ାକେଦ୍‌ତେ ମିହୁଡ଼୍ ଆତଃମିହୁଡ଼୍‌କେ ଗଏଃ ନାଙ୍ଗ, ଆୟାଃ ଡିଃଇରେ ମିଆଁଦ୍ ମାରାଙ୍ଗ ତାରାଉଡ଼ି ଏମ୍‌ୟାନା ।

୫ ଏନ୍ତେ ମିଶ୍ଟିହନ୍ ଆପିୟା ମୋହର୍ ରାଡ଼ାକେଦାଏ ଆତଃ ଆପିୟା ଜାଁତୁ ଆଇଙ୍ଗକେ କାଜିକେଦିୟା, “ହିଜୁଃକେଦ୍‌ତେ ନେଲେମେ !” ଏନ୍ତେ ଆଇଙ୍ଗ ମିଆଁଦ୍ ହେନ୍‌ଦେ ରାଙ୍ଗରେନ୍ ସାଦମ୍ ଚେତାନରେ ଦୁବାକାନିନିଃକେ ନେଲ୍‌କିୟାଇଙ୍ଗ, ଆୟାଃ ଡିଃଇରେ ମିଆଁଦ୍ ତାରାଜୁ

ତାଙ୍କେନା । ୬ ଏନ୍ତେ ଆଇଙ୍ଗ୍ ଉପୁନିୟା ଜାଁତୁକ ମିଦ୍ ଲାବ୍‌ଜାତେ କାଜିତାନ୍ ଲେକା ଆୟୁମ୍‌କେଦାଈଙ୍ଗ୍, “ମୁସିଙ୍ଗ୍‌ରାଃ ନାଲା ସିକାତେ ମିଦ୍ ତାମ୍‌ ଗହମ୍ ଚାଏ ଆପି ତାମ୍‌ କଦେ ନାମଃଆ । ମେନ୍‌ଦ ଜାଲ୍‌ପାଇ ସୁନ୍‌ମ୍ ଆତଃ ଦାଖରାସିକେ ଆଲପେ ନକ୍‌ସାନେୟା ।”

୭ ଏନ୍ତେ ମିଣ୍ଡିହନ୍ ଉପୁନିୟା ମୋହର୍ ରାଡ଼ାକେଦାଏ, ଆତଃ ଉପୁନିୟା ଜାଁତୁ ଆଇଙ୍ଗ୍‌କେ କାଜିକେଦିୟାଏ, “ହିଜୁଃମେ !” । ଏନାରେ ଆଇଙ୍ଗ୍ ମିଆଁଦ୍ ମାଟିୟା ରାଙ୍ଗ୍‌ରେନ୍ ସାଦମ୍ ନେଲ୍‌କିୟାଈଙ୍ଗ୍ । ଏନ୍ ସାଦମ୍‌ରେ ଦୁବାକାନିୟାଃ ନୁତୁମ୍ ଗନଏଃ, ହୁଆଙ୍ଗ୍‌ଗାଡ଼ା ଆଇଃକ୍‌କେ ଅତଙ୍ଗ୍‌ଇ ତାଙ୍କେନା । ମାପାଃତୁପୁଇଙ୍ଗ୍ ରିଙ୍ଗା, ବେମାର୍, ଆତଃ ବିର୍ ଜାଁତୁକଆଃ ହରାତେ ଜିୟନ୍ ରିକା ନାଙ୍ଗ୍ ଅତେଦିଶୁମ୍‌ରେୟାଃ ଉପୁନିହିସା ଚେତାନ୍‌ରେ ଇନ୍‌କୁକେ ଆକ୍‌ତେୟାର୍ ଏମ୍‌ୟାନା ।

୮ ଏନ୍ତେ ମିଣ୍ଡିହନ୍ ମଣେୟାଁ ମୋହର୍ ରାଡ଼ାକେଦାଏ ଇମ୍‌ତା, ଆଇଙ୍ଗ୍ ମିଆଁଦ୍ ବେଦି ନେଲ୍‌କେଦାଈଙ୍ଗ୍ । ପାର୍‌ମେଶ୍‌ବାର୍‌ଆଃ ବାତାନ୍ ଉଦୁବ୍‌କେଦ୍‌ତେ ଗାଞ୍ଜା ଏମ୍‌ରେ ପାତିୟାର୍‌ରଃ ଲେକା ତାଙ୍କାନି ହରାତେ ଗନଏଃ ନାମାକାଦ୍ ହଡ଼କଆଃ ଆମ୍‌କା, ଏନ୍ ବେଦି ଲାତାର୍‌ରେ ଜାଡ଼ନାଅକେଦ୍‌ତେ ତାଙ୍କେନା । ୧୦ ଇନ୍‌କୁ କାଉରିକେଦ୍‌ତେ କାଜିତାଈକେନାକ, “ହେ ପାବିତାର୍, ସାର୍‌ତି ଆତଃ ପୁରାଃ ପେଡେୟାନ୍ ପ୍ରାଭୁ ! ଅତେରେ ଅକନ୍‌କ ଆଲେକେ ଗଏଃକାଲେ ତାଙ୍କେନାକ, ଇନ୍‌କୁକେ ବିଚାର୍‌କେଦ୍‌ତେ ସାଜାଇ ଏମାକ ନାଗେନ୍ତେ ଆତଃତିମିନ୍ ମାହାଁ ବିଲାମଃଆ ?” ୧୧ ଏନ୍ ଆମ୍‌କାଏତେ ମିପିୟାଦ୍‌କକେ ପୁଣ୍ଡି ଲିଜାଃ ଏମ୍‌ୟାନା । ଇନ୍‌କୁଆଃ ଗାଡ଼ିଦାସିକେ ଆତଃ ହାଗା ମିଶିକକେ ଇନ୍‌କୁଆଃ ଲେକାଗି ଗନଏଃ ସାଜାଇ ନାମଃଆ, ଇନ୍‌କୁଆଃ ଗନଏଃ ଆଉରି ପୁରାଃଆ ଜାକେଦ୍ ଆତଃକାଟିଃ ଘାଡ଼ିକାଦ୍ ରୁଡ଼ନ୍ ନାଙ୍ଗ୍ ଇନ୍‌କୁକେ କାଜିୟାନା ।

୧୨ ଏନ୍ତେ ଆଇଙ୍ଗ୍ ଏନ୍ ମିଣ୍ଡିହନ୍‌କେ ତୁରିୟା ମୋହର୍ ରାଡ଼ାତାନ୍ ନେଲ୍‌କିୟାଈଙ୍ଗ୍ ଇମ୍‌ତା, ପୁରାଃଗି ଅତେ ଏକଲାଅୟାନା । ସିଙ୍ଗି, ଉନ୍‌ତେ ବାଇୟାକାନ୍ କାମ୍‌ଲ୍ ଲେକା ହେନ୍‌ଦେ ରାଙ୍ଗ୍ ଆତଃ ଚାଣ୍ଡୁ ମାୟୋମ୍ ଲେକା ପୁରା ଆରାଃ ରାଙ୍ଗ୍‌ୟାନା । ୧୩ ପୁରାଃଗି

☆ ୬:୧୨ ୬:୧୨ ଉତ୍କଳ କାଜି ୧୧:୧୩; ୧୬:୧୮; ମାଥୁ ୨୪:୨୯; ମାର୍କ ୧୩:୨୪,୨୫; ଲୁକ ୨୧:୨୫.

ହୟକେଦ୍ ହରାତେ ଲଥାଦାରୁରାଃ ବେରେଲ୍ ଲଥା ଉୟୁଗଃ ଲେକା,
 ସିର୍ମାଏତେ ଇପିଲକ ଅତେରେକ ଉୟୁଃୟାନା । ୧୪ ✽ଉହୁର୍ରାଃ
 ପୁଥ୍ କୁଡ଼ାଏ ଲେକା ସିର୍ମା କୁଡ଼ାୟାନା ଆତଃ କା ନେଲଃୟାନା । ବୁରୁ
 ଆତଃ ଟାପୁକ ମିଦ୍ତାଃଏତେ ଆତଃମିଦ୍ତାଃ ଆତମୟାନା । ୧୫ ଏନ୍
 ଦିପିଲିରେ ଅତେଦିଶୁମ୍ରେନ୍ ସବେନ୍ ରାଜା, ରାଇଜ୍ ଚାଲାଅକ,
 ପାଲଟାନ୍କଆଃ ମାରାଜ୍ନିଃ, କିର୍ସାଣ୍ଡ, ପେଡ଼େୟାନ୍କ, ଏଟାଃ
 ସବେନ୍ ହଡ଼କ, ଆଖିରିଜ୍ ଦାସିକ, ତନଲ୍ହେତେ ରାଡ଼ାକାନ୍କ,
 ବୁରୁରେୟାଃ ସବେନ୍ ଖଡ଼ପଃ ଆତଃ ସେରେଜ୍ ଲାଡ଼ାର୍
 ଲାପାଜାତେ ସେନଃୟାନାକ ଆତଃ ଉକୁୟାନାକ । ୧୬ ✽ଇନ୍କୁ
 ବୁରୁ ଆତଃ ସେରେଜ୍କକେ ହାକାଅକେଦ୍ତେ କାଜିତାଇକେନାକ,
 “ଆଲେୟାଃ ଚେତାନ୍ରେ ଉୟୁଗଃପେ, ରାଜଗାଦିରେ ଦୁବାକାନ୍
 ହଡ଼ତାଃଏତେ ଆତଃ ମିଶ୍ରିହନ୍ଆଃ ଖ୍ସ୍ଏତେ ଆଲେକେ ଉକୁଲେପେ
 । ୧୭ ଇନ୍କିନାଃ ଖ୍ସ୍ରାଃ ବରଞ୍ଜାନ୍ ହୁଲାଜ୍ ସେଟେରାକାନା ଆତଃ
 ଅକଏ ଏନାରେୟାଃ ବିରୁଧ୍ରେ ତିଜ୍ଜୁ ଦାଡ଼ିୟା ?”



୧୪୪,୦୦୦ ଇସ୍ରାଏଲ୍ ହଡ଼କ

୧ ନେଆଁ ତାୟମ୍ତେ ଆଇଜ୍ ଅତେରେୟାଃ ଉପୁନ୍ କଟାରେ
 ଉପୁନିୟା ଦୁଁଡ଼କକେ ତିଜ୍ଜୁଆକାନ୍ ନେଲ୍କେଦ୍କଆଇଜ୍ ।
 ଇନ୍କୁ ଅତେରେୟାଃ ଉପୁନ୍ସାଃରେ ହୟକେ କେସେଦ୍କେଦ୍ତେ
 ତାଇକେନାକ । ଏନାତେ ଅତେଦିଶୁମ୍, ଦରେୟା ଚାଏ
 ଜେତା ଦାରୁରେ କାଟିଃଲେକାହ୍ ହୟ କା ହିଜ୍ଜୁତାଇକେନା
 । ୨ ଆତଃ ଆଇଜ୍ ଏଟାଃ ଆତଃମିଆଁଦ୍ ଦୁଁଡ଼କେ ଜାନିଦ୍
 ପାରମେଶ୍ଵାର୍ଆଃ ମୋହର୍ ସାବ୍କେଦ୍ତେ ସିଜ୍ଜିତୁର୍ସାଃଏତେ
 ହିଜ୍ଜୁତାନ୍ ନେଲ୍କିୟାଇଜ୍ । ନେ ଦୁଁଡ଼ ଅତେଦିଶୁମ୍ ଆତଃ
 ଦରେୟାକେ ଜିୟନେ ନାଗେନ୍ତେ ପାରମେଶ୍ଵାର୍ ଅକ ଉପୁନିୟା
 ଦୁଁଡ଼କକେ ଆକ୍ତେୟାର୍ ଏମାକାଦ୍କ ତାଇକେନାଏ, ଇନ୍କୁକେ
 କାଉରିକେଦ୍ତେ କାଜିକେଦ୍କଆ, ୩ “ଆଲେ ଆବୁଆଃ
 ପାରମେଶ୍ଵାର୍ଆଃ ଦାସିକଆଃ ମଲ୍ଜ୍ରେ ମୋହର୍ରାଃ ତିହ୍ନାଁ

✽ ୬:୧୪ ୬:୧୪ ଉତ୍କଳ କାଜି ୧୭:୨୦. ✽ ୬:୧୭ ୬:୧୭ ଲୁକ ୨୩:୩୦.

ଆଉରି ଏମାକ ଜାକେଦ୍ ଅତେଦିଶୁମ୍, ଦରେୟା ଚାଏ ଦାରୁକରାଃ
 ଜେଡନାଃ ଆଲପେ ନକ୍ସାନେୟା ।” ୪ ଅକ ହଡକଆଃ
 ମଲଙ୍ଗରେ ପାରମେଶ୍ୱାର୍ ଆଃ ମୋହରରାଃ ଚିହ୍ନାଁ ଏମ୍ୟାନା,
 ଇନ୍କୁ ୧୪୪,୦୦୦ ହଡକ ମେନାକଆ ମେଡ୍ରେଇଙ୍ଗ୍ ଆୟୁମ୍କେଦା
 । ଇନ୍କୁ ଇସାଏଲ୍ରେନ୍ ଗେଲ୍ବାର୍ କିଲିକଆଃ ହଡକତାନ୍କ ।
 * ଯିହୁଦା କିଲିକଏତେ ୧୨,୦୦୦, ରୁବେନ୍ କିଲିକଏତେ ୧୨,୦୦୦,
 ଗାଦ୍ କିଲିକଏତେ ୧୨,୦୦୦, ୬ ଆସେର୍ କିଲିକଏତେ ୧୨,୦୦୦,
 ନପ୍ତାଲି କିଲିକଏତେ ୧୨,୦୦୦, ମନାସି କିଲିକଏତେ ୧୨,୦୦୦,
 ୭ ଶିମିୟନ୍ କିଲିକଏତେ ୧୨,୦୦୦, ଲେବୀ କିଲିକଏତେ ୧୨,୦୦୦,
 ଇସାଖର୍ କିଲିକଏତେ ୧୨,୦୦୦, ୮ ସବ୍ଲୁନ୍ କିଲିକଏତେ ୧୨,୦୦୦,
 ଯୋଷେଫ୍ କିଲିକଏତେ ୧୨,୦୦୦, ଆଡଃ ବେଞ୍ଜାମିନ୍ କିଲିକଏତେ
 ୧୨,୦୦୦ ।

ପୁରାଃ ଗାଦେଲ୍ ହଡ

୯ ଏନ୍ତେ ଆଇଙ୍ଗ୍ ପୁରାଃ ଗାଦେଲ୍ ହଡକକେଇଙ୍ଗ୍
 ନେଲ୍କେଦକଆ, ଇନ୍କୁକେ ଲେକାଲେକରେ କାକ ଲେକା
 ଦାଡିୟଃଆ । ଇନ୍କୁ ମିପିୟାଦ୍ ଜାତିରେନ୍, କିଲିରେନ୍,
 ଦିଶୁମ୍ରେନ୍, ଆଡଃ ଏଟାଃ ଏଟାଃ ଜାଗାର୍ତାନ୍ ହଡକଏତେ
 ହିଜାକାନ୍ ତାଇକେନାକ । ଇନ୍କୁ ପୁଣି ଲିଜାଃ ତୁସିଙ୍ଗ୍କେଦ୍ତେ
 ଆଡଃ ଡିଃଇରେ କିତା ଢାଉଡ଼ା ସାବ୍କେଦ୍ତେ, ରାଜ୍ଗାଦି ଆଡଃ
 ମିଣ୍ଡିହନ୍ଆଃ ଆୟାର୍ରେ ଡିଙ୍ଗୁଆକାନ୍ ତାଇକେନାକ । ୧୦ ଇନ୍କୁ
 ପୁରାଃ କାଉରିକେଦ୍ତେ କାଜିତାଇକେନାକ, “ରାଜ୍ଗାଦିରେ
 ଦୁବାକାନ୍ ପାରମେଶ୍ୱାର୍ ଆଡଃ ମିଣ୍ଡିହନ୍ ଏସ୍କାର୍ ଆରୁଆଃ
 ଜାଉବାସ୍ତାଅନିଃ ତାନିଃ ।” ୧୧ ସବେନ୍ ଦୁଡ୍ଡକ ରାଜ୍ଗାଦି,
 ପ୍ରାଚିନ୍କଆଃ, ଆଡଃ ଉପୁନିୟା ଜାତୁକଆଃ ଚାରିୟସାଃରେ
 ଡିଙ୍ଗୁଆକାନ୍ ତାଇକେନାକ । ଇନ୍କୁ ରାଜ୍ଗାଦି ଆୟାର୍ରେ
 ଅମ୍ପାଃକେଦ୍ତେ ପାରମେଶ୍ୱାର୍କେ ଜହାର୍ତାନ୍ଲଃ ଆଡଃ ସୁନ୍ସାବ୍
 ରିକାତାନ୍ଲଃ ୧୨ କାଜିକେଦାକ, “ଆମେନ୍ ! ସାହାରାଅ,
 ମାନାରାଙ୍ଗ୍, ସେଣାଁ, ଧାନଧାବାଦ୍, ମାଇନାନ୍, ପେଡ୍ଡେଃ ଆଡଃ
 ଆୟାଃ ଆକ୍ତେୟାର୍ ଜାନାଅ ଜାନାଅ ଆରୁଆଃ ପାରମେଶ୍ୱାର୍ଆଃ
 ହବାଅଃକା ଆମେନ୍ !”

୧୩ ଏନ୍ ପ୍ରାଚିନକଏତେ ମିତ୍ରୁଡ଼ନିଃ ଆଇଙ୍ଗକେ କୁଲିକେଦିୟାଁ,
“ପୁଣ୍ଡି ଲିଜାଃ ତୁସିଙ୍ଗୟାଁକାନ୍ ଏନ୍ ହଡ଼କ ଅକଏତାନ୍କ ? ଆତଃ
ଇନ୍କୁ କତାଃଏତେ ହିନ୍ଦୁଃକାନାକ ?”

୧୪ ✽ଆଇଙ୍ଗ କାଜିରୁହାଡ଼କେଦାଇଙ୍ଗ, “ହେ ମାଇନାନ୍, ଆଇଙ୍ଗ
କାଇଙ୍ଗ ସାରି, ଆବେନ୍ ସାରିକାଃବେନ୍ ।” ଇନିଃ ଆଇଙ୍ଗକେ
କାଜିକେଦିୟାଁ, “ନେ ହଡ଼କ ବରଝାନ୍ଗି ସାସାତି ନାମ୍‌କେଦ୍‌ତେ
ହିନ୍ଦୁଃକାନାକ । ଇନ୍କୁ ମିଣ୍ଡିହନ୍‌ଆଃ ମାୟୋମ୍‌ତେ ଆକଆଃ
ଲିଜାଃ ଚାପିକେଦ୍‌ତେ ପୁଣ୍ଡିକାଦାକ । ୧୫ ଏନାମେନ୍ତେ ଇନ୍କୁ
ପାର୍‌ମେଶ୍ୱାର୍‌ଆଃ ରାଜ୍‌ଗାଦି ଆୟାରରେ ତେରାକେଦ୍‌ତେ ନିଦାସିଙ୍ଗି
ଆୟାଃ ମାନ୍ଦିର ଅଡ଼ାଃରେ ଆୟାଃ ସୁନ୍‌ସାର୍ ରିକାତାନାକ । ଆତଃ
ରାଜ୍‌ଗାଦିରେ ଦୁବାକାନ୍ ହଡ଼ ଇନ୍କୁକେ ବାଞ୍ଛାଅକଆ । ୧୬ ଇନ୍କୁ
ଚିତ୍‌ଲାହ କାକ ରେଙ୍ଗେଜଆଃ ଚାଏ କାକ ତେତାଙ୍ଗଅଃଆ, ସିଙ୍ଗିରାଃ
ରାଁପ୍ ଚାଏ ଏଗାଃ ଜେତାନ୍ ରାଁପ୍ ଇନ୍କୁକେ କାଏ ଜୁଲ୍ ଦାଡ଼ିୟା
। ୧୭ ଚିୟାଃଚି ରାଜ୍‌ଗାଦି ଆଲାମାଲାରେ ଦୁବାକାନ୍ ମିଣ୍ଡିହନ୍
ଇନ୍କୁଆଃ ଗୁପିନିଃ ହବାଅଃଆଏ । ଇନିଃ ଜୀଦାନ୍‌ରେୟାଃ ସେତେଙ୍ଗ
ଦାଆଃ ହେପାଦ୍‌ତେ ଇନ୍କୁକେ ସୁତୁଃଈଦିକଆ ଆତଃ ପାର୍‌ମେଶ୍ୱାର୍
ଇନ୍କୁଆଃ ମେଦ୍‌ଦାଆଃ ସବେନାଃଏ ଜଦ୍‌କଆ ।”

୮

ଏୟା ମୋହର୍

୧ ମିଣ୍ଡିହନ୍ ଏୟା ମୋହର୍ ରାଡ଼ାକେଦ୍‌ଚି, ସିର୍ମା ଦିଶୁମ୍‌ରେ ଆଧା
ଘାଣ୍ଟା ଜାକେଦ୍ ସିଃସଏଃୟାନା । ୨ ଏନ୍ତେ ଆଇଙ୍ଗ ପାର୍‌ମେଶ୍ୱାର୍‌ଆଃ
ଆୟାରରେ ତିଙ୍ଗୁଆକାନ୍ ଏୟା ଦୁଁଡ଼କକେଇଙ୍ଗ ନେଲ୍‌କେଦ୍‌କଆ
ଆତଃ ଇନ୍କୁକେ ଏୟା ବିଙ୍ଗୁଲ୍‌ବାଜା ଏମ୍‌ୟାନା ।

୩ ଏଗାଃ ଆତଃମିଆଁଦ୍ ଦୁଁଡ଼ ମିଆଁଦ୍ ସୋନାରେୟାଃ ଧୁଆନ୍
ଉରୁବ୍‌ତେୟାଃ ସାବ୍‌କେଦ୍‌ତେ ବେଦି ଜାପାଃରେ ତିଙ୍ଗୁୟାନା
। ରାଜ୍‌ଗାଦି ହେପାଦ୍‌ରେ ତାଇନଃତାନ୍ ସୋନାରେୟାଃ ବେଦି
ଚେତାନ୍‌ରେ ପାର୍‌ମେଶ୍ୱାର୍‌ଆଃ ହଡ଼କଆଃ ବିକ୍ତିଲଃ ମେସାକେଦ୍‌ତେ
ଦାନ୍ ରାକାବେ ନାଙ୍ଗ ଇନିଃକେ ପୁରାଃଗି ଧୁଆନ୍ ଏମ୍‌ୟାନା ।

✽ ୭:୧୪ ୭:୧୪ ମାଥୁଉ ୨୪:୨୧; ମାର୍କ ୧୩:୧୯.

୪ ଏନ୍ ଦୁର୍ଦ୍ଦିଆଃ ତିଃଈରେ ଜୁଲଃତାନ ଧୁଆନ୍‌ରାଃ ସୁକୁଲ୍‌ଲଃ ପାର୍‌ମେଶ୍ଵାର୍‌ଆଃ ହୃଦକଆଃ ବିନ୍ଦି ମେସାକେଦ୍‌ତେ ଚେତାନ୍‌ତେ ରାକାବ୍‌ୟାନା । ୫ ଏନ୍ତେ ଦୁର୍ଦ୍ଦି ଧୁଆନ୍ ଉରୁବ୍‌ତେୟାଃରେ ବେଦିରେୟାଃ ସେଙ୍ଗେଲ୍ ପେରେଃକେଦାଏ ଆଡଃ ଏନାକେ ଅତେରେ ହୁରାଙ୍ଗ୍‌କେଦା । ନେଆଁ ହରାତେ ରିମିଲ୍ ସାଡ଼ିୟାନା, ହିରିରକେଦାଏ ଆଡଃ ଅତେ ଏକ୍‌ଲାଅୟାନା ।

ଏୟା ବିଙ୍ଗୁଲ୍‌ବାଜା

୬ ଏନ୍ତେ ଏୟା ଦୁର୍ଦ୍ଦିକ ଏୟା ବିଙ୍ଗୁଲ୍‌ବାଜା ସାଡ଼ି ନାଙ୍ଗ୍ ସେକାଡ଼ୟାନାକ ।

୭ ପାହିଲା ଦୁର୍ଦ୍ଦି ବିଙ୍ଗୁଲ୍‌ବାଜା ସାଡ଼ିକେଦ୍‌ତି ଆରିଲ୍, ସେଙ୍ଗେଲ୍ ଆଡଃ ମାୟୋମ୍ ଅତେ ଚେତାନ୍‌ରେ ଦୁଲ୍‌ୟାନା । ଏନାତେ ସବେନ୍ ଦାରୁ, ହାରିୟାର୍ ତାସାଦ୍ ଆଡଃ ଅତେରେୟାଃ ଆପିହିସା ଜୁଲ୍‌ୟାନା ।

୮ ଏନ୍ତେ ଏଗାଃ ଆଡଃମିଆଁଦ୍ ଦୁର୍ଦ୍ଦି ଆୟାଃ ବିଙ୍ଗୁଲ୍‌ବାଜା ସାଡ଼ିକେଦ୍‌ତି ସେଙ୍ଗେଲ୍ ଜୁଲ୍‌ତାନ୍ ଲେକା ମିଆଁଦ୍ ମାରାଙ୍ଗ୍ ଦରେୟାରେ ହୁରାଙ୍ଗ୍‌ୟାନା । ଏନାତେ ଦରେୟାରେୟାଃ ଆପିହିସା ଦାଆଃ, ମାୟୋମ୍ ବାଇୟାନା । ୯ ଦରେୟାରେନ୍ ଜାନିଦ୍ ଜାଁତୁକଏତେ ଆପିହିସା ଗଏଃୟାନାକ, ଆଡଃ ଦରେୟାରେୟାଃ ଦାଆଃ ଜାହାଜକ ଆପିହିସା ନକ୍‌ସାନ୍‌ୟାନା ।

୧୦ ଏନ୍ତେ ଆପିୟା ଦୁର୍ଦ୍ଦି ଆୟାଃ ବିଙ୍ଗୁଲ୍‌ବାଜା ସାଡ଼ିକେଦ୍‌ତି ସିର୍ମାଏତେ ସେଙ୍ଗେଲ୍ ଲୁଠି ଲେକା ଜୁଲ୍‌ତାନ୍ ମିଆଁଦ୍ ମାରାଙ୍ଗ୍ ଇପିଲ୍ ସବେନ୍ ଗାଡ଼ାରେୟାଃ ଆପିହିସା ଆଡଃ ସେତେଙ୍ଗ୍ ଚେତାନ୍‌ରେ ଉୟୁଃୟାନା । ୧୧ ଏନ୍ ଇପିଲ୍‌ରାଃ ନୁଡୁମ୍ “ମେହେର୍ ମ” ଏନାରେ ଦାଆଃରେୟାଃ ଆପିହିସା ମେହେର୍‌ୟାନା, ଆଡଃ ଏନ୍ ଦାଆଃ ନୁଁକେଦ୍‌ତେ ପୁରାଃ ହୃଦକଆଃ ଗନଏଃ ହବାୟାନା ।

୧୨ ଏନ୍ତେ ଉପୁନିୟା ଦୁର୍ଦ୍ଦି ଆୟାଃ ବିଙ୍ଗୁଲ୍‌ବାଜା ସାଡ଼ିକେଦ୍‌ତି ସିଙ୍ଗିରାଃ ଆପିହିସା, ଚାଣ୍ଡୁରାଃ ଆପିହିସା, ଆଡଃ ଇପିଲ୍‌କଆଃ ଆପିହିସା ଜିୟନ୍‌ୟାନା । ଏନାତେ ମାୟାଲ୍‌ରେୟାଃ ଆପିହିସା

☆ ଗ:୫ ଗ:୫ ଉତ୍କଳବିଂଶତି ୧୧:୧୯; ୧୭:୧୮.

ନୁବାଃୟାନା । ସିଞ୍ଜିରେୟାଃ ଆପିହିସା ଆତଃ ନୁବାଃରେୟାଃ
ଆପିହିସା କା ମାସ୍ମାଲୟାନା ।

୧୩ ଏନ୍ତେ ଆଇଙ୍ଗ୍ ଆରିଦ୍ ରାକାବ୍‌କେଦାଇଙ୍ଗ୍, ଆଲା ସିର୍ମାରେ
ମିଆଁଦ୍ ବାଜ୍ ଅଡେ ଆଫିର୍‌ତାନଲଃ କାଉରିକେଦ୍‌ଡେ କାଜିତାନା,
“ହାଏ, ଚିମିନ୍ ବରଞ୍ଜାନଗିୟା ! ଏଟାଃ ଆପିୟା ଦୁଡକ ଆକଆଃ
ବିଙ୍ଗୁଲ୍‌ବାଜା ସାଡ଼ି ଇମତା, ଅଡେଦିଶୁମ୍‌ରେନ୍ ହଡକଆଃ ଦୁର୍ଦଦାସା
ଚିମିନ୍ ବରଞ୍ଜାନଗି ହବାଅଃଆ ।”



୧ ଏନ୍ତେ ମଣେୟାଁ ଦୁଡ ବିଙ୍ଗୁଲ୍‌ବାଜା ସାଡ଼ିକେଦ୍‌ଡି, ଆଇଙ୍ଗ୍
ସିର୍ମାଏଡେ ମିଆଁଦ୍ ଇପିଲ୍ ଅଡେରେ ଉୟୁଗଃତାନ ନେଲକିୟାଇଙ୍ଗ୍,
ଇନିଃକେ ହୁଆଙ୍ଗାଡାରେୟାଃ ଚାଞ୍ଜି ଏମାକାନ୍ ତାଇକେନା ।
୨ ଇନିଃ ହିଙ୍ଗୁଃକେଦ୍‌ଡେ ହୁଆଙ୍ଗାଡାରେୟାଃ ଦୁଆର୍ ନିଜ୍‌କେଦ୍‌ଡି,
ମିଆଁଦ୍ ମାରାଙ୍ଗ୍ ଭାଟିଏଡେ ଅଡଙ୍ଗାଅଃତାନ ସୁକୁଲ୍ ଲେକା
ହୁଆଙ୍ଗାଡାଏଡେ ସୁକୁଲ୍ ଅଡଙ୍ଗାୟାନା, ଆତଃ ଏନ୍ ସୁକୁଲ୍ ହରାଡେ
ସିଞ୍ଜି ଆତଃ ସିର୍ମା ଲାତାର୍ ନୁବାଃୟାନା । ୩ ଆତଃ ଏନ୍ ସୁକୁଲ୍‌ଏଡେ
ସନ୍‌ସରେଦକ ଅଡଙ୍ଗାକେଦ୍‌ଡେ ଅଡେରେକ ପାସ୍‌ରାଅିୟାନା ।
ଇନ୍‌କୁକେ ମାର୍‌ମାର୍ ଲେକା ତୁଡ୍ ଦାଡ଼ିରେୟାଃ ପେଡେଃ ଏମୟାନା
। ୪ ଅଡେରେୟାଃ ତାସାଦ୍, ଆଡାଃ ଚାଏ ଜେତାନ୍ ଦାରୁକେ ଆଲପେ
ନକ୍‌ସାନେୟା, ମେନ୍‌ଦ ଅକନ୍‌କଆଃ ମଲଙ୍ଗ୍‌ରେ ପାରିମେଶ୍ୱାର୍‌ଆଃ
ଚିହ୍ନାଁ କା ତାଇକେନା, ଇନ୍‌କୁଆଃ ଏସକାର୍ ନକ୍‌ସାନ୍ ରିକା ନାଗେନ୍ତେ
ଏନ୍ ସନ୍‌ସରେଦକେ କାଜିକାନ୍ ତାଇକେନା । ୫ ଆତଃ ଏନ୍
ହଡକକେ ଆଲପେ ଗଏଃକଆ, ମେନ୍‌ଦ ମଣେୟାଁ ମାହ୍‌ନା
ଜାକେଦ୍ ଦୁକୁ ଏମାକପେ ମେନ୍ତେ ଏନ୍ ସନ୍‌ସରେଦକେ ଆତୁକାନ୍
ତାଇକେନା । ଏନ୍ ଦୁକୁହାସ୍ତୁ, ମାର୍‌ମାର୍‌କଆଃ ତୁଡ୍ ଲେକା ହାସ୍ତୁ
ତାଇକେନା । ୬ ଏନ୍ ମଣେୟାଁ ମାହ୍‌ନା ଭିତାର୍‌ରେ ଦୁକୁହାସ୍ତୁତାନ୍
ହଡକ ଗନଏଃ ଦାଣ୍ଡାୟାକ, ମେନ୍‌ଦ ଗନଏଃ କାକ ନାମେୟା । ଇନ୍‌କୁ
ଗଜଃ ସାନାଙ୍ଗାଆଃକ, ମେନ୍‌ଦ ଗନଏଃ ଇନ୍‌କୁତାଃଏଡେ ନିରାଃ ।

୭ ଏନ୍ ସନ୍‌ସରେଦକ ଲାଡାଇ ନାଗେନ୍ତେ ସେକାଡାକାନ୍ ସାଦମ୍
ଲେକାକ ନେଲଃ ତାଇକେନା । ଇନ୍‌କୁଆଃ ବହଃରେ ସୋନାରେୟାଃ
ମୁକୁର୍ ଲେକା, ମେଦ୍‌ମୁହାଁଡ୍ ହଡକଆଃ ମେଦ୍‌ମୁହାଁଡ୍ ଲେକା, ୮ ଉର୍

କୁଡ଼ିକଆଃ ଉବ୍ ଲେକା ଆତଃ ତାଟା କୁଲକଆଃ ତାଟା ଲେକା ତାଇକେନା ।^{୯୮} ଇନ୍‌କୁଆଃ କୁଡ଼ାମ୍‌କେ ମେଡ଼େଦ୍‌ଡ଼େ ବାଇୟାକାନ୍ ତୁସିୟେନ୍‌ଡେୟାଃ ଲେକ୍‌ନାଃଲଃ ପଟମାକାନ୍ ତାଇକେନା ଆତଃ ସାଦମ୍ ଗାଡ଼ିଡେ ଲାଡ଼ାଇପିଡ଼ି ନିରେତାନ୍ ପୁରାଃଗି ସାଦମ୍‌କଆଃ ଲାବ୍‌ଜା ଲେକା, ଇନ୍‌କୁଆଃ ଆପରବ୍‌ରାଃ ଲାବ୍‌ଜା ଅଡ଼ଙ୍ଗଆଃ ତାଇକେନା ।^{୯୯} ଇନ୍‌କୁଆଃ ଚାଆଃଲମ୍ ଆତଃ ତୁଡ଼ଡେୟାଃ, ମାର୍‌ମାରକଆଃ ଚାଆଃଲମ୍ ଆତଃ ତୁଡ଼ଡେୟାଃ ଲେକା ତାଇକେନା । ଏନ୍ ଚାଆଃଲମ୍‌ଡେ ମଣେୟାଁ ମାହଁନା ଜାକେଦ୍ ହଡ଼କଆଃ ନକ୍‌ସାନ୍ ରିକା ନାଗେନ୍ତେ ଇନ୍‌କୁକେ ଆକ୍‌ଡେୟାର୍ ଏମାକାନ୍ ତାଇକେନା ।^{୧୦} ଇନ୍‌କୁଆଃ ଚେତାନ୍‌ରେ ମିଆଁଦ୍ ରାଜା ରାଇଜେ ତାଇନାଏ । ଇନ୍‌ଃ ହୁଆଙ୍ଗାଗାଡ଼ାରେନ୍ ମାରାଙ୍ଗ୍ ଦୁଁଡ଼ ତାନିଃ । ଏବୁୀ ଜାଗାର୍‌ଡେ ଆୟାଃ ନୁଡୁମ୍ ଆବ୍‌ଦୋନ୍ ଆତଃ ଗ୍ରୀକ୍ ଜାଗାର୍‌ରେ ଏନ୍ ନୁଡୁମ୍ ହବଅଃତାନା ଆପୋଲିୟୋନ୍, ଏନାରେୟାଃ ମୁଣ୍ଡି ଜିୟନେନିଃ ।

^{୧୧} ପାହିଲା ଦୁକୁହାସୁ ଚାବାୟାନା, ଏଟାଃ ଆତଃମିଆଁଦ୍ ଦୁକୁହାସୁ ହିକୁଃତାନା ।

^{୧୨} ଏନ୍ତେ ତୁରିୟା ଦୁଁଡ଼ ଆୟାଃ ବିଙ୍ଗୁଲ୍‌ବାଜା ସାଡ଼ିକେଦ୍‌ଡ଼ି, ପାରମେଶ୍ଵାର୍‌ଆଃ ଆୟାର୍‌ରେ ଦହାକାନ୍ ସୋନା ବେଦିରେୟାଃ ଉପୁନିୟା ଦିରିଙ୍ଗ୍‌ହେଡେ ମିଆଁଦ୍ ଲାବ୍‌ଜା ଆୟୁମ୍‌କେଦାଈଙ୍ଗ୍ ।^{୧୩} ଏନ୍ ଲାବ୍‌ଜା ବିଙ୍ଗୁଲ୍‌ବାଜା ସାବାକାଦ୍ ତୁରିୟା ଦୁଁଡ଼କେ କାଜିକିୟା, “ଇଉପ୍ରାଟିସ୍ ନୁଡୁମ୍‌ଃତାନ୍ ମାରାଙ୍ଗ୍ ଗାଡ଼ା ହେପାଦ୍‌ରେ ତଲ୍‌କାନ୍ ଉପୁନିୟା ଦୁଁଡ଼କକେ ରାଡ଼ାତାକମେ ।”^{୧୪} ଏନାମେନ୍ତେ ନେ ସାଲାକାନ୍ ବାରାଷ୍, ମାହଁନା, ଦିନ୍ ଆତଃ ଘାଡ଼ିରେ, ସବେନ୍ ହଡ଼କଆଃ ଆପିହିସା ହଡ଼କକେ ଗଗଏଃ ନାଗେନ୍ତେ ସେକାଡ଼ାକାନ୍ ଏନ୍ ଉପୁନିୟା ଦୁଁଡ଼କକେ ରାଡ଼ାୟାନା ।^{୧୫} ଏନ୍ତେ ଆଇଙ୍ଗ୍ ସାଦମ୍ ଚେତାନ୍‌ରେ ଦୁବ୍‌କେଦ୍‌ଡ଼େ ଲାଡ଼ାଇତାନ୍ ସିପାଇକ ୨୦୦,୦୦୦,୦୦୦ ତାଇକେନାକ ମେନ୍ତେଇଙ୍ଗ୍ ଆୟୁମ୍‌କେଦା ।^{୧୬} ଆତଃ ଆଇଙ୍ଗ୍ ଦାର୍‌ଶାନ୍‌ରେ ନେ'ଲେକାଈଙ୍ଗ୍ ନେଲ୍‌କେଦା, ଇନ୍‌କୁଆଃ କୁଡ଼ାମ୍‌ରେ ମେଡ଼େଦ୍‌ଡ଼େ ବାଇୟାକାନ୍ ତୁସିୟେନ୍‌ଡେୟାଃ, ସେଙ୍ଗେଲ୍ ଲେକା ଆରାଃ, ନିଲିୟା ରାଙ୍ଗ୍, ଆତଃ ସାସାଙ୍ଗ୍ ରାଙ୍ଗ୍ ତାଇକେନା । ସାଦମ୍‌କଆଃ କୁଲା ଲେକା ବହଃ ତାଇକେନା ଆତଃ ଇନ୍‌କୁଆଃ

ମତାଏତେ ସେଙ୍ଗେଲ୍, ସୁକୁଲ୍ ଆତଃ ଗାନ୍ଧାକ୍ ଅତଙ୍ଗଅଃ ତାଇକେନା ।^{୧୮} ଆତଃ ଇନ୍କୁଆଃ ମତାଏତେ ଅତଙ୍ଗଅଃତାନ୍ ସେଙ୍ଗେଲ୍, ସୁକୁଲ୍ ଆତଃ ଗାନ୍ଧାକ୍ ଲେକାନ୍ ନେ ଆପିୟା ଦୁକୁହାସୁତେ ହଡକଆଃ ଆପିହିସା ଗନଏଃ ହବାୟାନା ।^{୧୯} ସାଦମ୍ବକଆଃ ପେଡେଃ, ଇନ୍କୁଆଃ ମେଦ୍ମୁହାଁଡ୍ ଆତଃ ଚାଆଃଲମ୍ରେ ତାଇକେନା । ଇନ୍କୁଆଃ ଚାଆଃଲମ୍ ବିଙ୍ଗକଆଃ ବହଃ ଲେକା ତାଇକେନା ଆତଃ ଏନାତେ ଇନ୍କୁ ହଡକକେ ନକ୍ସାନ୍କ ତାଇକେନାକ ।

^{୨୦} ଦୁକୁହାସୁକରେ କା ଜିୟନ୍କେଦ୍ତେ ସାରେଜାକାନ୍ ହଡକ ଆକଆଃ ଏଡକାନ୍ କାଜି କାମିକଏତେ କାକ ହେୟାତିଙ୍ଗକେଦା । ଇନ୍କୁ ବଙ୍ଗା ସେଝା, ତିଃଇତେ ବାଇୟାକାନ୍ ସୋନା, ରୁପା, ପିତାଲ୍, ଦିରି ଆତଃ ଦାରୁରେୟାଃ ମୁରୁଡକକେ, ଅକନ୍କଟି କାକ ନେଲ୍ ଦାଡିୟା, କାକ ଆୟୁମ୍ ଦାଡିୟା ଆତଃ କାକ ସେସେନ୍ ଦାଡିୟା ଇନ୍କୁକେ ସେଝା ନାଙ୍ଗ କାକ ବାଗିକେଦା ।^{୨୧} ଇନ୍କୁ କା ହେୟାତିଙ୍ଗକେଦ୍ତେ ହଡ ଗଗଏଃ, ଦେଅଁଣା କାମି, ଆପାଙ୍ଗିର୍ କାମି, ଆତଃ କୁମ୍ପୁଡୁ କ୍ଳାମି କାକ ବାଗିକେଦା ।

୧୦

ଦୁଡ୍ ଆତଃ ହୁଡିଙ୍ଗ ମାରି ପୁଥ୍

^୧ ଏତ୍ତେ ଆଇଙ୍ଗ୍ ଆତଃମିଆଁଦ୍ ପେଡେୟାନ୍ ଦୁଡ୍କେ ସିର୍ମାଏତେ ଆଡ୍ଗୁଃତାନ୍ ନେଲକିୟାଇଙ୍ଗ୍ । ଇନିଃ ରିମିଲ୍ରେ ଦାନାଙ୍ଗାକାନ୍ ତାଇକେନା ଆତଃ ଲୁର୍ବିଙ୍ଗ୍* ଆୟାଃ ବହଃରେ ବିୟୁରାକାନ୍ ତାଇକେନା । ଇନିୟାଃ ମେଦ୍ମୁହାଁଡ୍ ସିଙ୍ଗିଲେକା ଆତଃ ଆୟାଃ ବାରାନ୍ କାଟା ସେଙ୍ଗେଲ୍ରାଃ ଖୁଣ୍ଟୁ ଲେକା ନେଲଃ ତାଇକେନା ।^୨ ଇନିୟାଃ ତିଃଇରେ ମିଆଁଦ୍ ହୁଡିଙ୍ଗ ମାରି ପୁଥ୍ ଅଟାଃକାନ୍ ତାଇକେନା । ଇନିଃ ଆୟାଃ ଜମ୍ କାଟାକେ ଦରେୟା ଚେତାନ୍ରେ ଆତଃ ଲେଙ୍ଗା କାଟାକେ ଅତେ ଚେତାନ୍ରେ ଦହକାଦ୍ ତାଇକେନା ।^୩ କୁଲାରାଃ ହୁଁକ୍ରାଅ ଲେକା ଇନିଃ କାଡରିକେଦ୍ତେ କେଡାକେଦା, ଏନ୍ ଲେକାଗି ହୁଁକ୍ରାଅକେଦ୍ତେ ଏୟା ରିମିଲ୍ସାଡିକ ଇନିୟାଃ କେନେଡାରାଃ କାଜିରୁହାଡକେଦାକ ।^୪ ଇନ୍କୁ ଜାଗାଋକେନ୍ତେୟାଃ, ଏନାକେ ଆଇଙ୍ଗ୍ ଅଲେ ନାଗେଡେଇଙ୍ଗ୍

* ୧୦:୧ 10:1 ଇନ୍ଦ୍ରଧନୁ

ସେକାଡ଼ଃ ତାଇକେନା, ମେନ୍ଦ ସିର୍ମାଏତେ ମିଆଁଦ୍ ଲାବ୍‌ଜା ଆୟୁମ୍‌କେଦାଇଙ୍ଗ୍ । ଏନ୍ ଲାବ୍‌ଜା ଆଇଙ୍ଗ୍‌କେ କାଜିକେଦିୟାଁ, “ରିମିଲ୍‌ସାଡ଼ିରେ ଅକଆଃ ଆୟୁମ୍‌କେଦାମ୍, ଏନାକେ ଉକ୍ତୁକେଦତେ ଦହେମେ, ଆଲ୍‌ମେ ଅଲେୟା ।”

୫ ଏନ୍ତେ ଆଇଙ୍ଗ୍ ଅକ ଦୁଁଡ଼କେ ଦରେୟା ଆଡ଼ଃ ଅତେ ଚେତାନରେ ତିଙ୍ଗୁଆକାନ୍ ନେଲ୍‌କାଇ ତାଇକେନାଇଙ୍ଗ୍, ଇନିଃ ଆୟାଃ ଜମ୍ ତିଃଇକେ ସିର୍ମାସାଃତେ ଉଠାଅକେଦା, ୬ ଆଡ଼ଃ ଇନିଃ ସିର୍ମା, ଅତେ, ଦରେୟା, ଆଡ଼ଃ ଏନାରେୟାଃ ସବେନ୍ ବିଷାଏକେ ବାଇୟାକାଦ୍‌ନିଃ ଜାନାଅ ଜାନାଅ ଜାନିଦ୍ ପାର୍‌ମେଶ୍‌ବାର୍‌ଆଃ ନୁଡୁମ୍‌ତେ କିରିୟାକେଦତେ କାଜିକେଦା, “ଆଡ଼ଃ ଦିପିଲି କା ବିଲ୍‌ମାଃଆ ! ୭ ଏୟା ଦୁଁଡ଼ ବିଙ୍ଗୁଲ୍‌ବାଜା ସାଡ଼ିୟାଏ ଇମ୍‌ତା, ପାର୍‌ମେଶ୍‌ବାର୍ ଆୟାଃ ଦାସିକଆଃ ଆଡ଼ଃ ନାବୀକଆଃ ଆୟାର୍‌ରେ, ଅକ ସୁକ୍ତୁକାଜି ଉଦୁବ୍‌କାଦ୍ ତାଇକେନାଏ, ଏନାକେ ପୁରାଏୟାଏ ।”

୮ ଏନ୍ତେ ସିର୍ମାରେୟାଃ ଏନ୍ ଲାବ୍‌ଜା ଆଇଙ୍ଗ୍‌କେ ଆଡ଼ଃମିସା କାଜିକେଦିୟାଁ, “ଜୁ, ଦରେୟା ଆଡ଼ଃ ଅତେ ଚେତାନରେ ତିଙ୍ଗୁଆକାନ୍ ଦୁଁଡ଼ଆଃ ତିଃଇଏତେ ଅଗାଃକାନ୍ ମାରି ପୁଅ୍ ଇଦିମେ ।”

୯ ଆଇଙ୍ଗ୍ ଦୁଁଡ଼ତାଃ ସେନ୍‌କେଦତେ ଏନ୍ ହୁଡ଼ିଙ୍ଗ୍ ମାରି ପୁଅ୍‌କେଇଙ୍ଗ୍ ଆସିକିୟା । ଇନିଃ ଆଇଙ୍ଗ୍‌କେ କାଜିକେଦିୟାଁ, “ନେଆଁ ଇଦିକେଦତେ ଜମେମେ । ଆମାଃ ଲାହିଦ୍ ନାଗେନ୍ତେ ନେଆଁ ମେହେର୍‌ଗିୟା, ମେନ୍ଦ ଆମାଃ ମଚାରେ ନେଆଁ ହୁରୁମ୍‌ସୁକୁ ରାସି ଲେକା ହେଡ଼େମ୍‌ଗିୟା ।”

୧୦ ଆଇଙ୍ଗ୍ ଏନ୍ ହୁଡ଼ିଙ୍ଗ୍ ମାରି ପୁଅ୍‌କେ, ଏନ୍ ଦୁଁଡ଼ଆଃ ତିଃଇଏତେ ଇଦିକେଦତେ ଜମ୍‌କେଦାଇଙ୍ଗ୍ । ଏନା ଆଇଁୟାଃ ମଚାରେ ହୁରୁମ୍‌ସୁକୁ ରାସି ଲେକା ହେଡ଼େମ୍‌କେନା, ମେନ୍ଦ ଉଦ୍‌କେଦ୍ ତାୟମ୍‌ତେ ଲାହିଦ୍ ଭିତାରରେ ମେହେର୍‌ୟାନା । ୧୧ ଏନ୍ତେ ଜେତାଏ ମିହୁଡ଼୍, ଆଇଙ୍ଗ୍‌କେ କାଜିକେଦିୟାଁ, “ପୁରାଃ ଦିଶୁମ୍, ଜାତି, ରାକାମ୍ ରାକାମ୍ ଜାଗାର୍‌ତାନ୍ ହଡ଼୍ ଆଡ଼ଃ ରାଜାକଆଃ ବିଷାଏରେ ପାର୍‌ମେଶ୍‌ବାର୍‌ଆଃ କାନାଜି, ଆମ୍ ଆଡ଼ଃମିସା ସେନ୍‌କେଦତେ ଉଦୁବେମେ ।”

୧୧

ବାରିୟା ଗାଞ୍ଜକିନ୍

୧ ଏନ୍ତେ ଜେତାଏ ମିହୁଡ଼୍ ଆଇଙ୍ଗକେ ସଙ୍ଗସଟା ଲେକା ମିଆଁଦ୍ ସଟା ଏମ୍‌କେଦ୍‌ତେ କାଜିକେଦିୟାଁ, “ଜୁ, ପାରମେଶ୍ୱାର୍‌ଆଃ ମାହିର୍‌ ଆଡ଼ଃ ବେଦି ସଙ୍ଗକେଦ୍‌ତେ, ମାହିର୍‌ରେ ସେଞ୍ଜାତାନ୍ ହଡ଼କକେ ଲେକାକମେ ।^୨ *ମେନ୍‌ଦ୍ ମାହିର୍‌ ଅଡ଼ଃରାଚାକେ ଆଲମ୍ ସଙ୍ଗେୟା । ଚିୟାଃଚି ଏନାଦ୍ ସାଅଁସାର୍ ହଡ଼କକେ ଏମାକାନା ଆଡ଼ଃ ଇନ୍‌କୁ ବାର୍‌ହିସି ବାର୍ ମାହିର୍‌ ଜାକେଦ୍ ନେ ପାବିତାର୍ ନାଗାର୍‌କେ ଆକଆଃ କାଟାଲଃ ଡିକାଏୟାକ ।^୩ ବାସ୍ତା ଲିଜାଃ ତୁସିଙ୍ଗିୟାକାନ୍ ଆଇଁୟାଃ ବାର୍‌ହଡ଼୍ ଗାଞ୍ଜକିନ୍‌କେଇଙ୍ଗ୍ କୁଲ୍‌କେଦ୍‌କିନା । ଇନ୍‌କିନ୍ ୧,୨୬୦ ମାହିର୍‌ ଜାକେଦ୍ ପାରମେଶ୍ୱାର୍‌ଆଃ କାନାଜିକେ ଉଦୁବେୟାକିନ୍ ।”

୪ ଏନ୍ ବାରାନ୍ ଗାଞ୍ଜା ହବାଅଃତାନାକିନ୍, ଅତେରେ ପାରମେଶ୍ୱାର୍‌ଆଃ ଆୟାର୍‌ରେ ଡିଙ୍ଗୁଆକାନ୍ ବାରିୟା ଜାଇତୁନ୍ ଦାରୁ ଆଡ଼ଃ ବାରିୟା ଦିଆ ଦହ ଖୁଣ୍ଟୁ ତାନ୍‌କିନ୍ ।^୫ ଜେତାଏ ଇନ୍‌କିନାଃ ନକ୍‌ସାନ୍ ରିକା ନାଙ୍ଗ୍ ସାନାଙ୍ଗ୍‌ରେଦ୍, ଇନ୍‌କିନାଃ ମଟାଏତେ ସେଙ୍ଗେଲ୍ ଅଡ଼ଙ୍ଗକେଦ୍‌ତେ ବାଇରିକ ଜିୟନଃଆ । ନେ'ଲେକା ଜେତାଏ ଇନ୍‌କିନାଃ ନକ୍‌ସାନ୍ ରିକା ନାଗେନ୍ତେକ ଅଡ଼ଙ୍ଗଅଃଆ, ଇନ୍‌କୁ ଜିୟନଃଆକ ।^୬ ପାରମେଶ୍ୱାର୍‌ଆଃ କାନାଜି ଉଦୁବ୍ ଇମ୍‌ତା ସିମାଏତେ ଦାଆଃ ଆଲକାଏ ଗାମାଏ ମେନ୍ତେ, ସିମାରେୟାଃ ରିମିଲ୍‌କେ ହକା ନାଗେନ୍ତେ, ସେତେଙ୍ଗ୍ ଦାଆଃ ମାୟୋମ୍ ହବାଅଃ ନାଗେନ୍ତେ ଆଡ଼ଃ ଆପାନାଃ ଇଛାସାନାଙ୍ଗ୍ ଲେକା ଅତେରେ ମଣେଁସା ଦୁକୁହାସୁ ହବାଅଃ ନାଗେନ୍ତେ ଇନ୍‌କିନ୍‌କେ ଆକ୍‌ତେୟାର୍ ଏମାକାନା ।

୭ *ଇନ୍‌କିନ୍ କାନାଜି ଉଦୁବ୍ ଚାବାକେଦ୍ ତାୟମ୍‌ତେ, ହୁଆଙ୍ଗ୍‌ଗାଡ଼ାଏତେ ମିଆଁଦ୍ ଜାଁତୁ ହିଜୁଃକେଦ୍‌ତେ, ଇନ୍‌କିନ୍‌ଲଃ ଲାପ୍‌ଡ଼ାଇ ରିକାଏୟାଏ । ଇନିଃ ଇନ୍‌କିନ୍‌କେ ହାରାଅକେଦ୍‌ତେ ଗଏଃକିନା । † ଅକ ମାରାଙ୍ଗ୍ ନାଗାର୍‌ରେୟାଃ ହରାରେ ପ୍ରାଭୁ

☆ ୧୧:୨ ୧୧:୨ ଲୁକ ୨୧:୨୪. ☆ ୧୧:୭ ୧୧:୭ ଉତ୍କଳ କାଜି ୧୩:୫-୭; ୧୭:୮.

କୁଶ୍ମରେ କିଲ୍ଲକାନ ତାଇକେନା, ଏନ୍ତାରେ ଇନ୍ଦ୍ରିନୀଃ ଗନଏଃ ହତ୍ତଂ ଉତ୍ତୁଗାକାନ ତାଇନା । ଏନ୍ ମାରାଙ୍ଗ ନାଗାରକେ ଆମ୍ବିକ୍ ଲେକାତେ ସୋଦମ୍ ରାଏ ମିସାର ମେନ୍ତେ କାଜିୟାଃକ । ୯୮ ସବେନ୍ ଦିଶ୍ଟୁମ୍ରେନ୍ ହତ୍ତକ, କିଲିକ, ଏଟାଃ ଏଟାଃ ଜାଗାର୍ତାନକ, ଆତଃ ଜାତିରେନ୍ ହତ୍ତକ ଆପିୟା ଆତଃ ଆଧା ମାହାଁ ଜାକେଦ୍ ଇନ୍ଦ୍ରିନୀଃ ଗନଏଃ ହତ୍ତମକ ନେଲେୟା ଆତଃ ଇନ୍ଦ୍ରିନିକେ ତପାଗାଡ଼ାରେ ଜେତାଏ କାକ ତପାକିନା । ୧୦ ନେ ବାରାନ୍ଦ୍ରିନୀଃ ଗନଏଃ ହରାତେ ଅତେଦିଶ୍ଟୁମ୍ରେନ୍ ହତ୍ତକ ରାସ୍ତକାନାଃକ, ରିଜ୍ଜରାଙ୍ଗକେଦ୍ତେ ମିହୁଡ୍ ଆତଃମିହୁଡ୍ତାଃତେ ଦାନକ କୁଲେୟା । ଚିଆଠି ଏନ୍ ନାବୀକିନୀଃ ହରାତେ ଅତେଦିଶ୍ଟୁମ୍ରେନ୍ ହତ୍ତକ ପୁରାଃଗି ଦୁକୁକ ନାମେ ତାଇକେନା । ୧୧ ମେନ୍ଦ୍ ଆପିୟା ଆତଃ ଆଧା ମାହାଁ ତାୟମ୍ତେ ପାରମେଶ୍ଵାର୍ତାଃଏତେ ଜୀଦାନ ଏମଃରେୟାଃ ହୟ ହିଜୁଃକେଦ୍ତେ ଇନ୍ଦ୍ରିନୀଃ ହତ୍ତମରେ ବଲୟାନା ଆତଃ ଇନ୍ଦ୍ରିନ୍ ବିରିଦ୍କେଦ୍ତେ ତିଜ୍ଞୁୟାନାକିନ୍ । ଅକନକ ନେଆଁ ନେଲ୍କେଦାକ, ଇନ୍ଦ୍ରିନ୍ ପୁରାଃଗି ବରକେଦାକ । ୧୨ ଆତଃ ଏନ୍ ବାରାନ୍ ନାବୀକିନ୍ ମିଆଁଦ୍ ଲାବ୍ଜା ସିର୍ମାଏତେ କାଜିତାନ ଆୟୁମ୍କେଦାକିନ୍, “ନେତାଃତେ ହିଜୁଃବେନ୍ !” ଇନ୍ଦ୍ରିନୀଃ ବାଈରିକ ନେଲ୍ ତାଇକେନ୍ ଇମ୍ତାଗି ଇନ୍ଦ୍ରିନ୍ ରିମିଲ୍ରେ ସିର୍ମାତେକିନ୍ ରାକାବ୍ୟାନା । ୧୩ ☆ଏନ୍ ଦିପିଲିରେ ପୁରାଃଗି ଅତେ ଏକ୍ଲ୍ୟାଅୟାନା, ନାଗାର୍ରେୟାଃ ଗେଲ୍ହିସା ଜିୟନ୍ୟାନା ଆତଃ ଅତେ ଏକ୍ଲ୍ୟାଅୟାନ୍ ହରାତେ ୭,୦୦୦ ହାଜାର୍ ହତ୍ତକ ଗଏଃୟାନାକ । ଜୀନିଦ୍ ତାଇକାନ ହତ୍ତକ ବରତେ ସିର୍ମାରେନ୍ ପାରମେଶ୍ଵାର୍ଆଃ ମାନାରାଙ୍ଗ୍ ରିକାକେଦାକ ।

୧୪ ବାରିୟା ସାଙ୍ଗାଟ୍ ଚାବାୟାନା, ମେନ୍ଦ୍ ଆପିୟା ସାଙ୍ଗାଟ୍ ଜାଲ୍ଦି ହିଜୁଃତାନା ।

ଏୟା ବିଜ୍ଞୁଲ୍

୧୫ ଏନ୍ତେ ଏୟା ଦୁଁଡ୍ ଆୟାଃ ବିଜ୍ଞୁଲ୍ ସାଡ଼ିକେଦାଏ, ଆତଃ ସିର୍ମାରେ କାଉରିକେଦ୍ତେ କାଜିତାନ ମିଆଁଦ୍ ଲାବ୍ଜା ଆୟୁମ୍ୟାନା, “ଆବୁଆଃ ପ୍ରାଭୁ ଆତଃ ଆୟାଃ ଖ୍ରୀଷ୍ଟ୍ ଅତେଦିଶ୍ଟୁମ୍ରେ ରାଇଜେରେୟାଃ

☆ ୧୧:୧୩ ୧୧:୧୩ ଉତ୍କଳ କାଜି ୭:୧୨; ୧୭:୧୮.

ଆକ୍ତେୟାର ନାହାଁଣଦ ଆୟାଃ ଆପ୍ନାଃ ତିଃଈରେ ମେନାଃ,
 ଆତଃ ଇନିଃ ଜାନାଅ ଜାନାଅ ରାଈଜେୟାଏ । ^{୧୭} ଏନ୍ତେ
 ପାର୍ମେଶ୍ୱାର୍ଆଃ ଆୟାରରେ ଆକଥାଃ ଆପ୍ନାଃ ଆପ୍ନାଃ
 ରାଜଗାଦିରେ ଦୁବ୍ତାନ ବାରହିସି ଉପୁନିୟା ପ୍ରାଚିନ୍ଦକ ବହଃ
 ତିରୁବ୍ବକେଦ୍ତେ ପାର୍ମେଶ୍ୱାର୍ବକେ ଜହାର୍ବକିୟାକ ଆତଃ ଆୟାଃ
 ସୁନୁସାର୍ ରିକାତାନଲଃ, ^{୧୭} କାଜିକେଦାକ,
 “ହେ ପ୍ରାଭୁ, ସବେନ୍ ପେଡ୍ଡେୟାନ୍ ପାର୍ମେଶ୍ୱାର୍, ଆମ୍ ତାଇକେନ୍ନିଃ
 ଆତଃ ମେନାମେନିଃ ତାନମେ,
 ଆଲେ ଆମ୍ବକେ ଧାନଧାବାଦ୍ ଏମାମେତାନାଲେ, ତିଆଃଚି ଆମ୍ ପୁରାଃ
 ପେଡ୍ଡେଃଡେ
 ରାଈଜେ ନାଗେନ୍ତେମ୍ ଏଟେଦ୍‌କାଦା ।
^{୧୮} ସାଅଁସାର୍ ହଡ୍‌କ ଖ୍ୱତ୍ତେ ପେରେଃୟାନାକ,
 ତିୟାଃଚି ଆମାଃ ଖ୍ୱରାଃ ଦିପିଲି ହିଜୁଃକାନା,
 ଗଜାକାନ୍ଦକ ବିଚାରଃଆକ ।
 ଆମାଃ ଦାସିକକେ, ନାବାକକେ, ପାବିତାର୍ ହଡ୍‌କକେ ଆତଃ
 ଅକନ୍ଦକ ଆମ୍ବକେ ବରମେତାନ୍
 ହୁଡ୍‌ଜ୍ ଆତଃ ମାରାଜ୍ ସବେନ୍‌କକେ ନାଲା ଏମ୍‌ରେୟାଃ
 ଆତଃ ଅକନ୍ଦକ ଅତେଦିଶୁମ୍‌କେ ଜିୟନେୟାକ, ଇନ୍‌କୁକେ ହଗି
 ଜିୟନଃରେୟାଃ ନେଡା ସେଟେରାକାନା ।”
^{୧୯} ✽ସିର୍ମାରେ ତାଇନଃତାନ୍ ପାର୍ମେଶ୍ୱାର୍‌ଆଃ ମାନ୍ଦିର୍ ନିଜୟାନା
 ଆତଃ ମାନ୍ଦିର୍ ଭିତାରରେ ରାଜିନାମାରେୟାଃ ବାକ୍‌ସା ନେଲଃୟାନା ।
 ଏନ୍ତେ ରିମିଲ୍ ହିଚିର୍‌କେଦାଏ, ଠେର୍‌କେଦାଏ, ଅତେ ଏକ୍‌ଲାଅୟାନା
 ଆତଃ ପୁରାଃଗି ଆରିଲ୍ ଉୟୁଃୟାନା ।

୧୨

ମିଆଁଦ୍ କୁଡ୍ଡି ଆତଃ ମାରାଜ୍ ବିଜ୍

^୧ ଏନ୍ତେ ସିର୍ମାରେୟାଃ ରିମିଲ୍‌ରେ ମିଆଁଦ୍ ଆକ୍‌ଦାନ୍ଦାଅ ଚିହ୍ନାଁ
 ନେଲଃୟାନା, ଏନ୍ତାଃରେ ମିଆଁଦ୍ କୁଡ୍ଡି ସିଜ୍‌ରାଃ ରାଁପ୍ ଲେକା
 ତୁସିଜ୍‌ୟାକାନ୍ ତାଇକେନାଏ । ଆୟାଃ କାଟା ଲାତାରରେ ଚାଣ୍ଡୁ
 ଆତଃ ବହଃରେ ଗେଲ୍‌ବାର୍ ଇପିଲ୍‌ରାଃ ମୁକୁଟ୍ ତାଇକେନା । ^୨ ଏନ୍

✽ ୧୧:୧୯ ୧୧:୧୯ ଉତ୍କୁଦ୍ କାଜି ୮:୫; ୧୭:୧୮; ଉତ୍କୁଦ୍ କାଜି ୧୭:୨୧.

କୁଡ଼ି ହାମ୍ବାଲରୋଞ୍ଜାକାନ ତାଇକେନାଏ ଆତଃ ହନ୍ ଜାନାମଃରେୟଃ
ଦୁକୁରେ ହାସୁଇ ନାମେ ତାଇକେନା ।

୩ ସିର୍ମାରେୟଃ ରିମିଲ୍ରେ ଆତଃମିଆଁଦ୍ ଚିହ୍ନା ନେଲଃୟାନା
। ଏନ୍ତାଃରେ ଆଇଙ୍ଗ୍ ଆରାଃ ରାଙ୍ଗ୍ରେନ୍ ମିଆଁଦ୍ ମାରାଙ୍ଗ୍ ବିଙ୍ଗ୍
ନେଲ୍କିୟାଇଙ୍ଗ୍, ଇନିୟଃ ଏୟା ବହଃ, ଗେଲ୍ ଦିରିଙ୍ଗ୍ ଆତଃ
ମିପିଆଦ୍ ବହଃରେ ମିପିଆଦ୍ ମୁକୁର୍ ତାଇକେନା । ୪ ଇନିଃ
ଆୟଃ ଚାଆଃଲମ୍ତେ ସିର୍ମାରେନ୍ ଆପି ହିସା ଇପିଲ୍କକେ ଅତେରେ
ହୁରାଙ୍ଗ୍କେଦକଆ । ଏନ୍ କୁଡ଼ିରାଃ ହନ୍ ଜାନାମୟାନ୍ତି, ଇନିଃକେ
ଉଦି ନାଗେନ୍ତେ ମାରାଙ୍ଗ୍ ବିଙ୍ଗ୍ ଏନ୍ କୁଡ଼ିଆଃ ଆୟାରରେ ତିଙ୍ଗୁୟାନା
। ୫ ଏନ୍ତେ ଏନ୍ କୁଡ଼ି, କଡ଼ାହନ୍ ଜାନାମକିୟାଏ, ଇନିଃ ସବେନ୍
ଦିଶୁମକେ ମିଆଁଦ୍ ମେଡେଦ୍ ସଗାତେ ରାଇଜେୟା । ମେନ୍ଦ୍
ଏନ୍ ହନ୍କେ ଛଡ଼ାଅ ଇଦିକେଦ୍ତେ ପାର୍ମେଶ୍ଵାର୍ଆଃ ରାଜ୍ଗାଦି
ଆୟାର୍ତେ ଇଦିୟାନା । ୬ ଆତଃ ଏନ୍ କୁଡ଼ି ବିରତେ ନିରୟାନା
। ଏନ୍ତାଃରେ ୧,୨୭୦ ମାହାଁ ଜାକେଦ୍ ଆୟଃ ତାଇନଃ ନାଗେନ୍ତେ
ପାର୍ମେଶ୍ଵାର୍ ଠାୟାଦ୍ ବାଇକେଦାଏ ।

୭ ☆ଏନ୍ତେ ସିର୍ମାରେ ମାପାଃତୁପୁଇଙ୍ଗ୍ ଏନେଟେଦ୍ୟାନା ।
ମିଖେଲ୍ ଆତଃ ଆୟଃ ଦୁଁଡକ, ଏନ୍ ମାରାଙ୍ଗ୍ ବିଙ୍ଗ୍ ଆତଃ
ଆଇଃକକେ ଅତଙ୍ଗ୍ତାନ ଦୁଁଡକଲଃ ଲାପାଡ଼ାଇୟାନାକ । ୮ ମେନ୍ଦ୍
ଲାପାଡ଼ାଇରେ ମାରାଙ୍ଗ୍ ବିଙ୍ଗ୍ ଆତଃ ଆଇଃକକେ ଅତଙ୍ଗ୍ତାନ
ଦୁଁଡକ କାକ ଜିତାଅ ଦାଡ଼ିୟାନା ଆତଃ ଇନ୍କୁ ସିର୍ମାରେ ଠାୟାଦ୍
କାକ ନାମକେଦା । ୯ ☆ଏନ୍ ମାରାଙ୍ଗ୍ ବିଙ୍ଗ୍ ହବାଅଃତାନାଏ, ସବେନ୍
ଅତେଦିଶୁମକେ ବେଦାକାଦ୍ ମାରି ମାରାଙ୍ଗ୍ ବିଙ୍ଗ୍, ସାଏତାନ୍; ଆୟଃ
ଦୁଁଡ ଆତଃ ପେଡେୟାନ୍ ଝୁଣ୍ଡଲଃ ଅତେଦିଶୁମରେ ହୁରାଙ୍ଗ୍ୟାନା ।

୧୦ ଏନ୍ତେ ଆଇଙ୍ଗ୍ ସିର୍ମାରେ ପୁରାଃ କାଉରିକେଦ୍ତେ ମିଆଁଦ୍
ଲାବ୍ଜା ଆୟୁମକେଦାଇଙ୍ଗ୍, “ନାହାଁଃଦ ପାର୍ମେଶ୍ଵାର୍ଆଃ
ଜାଉବାଞ୍ଚାଅ ସେରେରାକାନା । ଆୟଃ ପୁରାଃ ପେଡେଃ, ରାଇଙ୍ଗ୍
ଆତଃ ଆୟଃ ମାସିଆଃ ଆକ୍ତେୟାର୍ ଉଦୁବାକାନା । ଅକ
ଫାଁସରିରେ ଉୟୁଃ ନାଙ୍ଗ୍ ନିଦାସିଙ୍ଗି ପାର୍ମେଶ୍ଵାର୍ଆଃ ଆୟାରରେ
ତିଙ୍ଗୁକେଦ୍ତେ, ଆବୁଆଃ ହାଗା ମିଶିକଆଃ ବିରୁଧ୍ରେ ହସଡ଼

କାଜିନିଃ ତିସିଙ୍ଗ୍ ସିର୍ମାଏତେ ହୁରାଙ୍ଗ୍ ଏଣ୍ଡାଃକାନା । ୧୧ ମିଣ୍ଡିହନ୍ଥାଃ
 ମାୟୋମ୍‌ରାଃ ପେଡେଃତେ ଆତଃ ଆକଥାଃ ଗାଞ୍ଜାରେୟାଃ କାଜି
 ଉଦୁବ୍ ହରାତେ ଆରୁଥାଃ ହାଗା ମିଶିକ ଜିତାଅକାନାକ, ଆତଃ
 ଗନିଏଃ ଜାକେଦ୍ ଇନ୍‌କୁ ଆକଥାଃ ଆପ୍‌ନାଃ ଜୀଉକେ କା
 ଦୁଲ୍ଲାଡକେଦ୍‌ତେ ଜୀଉ ଏମ୍ ନାଗେନ୍ତେ ସେକାଡାକାନ୍ ତାଇକେନାକ
 । ୧୨ ଏନାତେ ସିର୍ମା ଆତଃ ସିର୍ମାରେ ତାଇନ୍‌ତାନ୍ ସବେନ୍‌କ
 ରାସ୍‌କାଅଃପେ । ମେନ୍‌ଦ ହାଏ, ଅତେ ଆତଃ ଦରେୟାରେନ୍
 ସବେନ୍‌କ, ଆପେୟାଃ ଦୁରଦାସା ଚିମିନ୍ ବରଞ୍ଜାନଗିଆ ! ନାହ୍ନାଃ
 ସାଏତାନ୍ ଆପେତାଃରେ ପୁରାଃଗି ଖୁସ୍‌କାନା, ଚିଆଃଚି ଇନିଃ
 ସାରିତାନାଏ ଆୟାଃ ନେତା ପୁରାୟାନ୍‌ଗିଆ ।”

୧୩ ଏନ୍ ମାରାଙ୍ଗ୍ ବିଙ୍ଗ୍ ଆପାନ୍‌କେ ଅତେରେ ହୁରାଙ୍ଗ୍‌କାନ୍
 ନେଲ୍‌କେଦ୍‌ତେ ଏନ୍ ହନ୍ ଜାନାମାକାଇ କୁଡିଆଃ ଦୟା ଦୟା
 କୁଦାଅକିୟାଏ । ୧୪ ଏନ୍ ବିଙ୍ଗ୍‌ତାଃଏତେ ବାଞ୍ଚାଅଃ ନାଗେନ୍ତେ,
 ଏନ୍ କୁଡିକେ ବାଜି ଅଡେରାଃ ବାରିୟା ମାପ୍‌ରାଙ୍ଗ୍ ଆପ୍‌ରବ୍
 ଏମ୍‌ୟାନା । ଏନାଃଲଃ ଇନିଃ ବିରତେ ଆଫିରୟାନା ଆତଃ ଏନ୍ତାଃରେ
 ଆପିୟା ଆତଃ ଆଧା ବାରାଷ୍ ଜାକେଦ୍ ବୁଗିଲେକା ତାଇନ୍‌କେଦ୍‌ତେ
 ଆସୁଲ୍‌ୟାନା । ୧୫ ଏନ୍ତେ ଏନ୍ କୁଡି ଗାଡାରେୟାଃ ଦାଆଃରେ
 ଆଡୁଃକାଏ ମେନ୍ତେ ମାରାଙ୍ଗ୍ ବିଙ୍ଗ୍ ଆୟାଃ ମଚାଏତେ ଚୁଡା ଦାଆଃ
 ପୁରକାଅ ଅଡଙ୍‌କେଦାଏ । ୧୬ ମେନ୍‌ଦ ଏନ୍ କୁଡିକେ ବାଞ୍ଚାଅ
 ନାଗେନ୍ତେ ଅତେ ଆୟାଃ ମଚା ଅଟାଃକେଦ୍‌ତେ, ମାରାଙ୍ଗ୍ ବିଙ୍ଗ୍‌ରାଃ
 ମଚାଏତେ ଅଡଙ୍‌ଅଃତାନ୍ ସବେନ୍ ଚୁଡା ଦାଆଃ ନୁଁ ଆଞ୍ଜେଦ୍ କେଦାଏ
 । ୧୭ ଏନାରେ ମାରାଙ୍ଗ୍ ବିଙ୍ଗ୍ ଏନ୍ କୁଡି ଚେତାନ୍‌ରେ ପୁରାଃଗି
 ଖୁସ୍‌ୟାନା ଆତଃ ଆୟାଃ କିଲିରେନ୍ ସାରେଜାକାନ୍ ହନ୍‌କଲଃ
 ଲାପ୍‌ଡାଇ ନାଗେନ୍ତେ ଅଡଙ୍‌ୟାନା । ଅକନ୍‌କ ପାର୍‌ମେଶ୍‌ୱାରିଆଃ
 ଆନ୍‌ଚୁକ ମାନାତିଙ୍ଗ୍ ତାନା ଆତଃ ଯୀଶୁଆଃ ବିଷାଏରେ ଗାଞ୍ଜା
 ଏମାଃକ, ଇନ୍‌କୁ ଆୟାଃ ହନ୍‌କ ତାନ୍‌କ । ୧୮ ଆତଃ ଏନ୍ ମାରାଙ୍ଗ୍ ବିଙ୍ଗ୍
 ଦରେୟା ଗେନାରେ ଡିଙ୍ଗ୍‌ୟାନା ।

୧୩

ବାରିୟା ଜାତୁ

୧ ଏକେ ଆଇଙ୍ଗ ଦରେୟାଏତେ ମିଆଁଦ ଜାଁତୁକେ ରାକାବତେୟାଃ ନେଲ୍‌କିୟାଇଙ୍ଗ । ଇନିୟାଃ ଗେଲ୍ ଦିରିଙ୍ଗ ଆତଃ ଏୟା ବହଃ ତାଇକେନା । ମିପିଆଦ୍ ଦିରିଙ୍ଗକରେ ମିପିଆଦ୍ ମୁକୁଟ୍ ଆତଃ ମିପିଆଦ୍ ବହଃକରେ ପାର୍‌ମେଶ୍ଵାରକେ ନିୟାଈ ମିପିଆଦ୍ ନୁତୁମ୍ ଅଲ୍‌କାନ୍ ତାଇକେନା । ୯ ଆଇଙ୍ଗ ନେଲ୍‌କାଇ ଜାଁତୁ କୁଲା ଲେକାଏ ତାଇକେନା, ଇନିୟାଃ କାଟା ଭାଲୁରାଃ କାଟା ଲେକା ଆତଃ ଇନିୟାଃ ମଟା ସିଂହରାଃ ମଟା ଲେକା ତାଇକେନା । ଏନ୍ ମାରାଙ୍ଗ୍ ବିଙ୍ଗ୍ ଦରେୟା ଗେନାରେ ତାଇକେଦ୍‌ତେ, ଆୟାଃ ସିବେନ୍ ପେଡ଼େଃ ରାଜ୍‌ଗାଦି ଆତଃ ମାରାଙ୍ଗ୍ ଆକ୍‌ତେୟାର୍ ଆଇଃକ୍‌କେ ଏମ୍‌ୟାନା । ୧୦ ଜାଁତୁରାଃ ମିଆଁଦ୍ ବହଃ ଥୁମ୍‌ଗାରି ଠଗାକାନ୍ ଲେକା ଆଟ୍‌କାରଃ ତାଇକେନା । ମେନ୍‌ଦ ଘାଅକାନ୍‌ତାଃ ବୁଗିକାନ୍ ତାଇକେନା ଆତଃ ଗଟା ଅତେଦିଶୁମ୍‌ରେ ସିବେନ୍‌କ ଆକ୍‌ଦାୟାଅକେଦ୍‌ତେ ଜାଁତୁକେ ଅତଙ୍ଗକିୟାକ । ୪ ଆତଃ ସିବେନ୍‌କ ଏନ୍ ମାରାଙ୍ଗ୍ ବିଙ୍ଗ୍‌କେ ସୁନୁସାରକିୟାକ, ଚିଆଃଟି ଇନିଃ ଆୟାଃ ପେଡ଼େଃ ଏନ୍ ଜାଁତୁକେ ଏମ୍‌କିୟା । ଇନ୍‌କୁ ଜାଁତୁକେହଗି ସୁନୁସାରକେଦ୍‌ତେ କାଜିକେଦାକ, “ଅକଏ ନେ ଜାଁତୁ ଲେକାଏ ହବାଦାଡ଼ିୟାଆ ? ଅକଏ ଆୟାଃଲଃ ଲାଡ଼ାଇ ଦାଡ଼ିୟାଏ ?”

୫ ଏନ୍ ଜାଁତୁକେ ପାର୍‌ମେଶ୍ଵାରଆଃ ବିରୁଧ୍‌ରେ ହିଲାଙ୍ଗ୍ କାଜି ଆତଃ ନିୟାଈ କାଜିକ କାଜି ନାଗେନ୍ତେ ଆତୁକାନା, ଆତଃ ବାହ୍‌ସି ବାହ୍ ମାହ୍‌ନା ଜାକେଦ୍ ଆକ୍‌ତେୟାର୍‌ରେ ନାଗେନ୍ତେ ଇନିଃକେ ଆତୁକାନ୍ ତାଇକେନା । ୬ ଏନ୍ ଜାଁତୁ ପାର୍‌ମେଶ୍ଵାରଆଃ ବିରୁଧ୍‌ରେ କାଜି ଏଟେଦ୍‌କେଦ୍‌ତେ, ଆୟାଃ ନୁତୁମ୍, ଆୟାଃ ତାଇନଃ ଠାୟାଦ୍, ଆତଃ ସିମ୍‌ରେ ତାଇନ୍‌ତାନ୍ ସିବେନ୍‌କକେ ନିୟାକେଦ୍‌କଥା । ୭ ପାର୍‌ମେଶ୍ଵାରଆଃ ହଡ଼କଆଃ ବିରୁଧ୍‌ରେ ଲାଡ଼ାଇକେଦ୍‌ତେ ଇନ୍‌କୁକେ ହାରାଅ ନାଗେନ୍ତେ ଇନିଃକେ ଆକ୍‌ତେୟାର୍ ନାମ୍‌ୟାନା ଆତଃ ମିପିଆଦ୍ କିଲି, ଦିଶୁମ୍, ଏଟାଃ ଏଟାଃ ଜାଗାର୍‌ତାନ୍ ଆତଃ ଜାଡ଼ିକଆଃ ଚେତାନ୍‌ରେ ଇନିଃକେ ଆକ୍‌ତେୟାର୍ ଏମ୍‌ୟାନା । ୮ ଅତେଦିଶୁମ୍‌ରାଃ ଏନେଟେଦ୍ ସିଦାରେ ଅକନ୍ ହଡ଼କଆଃ ନୁତୁମ୍ ଦାଣ୍ଟି ରାକାବଃତାନ୍ ମିଶ୍ଠିହନ୍‌ଆଃ ଜୀଦାନ୍ ପୁଥ୍‌ରେ ଅଲ୍‌କାନ୍

☆ ଶାଃ:୧ ଶାଃ:୧ ଉତ୍କଳ କାଜି ୧୭:୩,୭-୧୨.

ତାଙ୍କକେନା, ଇନ୍ଦ୍ରକୁକେ ବାଗିକେଦତେ ଅତେଦିଶୁମ୍ରେନ୍ ଏଟାଃ ସବେନ୍ଦକ ଏନ୍ ଜାଁତୁରାଃ ସୁନ୍ନୁସାର୍ ରିକାଏୟାକ ।

୯ ଆୟୁମ୍ ନାଗେନ୍ତେ ଲୁତୁର୍ ମେନାଃନିଃ ଆୟୁମେକାଏ ।
୧୦ ପାର୍ମେଶ୍ଵାର୍ଆଃ ସାନାଙ୍ ଲେକାତେ, ଜେତାଏ ତଲ୍ ଇଦିୟଃନିଃ ସାର୍ତ୍ତିଗି ତଲ୍ ଇଦିୟଃଆ । ଜେତାଏ ଏଟାଃନିଃକେ ତାରାଉଡ଼ିତେ ମାଆଃ ଗଜିନିଃ, ଆଇଃକ୍ତି ତାରାଉଡ଼ିତେ ମାଆଃ ଗଜଃଆ । ନେ ଦିପିଲିରେ ପାର୍ମେଶ୍ଵାର୍ଆଃ ହଡ଼କ ନାଗେନ୍ତେ ଧୂରାଜ୍ ଆତଃ ବିଶ୍ଵାସ୍ ତାଇନଃଗି ଲାଗାତିଙ୍ଘ୍ୟାଃ ।

୧୧ ଏନ୍ତେ ଆଇଙ୍ ଆତଃମିଆଁଦ୍ ଜାଁତୁକେ ଅତେହେତେ ଚେତାନତେ ବିରିଦ୍ ରାକାବତେୟାଃ ନେଲ୍କିୟାଈଙ୍ । ମିଶ୍ଵିହନ୍ଆଃ ଦିରିଙ୍ ଲେକାଗି ଇନିୟାଃ ବାରିୟା ଦିରିଙ୍ ତାଇକେନା ଆତଃ ଇନିଃ ମାରାଙ୍ ବିଙ୍ ଲେକାଏ ଜାଗାର୍ତାନ୍ ତାଇକେନା । ୧୨ ଏନ୍ ଏଟାଃ ଜାଁତୁ ପାହିଲା ଜାଁତୁରାଃ ନେପେଲ୍ରେ ଆୟାଃ ପେଡ଼େଃକେ ଉଦୁବ୍କେଦା । ଆତଃ ଏନ୍ ପାହିଲା ଜାଁତୁ, ଅକଏୟାଃତି ଘାଅ ବୁଗିୟାକାନ୍ ତାଇକେନା, ଇନିୟାଃ ସୁନ୍ନୁସାର୍ ରିକା ନାଗେନ୍ତେ ଅତେଦିଶୁମ୍ରେନ୍ ସବେନ୍ଦକକେ ଜାବାର୍ଜାସ୍ତିକେଦକଆ । ୧୩ ଏଟାଃ ଜାଁତୁ ପୁରାଃ ଆକ୍ଦାନ୍ଦାଅ କାମିକଏ କାମିକେଦା । ସବେନ୍ଦକଆଃ ଆୟାର୍ରେ ସିର୍ମାଏତେ ଅତେରେ ସେଙ୍ଗେଲ୍ଗାମା ଗାମାଈଚିକେଦାଏ । ୧୪ ଆତଃ ପାହିଲା ଜାଁତୁରାଃ ତାଇନଃ ଦିପିଲିରେଗି, ନେ'ଲେକା ପୁରାଃଗି ଆକ୍ଦାନ୍ଦାଅ କାମିକ ରିକାକେଦତେ ଅତେଦିଶୁମ୍ରେନ୍ ସବେନ୍ଦକକେ ବେଦାକେଦକଆ । ତାରାଉଡ଼ିତେ ମାଆଈକାନ୍ରେୟ, ବାଞ୍ଚାଅକାନ୍ ପାହିଲା ଜାଁତୁରାଃ ମାଇନଃ ନାଙ୍ ଆୟାଃ ମିଆଁଦ୍ ମୁରୁଡ଼ ବାଇ ନାଗେନ୍ତେ ଏଟାଃ ଆତଃମିଆଁଦ୍ ଜାଁତୁ ହଡ଼କକେ ଆରୁକେଦକଆ । ୧୫ ପାହିଲା ଜାଁତୁରାଃ ମୁରୁଡ଼ ଜେ'ଲେକା ଜାଗାର୍ ଦାଡ଼ିୟାଏ ଆତଃ ଏନ୍ ମୁରୁଡ଼କେ କାକ ସୁନ୍ନୁସାର୍ତାନ୍ ହଡ଼କକେ ଜେ'ଲେକା ଗନଏଃ ସାଜାଇ ଏମଃଆ, ଏନାମେନ୍ତେ ଏଟାଃ ଆତଃମିଆଁଦ୍ ଜାଁତୁକେ ଏନ୍ ମୁରୁଡ଼ରେ ଜାଉ ଏମ୍ରେୟାଃ ଆକ୍ତେୟାର୍ ଏମ୍ୟାନା । ୧୬ ହୁଡ଼ଙ୍ ଆତଃ ମାରାଙ୍, ଗାରିବ୍ ଆତଃ କିର୍ସାଣ୍, ଦାସିକାନ୍ ଆତଃ କା ଦାସିକାନ୍, ସବେନ୍ଦକକେ ଇନ୍ଦ୍ରକୁଆଃ ଜମ୍ଡିଃଇରେ ତାଏ ମଲଙ୍ରେ ମିଆଁଦ୍ ଖଦାକାନ୍ ଚିହ୍ନା ଦହ ନାଗେନ୍ତେ ଇନିଃ

ଜୀବାରଜ୍ୟାସ୍ତି କେଦକଥାଏ । ୧୭ ଅକ ହଡ଼ ଏନ୍ ଜାଁତୁରାଃ ନୁତୁମ୍ ଚାଏ
ଆୟାଃ ନୁତୁମ୍‌ରାଃ ନାମ୍ବାର୍ କାଏ ଖଦାକାନ୍‌ଗିୟା, ଇନିଃ ଜେତ୍‌ନାଃ
କିରିଙ୍ଗ୍ ଚାଏ ଆଖିରିଙ୍ଗ୍ କାଏ ଦାଡ଼ିୟା ।

୧୮ ନେତାଃରେ ସେଣାଁ ତାଇନଃ ଲାଗାତିଙ୍ଗ୍‌ୟାଃ । ଏନ୍ ଜାଁତୁରାଃ
ନାମ୍ବାର୍ ସେଣାଁନ୍ ହଡ଼ ଏସ୍‌କାର୍ ସାରି ଦାଡ଼ିୟାକ । ଚିଆଃତି ନେ
ନାମ୍ବାର୍ ମିଆଁଦ୍ ହଡ଼ରାଃ ନାମ୍ବାର୍ ତାନାଃ, ଏନା ହବାଅଃତାନା ୨୭୭
।

୧୪

ମିଣ୍ଡିହନ୍ ଆତଃ ଆଇଃକକେ ଅତଙ୍ଗ୍‌ତାନକ

୧୨ ଏନ୍ଦ୍ରେ ଆଇଙ୍ଗ୍ ଏନ୍ ମିଣ୍ଡିହନ୍‌କେ ସିନାଇ ବୁରୁରେ ତିଙ୍ଗ୍‌ଆକାନ୍
ନେଲ୍‌କିୟାଇଙ୍ଗ୍ ଆତଃ ଇନିଃଲଃ ୧୪୪,୦୦୦ ହଡ଼କ ତାଇକେନାକ
। ଇନ୍‌କୁଆଃ ମଲ୍‌ଙ୍ଗ୍‌ରେ ମିଣ୍ଡିହନ୍ ଆତଃ ଆୟାଃ ଆପୁଆଃ ନୁତୁମ୍
ଅଲ୍‌କାନ୍ ତାଇକେନା । ୨ ଏନ୍ଦ୍ରେ ଆଇଙ୍ଗ୍ ପୁରାଃଗି ଲିଙ୍ଗ୍‌ୟାତାନ୍
ସେତେଙ୍ଗ୍ ଦାଆଃରାଃ ସାଡ଼ି ଆତଃ ରିମିଲ୍ ସାଡ଼ି ଲେକା ମିଆଁଦ୍
ସାଡ଼ି ସିମାଏତେଇଙ୍ଗ୍ ଆୟୁମକେଦା । ବାନାମ୍ ସାଡ଼ିତାନକଆଃ
ବାନାମ୍ ସାଡ଼ି ଲେକା ଆୟୁମଃ ତାଇକେନା । ୩ ଅତେଦିଶୁମ୍‌ରେ
ମୁଲ୍ଲି ନାମାକାଦ୍ ଏନ୍ ୧୪୪,୦୦୦ ହଡ଼କ, ସିମାରେୟାଃ ରାଜଗାଦି,
ଉପୁନିୟା ଜାଁତୁକଆଃ ଆତଃ କାଲିସିୟାରେନ୍ ପ୍ରାତିନ୍‌କଆଃ
ଆୟାର୍‌ରେ ତିଙ୍ଗ୍‌ୟାନାକ । ଇନ୍‌କୁ ନାଖାଦୁରାଙ୍ଗ୍ ଦୁରାଙ୍ଗ୍
ତାଇକେନାକ । ଇନ୍‌କୁକେ ବାଗିକେଦ୍‌ତେ ଆତଃଜେତାଏ
କାକ ଦୁରାଙ୍ଗ୍ ଦାଡ଼ିତାଇକେନା । ସବେନ୍ ମାନଖାକଏତେ
ଇନ୍‌କୁ ଏସ୍‌କାର୍ ଜୀଉବାଞ୍ଚାଅ ନାମାକାଦ୍ ତାଇକେନାକ ।
୪ ଇନ୍‌କୁ କୁଡ଼ିକଲଃ ହଡ଼ମ୍‌ରେୟାଃ ଏଡ଼କାନ୍ କାମି ଚିଉଲାଅ କା
ରିକାକେଦ୍‌ତେ କା ସଡ଼ରାକାନ୍ ଡିଣ୍ଡାଗିକ ତାଇକେନା, ଆତଃ
ସବେନ୍ ଇମ୍‌ତା ମିଣ୍ଡିହନ୍‌କେ ଅତଙ୍ଗ୍‌ତାନ୍ ହଡ଼କ ତାଇକେନା ।
ଇନ୍‌କୁ ମାନଖାକ ଥାଲାଏତେ ମୁଲ୍ଲି ନାମକେଦ୍‌ତେ ପାର୍‌ମେଶ୍ୱାର୍
ଆତଃ ମିଣ୍ଡିହନ୍‌ତାଃରେ ଦାନ୍ ରାକାବାକାନାକ । ୫ ଇନ୍‌କୁ ଚିଉଲାଅ
ହସଡ଼କାଜି କାକ କାଜି, ଆତଃ ପୁରାଗି ବେଗାର୍ ଚିଟାକାନ୍ ହଡ଼କ
ତାନକ ।

୫ ୧୪:୧ ୧୪:୧ ଉତ୍କଳ କାଳି ୭:୩.

ଆପିୟା ଦୁଁଡ଼

୬ ଏନ୍ତେ ଆଇଙ୍ଗ୍ ଏଟାଃ ମିଆଁଦ୍ ଦୁଁଡ଼କେ ଥାଲା ସିର୍ମାରେ ଆପିରତାନ୍ ନେଲ୍‌କିୟାଇଙ୍ଗ୍ । ଅତେରେନ୍ ସବେନ୍ ହଡ଼, କିଲି, ଏଟାଃ ଏଟାଃ ଜାଗାର୍‌ତାନ୍‌କ ଆତଃ ଦିଶୁମ୍‌ରେନ୍ ହଡ଼କଆଃ ଆୟାରରେ ପାର୍‌ମେଶ୍ୱାର୍‌ଆଃ ଏନ୍ ଜାନାଅ ଜାନାଅରେୟାଃ ସୁକୁକାଜି ଉଦୁବ୍‌ତାନାକ । ୭ ଇନିଃ କାଉରିକେଦ୍‌ତେ କାଜିତାଇକେନା, “ପାର୍‌ମେଶ୍ୱାର୍‌କେ ବରଇପେ, ଆୟାଃ ମାନାରାଙ୍ଗ୍ ରିକାଏପେ, ଚିଆଃଚି ମାନଝାରାଃ ବିଚାର୍ ନେତା ସେଟେରାକାନା । ସିର୍ମା, ଅତେ, ଦରେୟା ଆତଃ ସେତେଙ୍ଗ୍ ବାବାଇନିୟାଃ ସୁନ୍‌ସାର୍ ରିକାଏପେ ।”

୮ ☆ଏନ୍ ପାହିଲା ଦୁଁଡ଼ଆଃ ତାୟମ୍‌ତେ ଏଟାଃ ଦୁଁଡ଼ କାଜିକେଦାଏ, “ଅକ ମାରାଙ୍ଗ୍ ନାଗାର୍ ବାବିଲୋନ୍, ସବେନ୍ ହଡ଼କକେ ଆୟାଃ ଆପାଙ୍ଗିର୍ କାମି ଲେକାନ୍ ଇଲିଆର୍‌ଖ୍ ଆନୁକାଦ୍‌କଆଏ, ଇନିୟାଃ ଜିୟନ୍ ହବାକାନା !”

୯ ଏନ୍ତେ ନେ ବାରିୟା ଦୁଁଡ଼କିନାଃ ତାୟମ୍‌ତେ, ଆତଃମିଆଁଦ୍ ଦୁଁଡ଼ କାଉରିକେଦ୍‌ତେ କାଜିକେଦା, “ଜେତାଏ ଜାଁତୁ ଆତଃ ଆୟାଃ ମୁରୁଡ଼କେ ସୁନ୍‌ସାର୍ ରିକାଏୟା ଆତଃ ଆପ୍‌ନାଃ ମଲଙ୍ଗ୍‌ରେ ଚାଏ ତିଃଇରେ ଆୟାଃ ଚିହ୍ନାଁ ଖଦାକାନ୍‌ରେଦ, ୧୦ ଇନିଃ ପାର୍‌ମେଶ୍ୱାର୍‌ଆଃ ଖ୍‌ସ୍‌ଆଃ ଲେକାନ୍ କାଟୋରାରେ ଦୁଲ୍‌କାନ୍ ଆୟାଃ ପୁରାଃ ଖ୍‌ସ୍‌ରେୟାଃ ଇଲିଆର୍‌ଖ୍ ନୁଁଇଆ । ଅକ ହଡ଼କ ନେ କାମିକ ରିକାଏୟା, ଇନ୍‌କୁ ସବେନ୍‌କ ମିଶ୍ରିହନ୍ ଆତଃ ପାବିତାର୍ ଦୁଁଡ଼କଆଃ ସାମ୍‌ନାଙ୍ଗ୍‌ରେ ସେଙ୍ଗେଲ୍ ଆତଃ ଗାନ୍‌କ୍‌ରେ ଦୁକୁକ ନାମେୟା । ୧୧ ଏନ୍ ଦୁକୁରେୟାଃ ସୁକୁଲ୍ ଜାନାଅ ଜାନାଅ ସୁକୁଲ୍‌ଆ । ଅକ ହଡ଼କ ଜାଁତୁ ଆତଃ ଆୟାଃ ମୁରୁଡ଼କେ ସୁନ୍‌ସାର୍ ରିକାଏୟାକ, ଚାଏ ଆୟାଃ ଚିହ୍ନାଁ ଖଦାନାଃକ, ଇନ୍‌କୁ ନିଦାସିଙ୍ଗି ସବେନ୍ ଇମ୍‌ତା କା ରୁଡ଼ନ୍ ଦୁକୁକ ନାମେୟା ।”

୧୨ ଅକ ପାବିତାର୍ ହଡ଼କ ପାର୍‌ମେଶ୍ୱାର୍‌ଆଃ ହୁକୁମ୍‌କ ମାନାତିୟାଃ ଆତଃ ଯାଶୁକେ ବିଶ୍ୱାସାଃକ, ଇନ୍‌କୁ ମାନାତିଙ୍ଗ୍‌ରେ ଆତଃ ବିଶ୍ୱାସ୍‌ରେ ପାତିୟାର୍‌ରଃ ଲେକା ତାଇନ୍ ଲାଗାତିଙ୍ଗ୍‌ୟାଃ ।

☆ ୧୪:୮ ୧୪:୮ ଉତ୍କଳ କାଜି ୧୮:୨.

୧୩ ଏନ୍ତେ ଆଇଙ୍ଗ ସିର୍ମାଏତେ ମିଆଁଦ୍ ଲାବ୍‌ଜା ଆୟୁମ୍‌କେଦାଈଙ୍ଗ, “ନେ କାଜି ଅଲେମେ, ନାହାଁଃଏତେ ପ୍ରାଭୁତାଃରେ ବିଶ୍ୱାସ୍‌କେଦ୍‌ତେ ଅକ ହଡ଼କଆଃ ଗନଏଃ ହବାଅଃଆ, ଇନ୍‌କୁ ସୁକୁତାନଗିୟାକ ।” ଆତଃଗିଈଙ୍ଗ ଆୟୁମ୍‌କେଦା, ପାବିତାର୍ ଆମ୍‌ କାଜିତାନାଏ, ନେଆଁ ସାର୍‌ତିଗି ହବାଅଃଆ । “ଏନ୍ ହଡ଼କ ଆକଆଃ କେଟେଦ୍ କାମିଏତେ ରୁଡ଼ନୁକ ନାମେୟା, ଚିଆଃଚି ଇନ୍‌କୁ କାମିକାଦ୍ କାମି ଆକଲଃ ମିସାତେ ସେନା ।”

ଅତେରେ ଇଋଃ ଦିପିଲ୍ଲି

୧୪ ଏନ୍ତେ ଆଇଙ୍ଗ ମିଆଁଦ୍ ପୁଣ୍ଡି ରିମିଲ୍ ଆତଃ ଏନ୍ ରିମିଲ୍‌ରେ ମାନଝାହନ୍ ଲେକା ମିହୁଡ଼କେ ଦୁବାକାନ୍ ନେଲ୍‌କିୟାଈଙ୍ଗ । ଇନିୟାଃ ବହଃରେ ସୋନାରେୟାଃ ମୁକୁର୍ ଆତଃ ଇନିୟାଃ ତିଃଇରେ ମିଆଁଦ୍ ଲେସେର୍ ଦାଡ଼ରମ୍ ତାଇକେନା । ୧୫ ଏନ୍ତେ ମିଆଁଦ୍ ଦୁଁଡ଼ ମାନ୍ଦିରହେତେ ଅତଙ୍ଗୟାନ୍‌ଲଃ, ଏନ୍ ରିମିଲ୍‌ରେ ଦୁବାକାନ୍‌ନିଃକେ କାଡ଼ରିକେଦ୍‌ତେ କାଜିକିୟା, “ଆମାଃ ଦାଡ଼ରମ୍ ସାବ୍‌କେଦ୍‌ତେ ମାତାକାନ୍ ବାବା ଇରେମେ । ଅତେରେୟାଃ ବାବା ଇରେ ନାଗିନ୍ତେ ଦିପିଲି ସେଟେରାକାନା ।” ୧୬ ନେଆଁ ଆୟୁମ୍‌କେଦ୍‌ତେ ରିମିଲ୍‌ରେ ଦୁବାକାନ୍‌ନିଃ ଦାଡ଼ରମ୍‌ଲଃ ମାତାବାବା ଇର୍ ଏଟେଦ୍‌କେଦାଏ ଆତଃ ଅତେରେୟାଃ ସବେନ୍ ବାବା ହୁଣ୍ଡିକେଦାଏ ।

୧୭ ଏନ୍ତେ ଏଗାଃ ଆତଃମିଆଁଦ୍ ଦୁଁଡ଼ ସିର୍ମାରେୟାଃ ମାନ୍ଦିରହେତେ ହିଜୁଃତାନ୍ ନେଲ୍‌କିୟାଈଙ୍ଗ, ଇନିୟାଃ ତିଃଇରେୟାଃ ମିଆଁଦ୍ ଲେସେର୍ ଦାଡ଼ରମ୍ ତାଇକେନା ।

୧୮ ଏନ୍ତେ ଆତଃମିଆଁଦ୍ ଦୁଁଡ଼ ବେଦିହେତେ ହିଜୁଃୟାନା । ଇନିୟାଃ ସେଙ୍ଗେଲ୍ ଚେତାନ୍‌ରେ ଆକ୍‌ତେୟାର୍ ତାଇକେନା । ଇନିଃ ଲେସେର୍ ଦାଡ଼ରମ୍ ସାବାକାଦ୍ ଦୁଁଡ଼କେ କାଡ଼ରିକେଦ୍‌ତେ କାଜିକିୟା, “ଅତେରେୟାଃ ଦାଖ୍‌ନାଡ଼ିରେ ଜ'କାନ୍ ଅଙ୍ଗୁର୍ ଝୁପାକକେ ଦାଡ଼ରମ୍‌ଲଃ ଇରେମେ । ଚିଆଃଚି ଅଙ୍ଗୁର୍ ମାତାୟାନ୍‌ଗିୟା ।”

୧୯ ଏନ୍ତେ ଏନ୍ ଦୁଁଡ଼ ଅତେଦିଶ୍ୱମରେୟାଃ ଦାଖ୍‌ନାଡ଼ିରାଃ ଅଙ୍ଗୁର୍‌କ ଦାଡ଼ରମ୍‌ଲଃ ଇର୍‌କେଦାଏ । ଆତଃ ଏନ୍ ସବେନାଃ ପାର୍‌ମେଶ୍ୱାର୍‌ଆଃ ପୁରାଃ ଖ୍ୱରେୟାଃ ଦାଖ୍‌ରାସି ଘାନାରେ ହୁରାଙ୍ଗ୍‌କେଦା । ୨୦ ✱ନାଗାର୍

✱ ୧୪:୨୦ ୧୪:୨୦ ଉତ୍କଳ କାଜି ୧୯:୧୫.

ବାହାରିରେ ତାଇକାନ ଏନ୍ ଦାଖରାସି ଘାନାରେ ହୁରାଙ୍ଗୟାନା ଆଡ଼ଃ ଏନ୍ ଘାନାରେ ଦାଖରାସି ପେସାଅୟାନା । ଏନାଏତେ ୩୦୦ କିଲୋମିଟର ଜିଲିଙ୍ଗ୍ ଆଡ଼ଃ ସାଦମ୍‌ରାଃ ମତାରେୟାଃ ଲାଗମ୍ ଜାକେଦ୍ ମେନ୍‌ଲେରେ, ବାର୍ ମିଟର୍ ଲେକା ସାଲାଇଁ ମାୟୋମ୍‌ରେୟାଃ ଗାଡ଼ା ଲିଙ୍ଗିୟାନା ।

୧୫

ଚୁଣ୍ଟ ଦୁକୁହାସୁ

^୧ ଏନ୍ତେ ସିମ୍ବାରେ ଆଇଙ୍ଗ୍ ଆଡ଼ଃମିଆଁଦ୍ ହାଏକାର୍ ଆଡ଼ଃ ଆକ୍‌ଦାନ୍ଦାଅ ଚିହ୍ନାଁ ନେଲ୍‌କେଦାଇଙ୍ଗ୍ । ଏନ୍ତାରେ ଏୟା ଝାନ୍ ଦୁଡ୍‌କ ମିପିଆଦ୍ ଚୁଣ୍ଟ ଦୁକୁହାସୁ ସାବ୍‌କେଦ୍‌ତେ ଆଡ଼ଗୁୟାନାକ । ନେଆଁ ହବାଅଃ ତାୟମ୍‌ତେ, ପାର୍‌ମେଶ୍ୱାର୍‌ଆଃ ଖସ୍‌ରାଃ ଚୁଣ୍ଟ ହବାଅଃଆ ।

^୨ ଏନ୍ତେ ଆଇଙ୍ଗ୍ ସେଙ୍ଗେଲ୍‌ଲଃ ମେସାକାନ କାଁର୍ ଲେକା ମିଆଁଦ୍ ଦରେୟା ନେଲ୍‌କେଦାଇଙ୍ଗ୍ । ଅକ ହଡକ ଏନ୍ ଜାଁଡୁ, ଆୟାଃ ମୁରୁଡ୍ ଆଡ଼ଃ ଆୟାଃ ନୁଡୁମ୍‌ରାଃ ନାମ୍ବାର୍ ଚେତାନରେ ଜିତାଅକାନ୍ ତାଇକେନାକ, ଇନ୍‌କୁକେ ଏନ୍ ଦରେୟା ଗେନାରେ ତିଙ୍ଗୁଆକାନ୍ ନେଲ୍‌କେଦକଆଇଙ୍ଗ୍ । ଇନ୍‌କୁଆଃ ତିଃଇରେ ପାର୍‌ମେଶ୍ୱାର୍ ଏମାକାଦ୍ ବାନାମ୍ ତାଇକେନା । ^୩ ଇନ୍‌କୁ ପାର୍‌ମେଶ୍ୱାର୍‌ଆଃ ଦାସି ମୁଣାରାଃ ଆଡ଼ଃ ମିଣ୍ଡିହନ୍‌ଆଃ ଦୁରାଙ୍ଗ୍‌କ ଦୁରାଙ୍ଗ୍‌ତାଇକେନା । “ହେ ସବେନ୍ ପେଡେୟାନ୍‌ନିଃ ପ୍ରାଭୁ ପାର୍‌ମେଶ୍ୱାର୍, ଆମାଃ କାମିକ ପୁରାଃ ମାରାଙ୍ଗ୍ ଆଡ଼ଃ ଆକ୍‌ଦାନ୍ଦାଅଗିୟା ! ସବେନ୍ ହଡକଆଃ ରାଜା, ଆମାଃ ହରାକ ଠାଉକାଗିୟା ଆଡ଼ଃ ସାର୍‌ତି ତାନାଃ ! ^୪ ହେ ପ୍ରାଭୁ, ଅକଏ ଆମ୍‌କେ କାଏ ବରମେୟା ? ଆମାଃ ନୁଡୁମ୍‌ରାଃ ମାନାରାଙ୍ଗ୍‌କେ ଅକଏ କାଏ ଉଦୁବେୟା ? ଆମ୍ ଏସ୍‌କାର୍ ପାବିତାର୍ ତାନମେ, ସବେନ୍ ହଡକ ହିଙ୍ଗୁଃକେଦ୍‌ତେ ଆମାଃ ସୁନ୍‌ସାର୍‌କ ରିକାଏୟା । ତିଆଃତି ଆମାଃ ଧାର୍‌ମାନ୍ କାମିକ ସବେନ୍ ହଡକ ନେଲାକାଦାକ ।”

^୫ ଏନ୍ ତାୟମ୍‌ତେ ଆଇଙ୍ଗ୍ ସିମ୍ବା ଦିଶୁମ୍‌ରେ ମାନ୍ଦିର୍ ଅଡ଼ାଃରାଃ ଦୁଆର୍ ନିଜାକାନ୍ ନେଲ୍‌କେଦାଇଙ୍ଗ୍ । ଏନାରେ ସାବୁଦ୍ ଲେକା ପାର୍‌ମେଶ୍ୱାର୍‌ଆଃ ତାଇନଃ ପାବିତାର୍ ଠାୟାଦ୍ କୁମ୍ବା ତାଇକେନା । ^୬ ଏୟା ଦୁକୁହାସୁ ସାବାକାଦ୍ ଏୟା ଦୁଡ୍, ସିମ୍ବାରେୟାଃ ମାନ୍ଦିର୍

ଭିତାରଏତେକ ଅତଙ୍ଗୟାନା, ଇନ୍କୁ କା ଦାଗିୟାକାନ୍ ନିରାଲ୍ଲିଜାଃ
 ତୁସିଙ୍ଗୟାକାନ୍ ତାଇକେନାକ ଆତଃ କୁଡ଼ାମ୍ରେ ସୋନାରେୟାଃ
 କାସନା ତଲ୍‌ବିହୁରକାନ୍ ତାଇକେନାକ । ^୭ ଏନ୍ତେ ଉପୁନିୟା
 ଜାତୁକଏତେ ମିଆଁଦ୍‌ନିଃ ଜାନାଅ ଜାନାଅ ଜାନିଦ୍‌ଗି ତାଇନଃ
 ପାର୍‌ମେଶ୍ଵାର୍‌ଆଃ ଖୁସ୍‌ତେ ପେରେଜାକାନ୍, ଏୟା ସୋନାରେୟାଃ
 ତୁଭା, ଏନ୍ ଏୟା ଦୁଁଡ଼କକେ ଏମାଦକଆ । 「 ପାର୍‌ମେଶ୍ଵାର୍‌ଆଃ
 ମାନାରାଙ୍ଗ୍ ଆତଃ ପେଡ଼େଃରେୟାଃ ସୁକୁଲ୍‌ତେ ମାନ୍ଦିର୍ ଅଡ଼ାଃ
 ପେରେଃୟାନା, ଏୟା ଦୁଁଡ଼ ଆଉଞ୍ଜାକାଦ୍ ଏୟା ଦୁକୁହାସୁରେୟାଃ ଚୁଣ୍ଡୁ
 ଆଉରି ହବାଅଃ ଜାକେଦ୍, ନେ ମାନ୍ଦିର୍ ଅଡ଼ାଃରେ ଆତଃଜେତାଏ
 କାକ ବଲଦାଡ଼ିୟାନା ।

୧୭

ପାର୍‌ମେଶ୍ଵାର୍‌ଆଃ ଖୁସ୍‌ତେ ପେରେଜାକାନ୍ ଏୟା ତୁଭା

^୧ ଏନ୍ତେ ଆଇଙ୍ଗ୍ ଆୟୁମ୍‌କେଦାଇଙ୍ଗ୍, ମାନ୍ଦିର୍ ଅଡ଼ାଃଏତେ ଜେତାଏ
 ମିହୁଡ଼ କାଉରିକେଦତେ, ଏନ୍ ଏୟା ଦୁଁଡ଼କକେ କାଜିୟାକତାନା, “କୁ
 ସେନଃପେ, ଏୟା ତୁଭାରେ ତାଇକାନ୍ ପାର୍‌ମେଶ୍ଵାର୍‌ଆଃ ଖୁସ୍‌କେ
 ଅତେ ଚେତାନ୍‌ରେ ଦୁଲ୍‌ତାପେ ।”

^୨ ନେଆଁ ଆୟୁମ୍‌କେଦତେ, ପାହିଲା ଦୁଁଡ଼ ସେନଃୟାନାଏ ଆତଃ
 ଆୟାଃ ତୁଭାରେ ତାଇକେନ୍ ସବେନାଃ ଅତେ ଚେତାନ୍‌ରେ
 ଦୁଲ୍‌କେଦା । ଇମ୍‌ତାଗି ଅକନ୍‌କ ଜାତୁରାଃ ଚିହ୍ନାଁ ଖଦାକାନ୍
 ତାଇକେନାକ ଆତଃ ଆୟାଃ ଲେକାନ୍ ମୁରୁଡ଼କେ ସେଞ୍ଜା
 ତାଇକେନାକ, ଇନ୍କୁଆଃ ହଡ଼ମ୍‌ରେ ପୁରାଃଗି ହାସୁ ଲେକାନ୍
 ଘାଅ ଅତଙ୍ଗୟାନା ।

^୩ ଏନ୍ତେ ଏଟାଃ ଦୁଁଡ଼ ଆୟାଃ ତୁଭାରାଃ ଖୁସ୍‌କେ ଦରେୟାରେ
 ଦୁଲ୍‌କେଦା । ଦରେୟାରାଃ ଦାଆଃ ଗଜାକାନ୍ ହଡ଼ରାଃ ମାୟୋମ୍
 ଲେକା ହବାୟାନା ଆତଃ ଦରେୟାରେ ତାଇନ୍‌ତାନ୍ ସବେନ୍
 ଜାଉଜାତୁକ ଗଏଃୟାନା ।

^୪ ଏନ୍ତେ ଆପିୟା ଦୁଁଡ଼, ଆୟାଃ ତୁଭାରେ ତାଇକେନ୍ ସବେନାଃ
 ନାହିଁ ଆତଃ ସେତେଙ୍ଗ୍ ଚେତାନ୍‌ରେ ଦୁଲ୍‌କେଦା । ଏନାରେ ସବେନ୍
 ଦାଆଃ ମାୟୋମ୍‌ୟାନା । ^୫ ଇମ୍‌ତା ଆଇଙ୍ଗ୍ ଆୟୁମ୍‌କେଦାଇଙ୍ଗ୍,
 ଦାଆଃରେୟାଃ ଆକ୍‌ତେୟାର୍ ନାମାକାଦ୍ ଦୁଁଡ଼ କାଜିତାନାଏ,

“ଆମ୍ ପାବିତାର, ଆମ୍ ନାହାଁଃ ମେନାମେନିଃ ଆତଃ ସିଦାରେ ତାଇକେନ୍ନିଃ ତାନ୍ମେ, ଆମ୍ ଠାଉକାରିମ୍ ବିଚାରକାଦା ।^୭ ଇନ୍କୁ ପାର୍ମେଶ୍ଵାର୍ଆଃ ପାବିତାର୍ ହତ୍ତକଆଃ ଆତଃ ନାବାକଆଃ, ଅକ ମାୟୋମ୍ ଲିଙ୍ଗିକାଦାକ, ଏନା ଆମ୍ ଇନ୍କୁକେମ୍ ଆନୁକାଦକଆ । ଇନ୍କୁ ଆକଆଃ ନାଲା ନାମାକାଦାକ ।”^୮ ଏନ୍ତେ ଆଇଙ୍ଗ୍ ବେଦିହେତେ ମିଆଁଦ୍ ଲାବ୍ଜା ଆୟୁମ୍ବେଦାଇଙ୍ଗ୍, “ପ୍ରାତୁ ପାର୍ମେଶ୍ଵାର୍ ସବେନ୍ ପେଡ଼େୟାନ୍ନିଃ ତାନିଃ ! ଆମାଃ ବିଚାରକ ସାର୍ତ୍ତିରିୟା ଆତଃ ଠାଉକାରିୟା ।”

୮ ଏନ୍ତେ ଉପୁନିୟା ଦୁଁଡ୍, ଆୟାଃ ତୁଭାରେ ତାଇକେନ୍ ସବେନାଃ ସିଙ୍ଗି ଚେତାନ୍ରେ ଦୁଲ୍ଲକେଦା । ଏନାରେ ସିଙ୍ଗିକେ ସେଙ୍ଗେଲ୍ତେ ହତ୍ତକକେ ଅଣ୍ଡୁର୍ ନାଙ୍ଗ୍ ଆକ୍ତେୟାର୍ ଏମୟାନା ।^୯ ଇମ୍ତା ହତ୍ତକ ସିଙ୍ଗି ରାଁପରାଃ ଏଲାଙ୍ଗ୍ତେ ଅଣ୍ଡୁର୍ୟାନାକ ଆତଃ ଅକ ପାର୍ମେଶ୍ଵାର୍ଆଃ ନେ ସବେନ୍ ହାସୁରାଃ ସାସାତି ଚେତାନ୍ରେ ଆକ୍ତେୟାର୍ ମେନାଃ, ଏନ୍ ପାର୍ମେଶ୍ଵାର୍ଆଃ ନୁତୁମ୍ବେ ସାର୍ପାଅକେଦାକ । ଆତଃ ଆୟାଃ ମାନାରାଙ୍ଗ୍ ରିକା ନାଗେନ୍ତେ କାକ ହେୟାତିଙ୍ଗ୍କେଦା ।

୧୦ ଏନ୍ତେ ମଣୋୟାଁ ଦୁଁଡ୍ ଆୟାଃ ତୁଭାକେ ଜାଁତୁରାଃ ରାଜଗାଦି ଚେତାନ୍ରେ ଦୁଲ୍ଲକେଦା । ଜାଁତୁରାଃ ରାଇଜ୍ ଚେତାନ୍ରେ କୁଲ୍ଲକୁଲ୍ଲ ନୁବାଃୟାନା ଆତଃ ହତ୍ତକ ପୁରାଃ ହାସୁତେ ଆକଆଃ ଆଲାଙ୍ଗ୍କେ ହାବ୍କେଦାକ ।^{୧୧} ଆତଃ ଇନ୍କୁ ଆକଆଃ ହାନାସୁ ଆତଃ ହତ୍ତମରାଃ ଘାଅ ନାଗେନ୍ତେ ସିର୍ମାରେନ୍ ପାର୍ମେଶ୍ଵାର୍କେ ସାର୍ପାଅକିୟାକ । ମେନ୍ଦ ଆକଆଃ ଏଡ୍କାନ୍ କାମିକଏତେ କାକ ହେୟାତିଙ୍ଗ୍କେଦା ।

୧୨ ଏନ୍ତେ ତୁରିୟା ଦୁଁଡ୍ ଇଉପ୍ରାଟିସ୍ ନୁତୁମ୍ ମାରାଙ୍ଗ୍ ଗାଡ଼ାରେ ଆୟାଃ ତୁଭାକେ ଦୁଲ୍ଲକେଦା । ଇମ୍ତାଗି ଏନ୍ ଗାଡ଼ାରାଃ ଦାଆଃ ଆଞ୍ଜେଦୟାନା ଆତଃ ସିଙ୍ଗି ତୁରଃସାଃଏତେ ବାଇରି ରାଜାକଆଃ ନାଗେନ୍ତେ ହରା ନିଜୟାନା ।^{୧୩} ଏନ୍ତେ ଆଇଙ୍ଗ୍ ଆପିୟା ସଡ଼ରାକାନ୍ ଆମ୍ବାକକେଇଙ୍ଗ୍ ନେଲ୍ଲକେଦକଆ । ଇନ୍କୁ ଚକେ ଲେକା ନେଲ୍ଲଃ ତାଇକେନାକ । ଇନ୍କୁ ଏନ୍ ମାରାଙ୍ଗ୍ ବିଙ୍ଗ୍ ମରାଏତେ, ଜାଁତୁ ମରାଏତେ ଆତଃ ହସଡ୍ ନାବାଆଃ ମରାଏତେ ଅଡ୍ଙ୍ଗୟାନାକ ।

୧୪ ଏନ୍ ବଙ୍ଗାକଆଃ ଆମ୍ବାକ ଆକ୍ଦାନ୍ଦାଅ କାମିକ ରିକାଦାଡ଼ିୟା । ଆତଃ ଇନ୍କୁ ପେଡ଼େୟାନ୍ ପାର୍ମେଶ୍ଵାର୍ଆଃ ହୁଲାଙ୍ଗ୍ରେ

ଲାଡ଼ାଇ ନାଗେନ୍ତେ ଅତେଦିଶୁମ୍ରେନ୍ ରାଜାକକେ ମିଦତାଃରେ ହୁଣ୍ଡି ନାଗେନ୍ତେ ଅତଙ୍ଗୟାନାକ ।

୧୫ ☆“ଆୟୁମେପେ, ଆଇଙ୍ଗ କୁମ୍ପୁଡୁ ଚଳକାଇଙ୍ଗ ହିନ୍ଦୁଃଆ । ଅକ ହଡ଼ ଏୟନାକାନ ତାଇକେଦ୍ତେ ଆୟାଃ ଲିଜାଃ ସେକାଡ଼କେଦ୍ତେ ଦହକାଃ, ଏନ୍ ହଡ଼ ସୁକୁତାନ୍ରିୟାଏ । ଇନିଃକେ ସାମା ହଡ଼ମଗି ସେନ୍ ନାଗେନ୍ତେ କା ଲାଗାଡ଼ିଙ୍ଗୟାଃ ଆତଃ ହଡ଼କ ଆୟାଃ ଗିହୁଃ କାକ ନେଲେୟା ।”

୧୬ ସଡ଼ରାକାନ ଆମ୍ବାକ ରାଜାକକେ ଏବ୍ରୀ ଜାଗାର୍ତେ କାଜିୟଃତାନ ଆମ୍ବାଗେଦୋନ୍ ନୁଡୁମ୍ ଠାୟାଦ୍ରେ ହୁଣ୍ଡିକେଦ୍ଦକଆକ ।

୧୭ ଏନ୍ତେ ଏୟା ଦୁଁଡ଼ ଆୟାଃ ତୁଭାକେ ହୟରେ ଦୁଲ୍ଲକେଦା ଆତଃ ମାନ୍ଦିରେ ତାଇକେନ୍ ରାଜଗାଦିଏତେ କାଉରିକେଦ୍ତେ ମିଆଁଦ୍ ଲାବ୍ଜା ଆୟୁମୟାନା, “କାମି ପୁରାୟାନା ।” ୧୮ ☆ଇମ୍ତାଗି ହିଚିରକେଦାଏ, ରିମିଲ୍ ସାଡ଼ିୟାନା ଆତଃ ଅତେ ପୁରାଃଗି ଏକ୍ଲାଅୟାନା । ନେ'ଲେକା ବରଝାନ୍ ଅତେ ଏକ୍ଲାଅଃତେୟାଃ ମାନଝାରାଃ ମୁନୁହେତେ ଚିଉଲାଅ କା ହବାକାନ୍ ତାଇକେନା । ୧୯ ମାରାଙ୍ଗ୍ ନାଗାର୍ ଆପି ହିସାରେ ହାଟିଙ୍ଗୟାନା, ଆତଃ ଦିଶୁମ୍ରେୟାଃ ସବେନ୍ ନାଗାର୍କ ଜିୟନ୍ୟାନା । ପାର୍ମେଶ୍ଵାର୍ ମାରାଙ୍ଗ୍ ନାଗାର୍ ବାବିଲୋନ୍କେ କାଏ ରିଡ଼ିଙ୍ଗକାଦ୍ ତାଇକେନା । ଇନିଃ ଆୟାଃ ନୁଁଏ କାଟୋରାଏତେ ଆୟାଃ ପୁରାଃ ଖ୍ଵରାଃ ଇଲିଆରୁଶ୍ ଆନୁକିୟା । ୨୦ ☆ସବେନ୍ ଟାପୁକ କା ନେଲଃୟାନା ଆତଃ ବୁରୁ ବେଡ଼ାକ କା ତାଇନ୍ୟାନା । ୨୧ ☆ସିମ୍ବାଏତେ ହଡ଼କଆଃ ଚେତାନ୍ରେ ପୁରାଃ ମାପରାଙ୍ଗ୍ ଆରିଲ୍ଲକ ଉୟୁଃୟାନା । ମିପିଆଦ୍ ଆରିଲ୍ଲରାଃ ହାମ୍ବାଲ୍ ୫୦ କେ.ଜି ଲେକା ତାଇକେନା । ହଡ଼କ ନେ ବରଝାନ୍ ଆରିଲ୍ଲ ନାଗେନ୍ତେ ପାର୍ମେଶ୍ଵାର୍କେ ସାର୍ପାଅକିୟାକ ।

୧୭

ସବେନ୍କ ସାରିକାଇ ବେଶ୍ୟା କୁଡ଼ି

☆ ୧୭:୧୫ ୧୭:୧୫ ମାଥୁଉ ୨୪:୪୩,୪୪; ଲୁକ ୧୨:୩୯,୪୦; ଉତ୍କଳ କାଜି ୩:୩।
☆ ୧୭:୧୮ ୧୭:୧୮ ଉତ୍କଳ କାଜି ୮:୫; ୧୧:୧୩,୧୯. ☆ ୧୭:୨୦ ୧୭:୨୦ ଉତ୍କଳ କାଜି ୬:୧୪. ☆ ୧୭:୨୧ ୧୭:୨୧ ଉତ୍କଳ କାଜି ୧୧:୧୯.

୧ ଏନ୍ତେ ଏୟା ତୁଭା ସାବାକାଦ୍ ଏୟା ଦୁଁଡକଏତେ ମିହୁଡ୍, ଆଇଙ୍ଗତାଃତେ ହିନ୍ତୁଃୟାନ୍ଲଃ କାଜିକେଦିୟାଏ, “ହିନ୍ତୁଃମେ, ଆଇଙ୍ଗ ମିଆଁଦ୍‌ହେତେ ଆଦକା ଗାଡ଼ା ଜାପାଃରେ ବାଇୟାକାନ୍ ବେଶ୍ୟା ଲେକାନ୍ ଏନ୍ ମାରାଙ୍ଗ୍ ନାଗାର୍ ଚିଲ୍‌କା ସାଜାଇ ନାମେୟାଏ, ଏନାଇଙ୍ଗ୍ ଉଦୁବାମେୟା । ୨ ଅତେରେନ୍ ରାଜାକ ଏନ୍ ବେଶ୍ୟାଲଃ ଆପାଙ୍ଗିର୍ କାମିକ କାମିକାଦା, ଆଡ଼ଃ ଅତେଦିଶୁମ୍ରେନ୍ ହଡକ ଇନିୟାଃ ଆପାଙ୍ଗିର୍ କାମି ଲେକାନ୍ ଇଲିଆର୍ଖ୍ ନୁଁକେଦ୍‌ତେ ବୁଲ୍‌କାନାକ ।”

୩ ☆ ଏନ୍ତେ ଦୁଁଡ୍ ଆଇଙ୍ଗ୍‌କେ ଆମ୍‌ା ହରାତେ ବିର୍‌ତେ ଇଦିକିୟା । ଏନ୍ତାଃରେ ମିଆଁଦ୍ କୁଡିକେ ବାଇଗିନିଆ ରାଙ୍ଗ୍‌ରେନ୍ ଜାଁତୁ ଚେତାନରେ ଦୁବାକାନ୍ ନେଲ୍‌କିୟାଇଙ୍ଗ୍ । ଏନ୍ ଜାଁତୁରାଃ ସବେନ୍‌ସାଃରେ ପାର୍‌ମେଶ୍ଵାର୍‌ଆଃ ବିରୁଧ୍‌ରେ ନିନ୍ଦା ନୁତୁମ୍‌କ ଅଲ୍‌କାନ୍ ତାଇକେନା । ଏନ୍ ଜାଁତୁରାଃ ଏୟା ବହଃ ଆଡ଼ଃ ଗେଲ୍ ଦିରିଙ୍ଗ୍ ତାଇକେନା । ୪ ଏନ୍ କୁଡି ବାଇଗିନିଆ ଆଡ଼ଃ ଆରାଆଃ ଲିଜାଃ ତୁସିଙ୍ଗ୍‌ୟାକାନ୍ ତାଇକେନାଏ ଆଡ଼ଃ ସୋନା, ପୁରାଃ ଗନଙ୍‌ଆଁନ୍ ମଣି, ଆଡ଼ଃ ମଡିତେ ସିଙ୍ଗାରାକାନ୍ ତାଇକେନା । ଆୟାଃ ତିଃଇରେ ମିଆଁଦ୍ ସୋନାରେୟାଃ କାଟୋରା ତାଇକେନା । ଏନାରେ ହିଲାଇଙ୍ଗ୍‌ଆଃ ବିଷାଏ ଆଡ଼ଃ ଇନିୟାଃ ଆପାଙ୍ଗିର୍ କାମି ଲେକାନ୍ ସଡ଼ରା କାମିକ ପେରେଜାକାନ୍ ତାଇକେନା । ୫ ଇନିୟାଃ ମଲ୍‌ଙ୍ଗ୍‌ରେ ମିଆଁଦ୍ ଉକୁଆକାନ୍ ନୁତୁମ୍ ଅଲ୍‌କାନ୍ ତାଇକେନା, ଏନାରାଃ ମୁଣ୍ଡି, “ମାରାଙ୍ଗ୍ ବାବିଲୋନ୍, ବେଶ୍ୟାକଆଃ ଆଡ଼ଃ ଅତେଦିଶୁମ୍ରେନ୍ ସବେନ୍ ଲେକାନ୍ ହିଲାଇଙ୍ଗ୍‌ଆଃ ବିଷାଏରେନ୍ ଏଙ୍ଗା ।” ୬ ଆଇଙ୍ଗ୍ ଆଡ଼ଃଗିଇଙ୍ଗ୍ ନେଲ୍‌କେଦା, ଏନ୍ କୁଡି ପାର୍‌ମେଶ୍ଵାର୍‌ଆଃ ହଡକଆଃ ଆଡ଼ଃ ଯାଶୁଆଃ ନାଗେନ୍ତେ ଗାଞ୍ଜା ଏମାକାଦ୍ ହଡକଆଃ ମାୟୋମ୍ ନୁଁକେଦ୍‌ତେ ବୁଲ୍‌କାନ୍ ତାଇକେନା । ଇନିଃକେ ନେଲ୍‌କେଦ୍‌ତେ ଆଇଙ୍ଗ୍ ଆକ୍ରାକାଅୟାନାଇଙ୍ଗ୍ । ୭ ଦୁଁଡ୍ ଆଇଙ୍ଗ୍‌କେ କାଜିକେଦିୟା, “ଚିନାଃ ମେନ୍ତେମ୍ ଆକ୍‌ଦାନ୍ଦାଅଃତାନା ? ଆଇଙ୍ଗ୍ ଆମ୍‌କେ ଏନ୍ କୁଡି, ଆଡ଼ଃ ଆଇଃକ୍‌କେ ଗଅଃ ଇଦିତାନ୍ ଜାଁତୁ, ଅକଏୟାଃଚି ଏୟା ବହଃ, ଗେଲ୍ ଦିରିଙ୍ଗ୍ ମେନାଃ, ଇନିୟାଃ ବିଷାଏରେ ଉକୁଆକାନ୍ କାଜିଇଙ୍ଗ୍

☆ ୧୭:୩ ୧୭:୩ ଉତ୍କଳ କାଜି ୧୩:୧.

ଉଦୁବାମେୟା । ୮ ☆ଆମ୍ ଅକ ଜାଁତୁକେ ନେଲ୍‌କାଇ ତାଇକେନାମ୍, ଇନିଃ ଜାନିଦ୍ ତାଇକେନାଏ ଆତଃ ନାହାଁଃ ବାଙ୍ଗାଲୟା । ମେନ୍‌ଦ ଇନିଃ ହୁଆଙ୍ଗାଗାଡ଼ାଏତେ ହିଜୁଃଆ ଆତଃ ଜିୟନଃଆଏ । ଏନାରେ ଅତେଦିଶ୍ଟୁମ୍‌ରାଃ ମୁନ୍‌ଏତେ ଅକ ହଡ଼କଆଃ ନୁତୁମ୍ ଜୀଦାନ୍ ପୁଥ୍‌ରେ କା ଅଲ୍‌କାନା, ଏନ୍ ହଡ଼କ ଇନିଃକେ ନେଲ୍‌କେଦ୍‌ତେ ଆକ୍‌ଦାନ୍‌ଅଃଆକ । ଚିଆଃଚି ଇନିଃ ଜାନିଦ୍ ତାଇକେନାଏ, ନାହାଁଃ ବାଙ୍ଗାଲୟା ଆତଃ ତାୟମ୍‌ତେ ହିଜୁଃଆ ।

୯ “ନେ ସବେନାଃ ଆବ୍‌କାର୍‌ଉତୁମ୍ ନାଗେନ୍ତେ ସେଣାଁ ଲାଗାତିଙ୍ଗ୍‌ୟାଁଃ । ନେ ଜାଁତୁରାଃ ଏୟା ବହଃ ହବାଅଃତାନା ଏୟା ବୁରୁ । ଅକ ଚେତାନ୍‌ରେଚି ଏନ୍ କୁଡ଼ି ଦୁବାକାନା । ଏନା ଏୟା ରାଜାକକେ ହଗି କାଜିୟଃତାନା । ୧୦ ଇନ୍‌କୁଏତେ ମଣେୟାଁ ରାଜା ଗଏଃୟାନାକ । ମିଆଁଦ୍‌ନିଃ ରାଇଜେତାନାଏ, ଆତଃ ଏଟାଃନିଃ ନାହାଁଃ ଜାକେଦ୍ ଆଉରି ହିଜୁଃଆଏ । ଇନିଃ ହିଜୁଃରେ, ଘାଡ଼ିକାଦ୍‌ଗି ରାଇଜେୟା । ୧୧ ଅକ ଜାଁତୁ ଜାନିଦ୍ ତାଇକେନାଏ, ନାହାଁଃଦ ଇନିଃ ବାଙ୍ଗାଲୟା, ଇନିଃ ହବାଅଃତାନାଏ ଇରାଲିୟା ରାଜା । ଇନିଃ ଏନ୍ ଏୟା ରାଜାକଏତେ ମିଆଁଦ୍‌ନିଃ ତାନିଃ ଆତଃ ଇନିଃ ହଗି ଜିୟନଃଆ ।

୧୨ “ଆମ୍ ନେଲ୍‌କାଦ୍ ଗେଲ୍ ଦିରିଙ୍ଗ୍ ମେନ୍‌ଲେରେ ଗେଲ୍ ରାଜାକ ତାନକ । ଇନ୍‌କୁ ନାହାଁଃ ଜାକେଦ୍ ଆଉରି ରାଇଜେୟାକ । ମେନ୍‌ଦ ଇନ୍‌କୁକେ ଏନ୍ ଜାଁତୁଲଃ ମିଦ୍ ଘାଡ଼ିଗି ରାଇଜେ ନାଗେନ୍ତେ ଆକ୍‌ତେୟାର୍ ଏମଃଆ । ୧୩ ନେ ଗେଲ୍ ରାଜାକଆଃ ଉଦ୍‌ବେଗ୍ ମିଦ୍‌ଗିୟା । ଇନ୍‌କୁ ଆକଆଃ ଆପ୍‌ନାଃ ସବେନ୍ ପେଡ଼େଃ ଆତଃ ଆକ୍‌ତେୟାର୍ ଜାଁତୁକେ ଜିମାଲୟାକ । ୧୪ ଇନ୍‌କୁ ମିଣ୍ଡିହନ୍‌ଆଃ ବିରୁଧ୍‌ରେ ଲାପାଡ଼ାଲୟାଃକ, ଆତଃ ମିଣ୍ଡିହନ୍ ଇନ୍‌କୁକେ ହାରାଅକଆ, ଚିୟାଃଚି ଇନିଃ ପ୍ରାଭୁକଆଃ ପ୍ରାଭୁ ଆତଃ ରାଜାକଆଃ ରାଜା ତାନିଃ । ଆତଃ ଅକନକ ଆୟାଃଲଃ ମେନାକଆ, ଏନ୍ କେଡ଼ାକାନକ, ସାଲ୍‌କାନକ, ଆଇଃକକେ ଅତଙ୍ଗ୍‌ତାନକ ଆତଃ ପାତିୟାର୍‌ରଃ ଲେକାନ୍ ହଡ଼କ ହଗି ଜିତାଅଃଆକ ।”

୧୫ ଦୁଁଡ୍ ଆଇଙ୍ଗ୍‌କେ ଆତଃଗି କାଜିକେଦିୟା, “ଆମ୍ ଅକ ଦାଆଃ ଚେତାନ୍‌ରେ ବେଶ୍ୟାକେ ଦୁବାକାନାମ୍ ନେଲ୍‌କିୟା,

☆ ୧୭:୮ ୧୭:୮ ଉତ୍କଳ କାଳି ୧୧:୭.

ଏନ୍ ଦାଆଃ, ଦିଶୁମ୍ରେନ୍ ସବେନ୍ ହଡକ ଆତଃ ଏଟାଃ ଏଟାଃ ଜାଗାର୍ତାନ୍ ହଡକକେ କାଜିୟଃତାନା । ୧୭ ଆମ୍ ନେଲକାଦ୍ ଗେଲ୍ ଦିରିଙ୍ଗ୍ ଆତଃ ଏନ୍ ଜାଁତୁ, ବେଶ୍ୟାକେ ହିଲାଙ୍ଗ୍ଆଈକ, ଇନ୍କୁ ଇନିଃତାଃଏତେ, ଆୟାଃ ସବେନାଃ ରେଃଇଦିୟାକ ଆତଃ ଇନିଃକେ ସାମା ହଡ଼କେଦ୍ତେ ବାଗିତାଇୟାକ । ଇନ୍କୁ ଆୟାଃ ଜିଲ୍ଲୁ ଜମକେଦ୍ତେ, ଇନିଃକେ ସେଙ୍ଗେଲ୍ରେ ହୁରାଙ୍ଗ୍କେଦ୍ତେ ଜିୟନ୍ତାଇୟାକ । ୧୭ ଚିୟାଃତି ପାର୍ମେଶ୍ୱାର୍ ଆୟାଃ ଇଛା ସାନାଙ୍ଗ୍କେ ପୁରାଏ ନାଗେତ୍ତେ ନେ'ଲେକା ଇନ୍କୁକେ କାଜିକାଦ୍କଆ । ଇନ୍କୁ ମିଦ୍ ମନ୍ତେକ କାମିୟା ଆତଃ ପାର୍ମେଶ୍ୱାର୍ଆଃ କାଜି ସାର୍ତିଗି ଆଉରି ହବାଅଃ ଜାକେଦ୍, ରାଇଜକେ ଚାଲାଅରେୟାଃ ବାହାରମ୍, ଏନ୍ ଜାଁତୁଆଃ ତିଃଇରେ ବାଗିତାଃକ ।

୧୮ “ଆମ୍ ଅକ କୁଡ଼ିକେମ୍ ନେଲ୍କିୟା, ଇନିଃ ହବାଅଃତାନାଏ, ଅତେଦିଶୁମ୍ରେନ୍ ରାଜାକଆଃ ତେତାନ୍ରେ ରାଇଜେତାନ୍, ଏନ୍ ମାରାଙ୍ଗ୍ ନାଗାର୍ ।”

୧୮

ବାବିଲ୍ରାଃ ଜିୟନଃ

୧ ଏନ୍ ତାୟମ୍ତେ ଆଇଙ୍ଗ୍ ଏଟାଃ ମିଆଁଦ୍ ଦୁଁଡ଼କେ ସିର୍ମାଏତେ ଆଡ଼ଗୁଃତାନ୍ ନେଲ୍କିୟାଇଙ୍ଗ୍ । ଇନିଃ ପୁରାଃଗି ଆକ୍ତେୟାର୍ ନାମାକାଦ୍ନିଃ ତାଇକେନାଏ ଆତଃ ଇନିୟାଃ ମାନାରାଙ୍ଗ୍ ଗଟା ଅତେଦିଶୁମ୍ରେନ୍ ମାର୍ସାଲ୍କାଦ୍ ତାଇକେନା । ୨ ☆ଇନିଃ କାଉରିକେଦ୍ତେ କାଜିକେଦା, “ଇନିୟାଃ ଜିୟନ୍ ହବାକାନା । ଏନ୍ ମାରାଙ୍ଗ୍ ବାବିଲୋନ୍ ହାଦୁଡ଼ାକାନା । ଏନା ନାହାଁଃଦ୍ ବଙ୍ଗା ଆତଃ ସଡ଼ରା ଆମ୍ବାକଆଃ ତାଇନଃ ଠାୟାଦ୍ ହବାକାନା । ସବେନ୍ ରାକାମ୍ରେନ୍ ସଡ଼ରା ଜାଁତୁ ଆତଃ ହିଲାଙ୍ଗ୍ ଚେଟ୍ଟେକଆଃ ତାଇନଃ ଠାୟାଦ୍ ବାଇୟାକାନା । ୩ ଚିୟାଃତି ଇନିଃ ସବେନ୍ କିଲିରେନ୍ ହଡକକେ ଆୟାଃ ଆପାଙ୍ଗ୍ କାମି ଲେକାନ୍ ଇଲିଆର୍ଗ୍ ଆନୁକାଦ୍କଆ । ଅତେରେନ୍ ରାଜାକକେ ଆୟାଃଲଃ ଆପାଙ୍ଗ୍ କାମିରେ ମେସାକାଦ୍କଆ । ଅତେଦିଶୁମ୍ରେନ୍

☆ ୧୮:୨ ୧୮:୨ ଉତ୍କଳ କାଜି ୧୪:୮.

କିରିଙ୍ଗ ଆଖିରିଙ୍ଗତାନକ ଆୟାଃ ଏଡକାନ ରିଜରାଙ୍ଗ ହରାତେ କିସାଣକାନାକ ।”

୪ ଏନ୍ତେ ଆଇଙ୍ଗ ସିର୍ମାଏତେ ମିଆଁଦ ଲାବଜା ଆୟୁମ୍ବକେଦାଇଙ୍ଗ, “ଆଇଁୟାଃ ସବେନ୍ ହଡକ ଅଡଙ୍ଗଅଃପେ ! ଇନିଃତାଃଏତେ ଅଡଙ୍ଗଅଃପେ ! ଆପେ ଇନିୟାଃ ପାପ୍ରେ ଆଡଃ ଆଲପେ ତାଇନଃଆ । ଇନିଃ ଅକ ସାସାତି ନାମେୟାଏ, ଏନାରେୟାଃ ହିସା ଆଲପେ ହବାଅଃଆ । ୫ ଇନିୟାଃ ପାପକଦ ସିର୍ମା ଜାକେଦ୍ ସେଟେରାକାନା । ପାର୍ମେଶ୍ଵାର ଇନିୟାଃ ଏଡକାନ କାମିକଏ ପାହାମାକାଦା । ୬ ଇନିଃ ଜେଲେକା ଆପେଲଃ ବେଭାରକାଦା, ଆପେ ଏନ୍ଲେକାଗି ଆୟାଃଲଃ ବେଭାରେପେ, ଇନିଃ ଅକନାଃ ରିକାକାଦାଏ, ଏନାଏତେ ବାର୍ଗୁନା ଏମ୍ ରୁହାଡ଼ାଇପେ । ଆପେକେ ନୁଁ ନାଗେନ୍ତେ ଇନିଃ ଅକ ନୁଁଏତେୟାଃ ବାଇୟାକାଦ୍ ତାଇକେନାଏ, ଏନାଏତେ ବାର୍ଗୁନା ବାଇରୁହାଡ଼ାଇପେ । ୭ ଇନିଃ ଆପାନାଃ ଚିମିନ୍ ମାନାରାଙ୍ଗ ରିକାଏ ତାଇକେନାଏ ଆଡଃ ଏଡକାନ ରିଜରାଙ୍ଗରେ ଭୁବିଃଗକାନ୍ ତାଇକେନା, ଏନ୍ ଇମ୍ନାଙ୍ଗରେଗି ଇନିଃକେ ଦୁକୁହାସୁ ଏମାଇପେ । ଚିଆଃଚି ଇନିଃ ଆୟାଃ ମନ୍ରେ ଆପାନକେ ମାରାଙ୍ଗ ମେନ୍ତେ କାଜିନ୍ତାନଲଃ କାଜିତାନାଏ, “ଆଇଙ୍ଗ ନେତାଃରେ ରାନୀ ଲେକା ଦୁବାକାନାଇଙ୍ଗ, ଆଇଙ୍ଗ ଟଣିର୍ ନାହାଲିଙ୍ଗ, ଆଇଁୟାଃ ଚିତଲଅଗି ଏୟମ୍ କା ହବାଅଃଆ ।” ୮ ଇନିୟାଃ ନେ ସବେନ୍ ପାପକ ନାଗେନ୍ତେ ବେମାର୍, ଦୁକୁରେୟାଃ ରାନାଃ, ଆଡଃ ରିଙ୍ଗା ମୁସିଙ୍ଗ ଇନିଃକେ ମିସାତେ ସାବିଆ । ଆଡଃ ଇନିଃ ସେଙ୍ଗେଲ୍ରେ ପୁରା ଜିୟନଃଆଏ । ଚିୟାଃଚି ଇନିୟାଃ ଅକଏ ବିଚାର୍ ତାନାଏ, ଏନ୍ ପ୍ରାଭୁ ପାର୍ମେଶ୍ଵାର୍ ପୁରାଃ ପେଡେୟାନ୍ନିଃ ତାନିଃ ।”

୯ ଅତେରେନ୍ ଅକ ରାଜାକ ଇନିଃଲଃ ଆପାଙ୍ଗିର୍ ଆଡଃ ପାପ୍ କାମିକ ରିକାକାଦ୍ ତାଇକେନା, ଇନ୍କୁ ଇନିୟାଃ ହଡ଼ମ୍ ସେଙ୍ଗେଲ୍ ଜୁନୁଲ୍ରେ ଜିୟନଃତାନ୍ ସୁକୁଲ୍ ନେଲ୍କେଦ୍ରେ ରାଆଃଏୟାକ । ୧୦ ଇନିୟାଃ ଦୁକୁହାସୁରେ ହିସା ହବାଃଆ ନାଙ୍ଗ୍ ବରକେଦ୍ରେ ଇନ୍କୁ ଇନିଃତାଃଏତେ ପୁରାଃ ସାଜିନ୍ରେ ତିଙ୍ଗ୍କେଦ୍ରେତକ ତାଇନା, ଆଡଃ କାଜିୟାକ, “ହାଏରେ ଚିମିନ୍ ବରଞ୍ଜାନ୍ ଆଡଃ ଆକଦାନ୍ଦାଅ ବିଷାଏ ତାନାଃ ! ଆମ୍ ଚିନାଃ ଏନ୍ ପୁରାଃ ପେଡେୟାନ୍ ବାବିଲୋନ୍

ନାଗାର ତାନମେ ! ମେନ୍ଦ ମିଦ ଘାଡ଼ିରେଗି ନେ'ଲେକା ସାଜାଇ
ନାମକେଦାମ୍ ।”

୧୧ ଅତେରେନ୍ କିରିଙ୍ଗ ଆଖିରିଙ୍ଗତାନକ ଇନିଃ ନାଗେନ୍ତେକ
ଏୟମେୟା, ଚିୟାଃଚି ଜେତାଏ ଇନ୍ଦକୁଆଃ ଜିନିଷକକେ କାକ
କିରିଙ୍ଗେୟା । ୧୨ ଇନ୍ଦକୁଆଃ ସୋନା, ରୁପା, ମଣି, ମତି, ଉନ୍ରାଃ
ଲିଜାଃ, ବାଇଗିନିଆ ଲିଜାଃ, ସିନ୍ଦୁର୍ ରାଙ୍ଗରାଃ ଲିଜାଃ, ସବେନ୍
ଲେକାନ୍ ଗନଙ୍ଗଆନ୍ ଚନ୍ଦନ୍ ସାହାନ୍, ହାଁତି ତାଟାତେ ବାଇୟାକାନ୍
ସବେନ୍ ଲେକାନ୍ ଜିନିଷକ, ପୁରାଃ ଗନଙ୍ଗଆନ୍ ଦାରୁ, ପିତାଲ୍,
ମେଡେଦ୍, ମାର୍ବଲରେ ବାଇୟାକାନ୍ ସବେନ୍ ଲେକାନ୍ ଜିନିଷ,
୧୩ ଆତଃ ଦାଲ୍ଚିନି, ଏଟାଃ ଏଟାଃ ମାସ୍ଲକ, ଧୁଆନ୍, ବୁଗିନ୍ ସହାନ୍
ସୁନୁମ୍, ବୁଗିନ୍ ସହାନ୍ ମାଲାମ୍, ଦାଖରାସି, ଅଲିଡ୍ ସୁନୁମ୍, ମାଏଦା,
ଗହମ୍, ଉରିଃକ୍, ମିଣ୍ଡି, ସାଦମ୍, ସାଦମ୍ ଗାଡ଼ି, କିରିଙ୍ଗଦାସି ଆତଃ
ଜୀଉ ତାଇନଃ ମାନଝାକକେ ହଗି କିରିଙ୍ଗ ନାଗେନ୍ତେ ଜେତାଏ
ହଡ୍ କାକ ଅତଙ୍ଗଅଃଆ । ୧୪ କିରିଙ୍ଗ ଆଖିରିଙ୍ଗତାନ୍ ହଡ୍ କ
ଇନିଃକେକ କାଜିକିୟା, “ଆମାଃ ଜୀଦାନ୍ରେୟାଃ ରିଜରାଙ୍ଗ ସବେନ୍
ବୁଗିନ୍ ବିଷାଏକ ଆମାଃତାଃଏତେ ସାଙ୍ଗିନ୍ୟାନା । ଆତଃ ଆମାଃ
ଖୁଜ୍ରେୟାଃ ସୁଗାଡାନ୍ତେୟାଃକ ଆମାଃତାଃଏତେ ଆତମ୍ୟାନା,
ଆମ୍ ଏନ୍ ସବେନାଃକେ ଆତଃ ଚିଉଲାଅ କାମ୍ ନାମ୍ରୁହାଡେୟା
।” ୧୫ ଅକନ୍ କିରିଙ୍ଗ ଆଖିରିଙ୍ଗତାନ୍ ହଡ୍ କ ଏନ୍ ନାଗାରରେ
ଆଖିରିଙ୍ଗକେଦ୍ତେ କିର୍ଯାଣ୍ଟକାନ୍ ତାଇକେନାକ, ଇନ୍ଦକୁ ଇନିୟାଃ
ଦୁକୁହାସୁରେ ହିସା ହବାଃଅ ନାଗେନ୍ତେ ବରକେଦ୍ତେ ପୁରାଃ
ସାଙ୍ଗିନ୍ରେକ ତିଙ୍ଗୁନା । ୧୬ ଇନ୍ଦକୁ ରାଆଃ ଆତଃ ଏୟମତାନ୍ଲଃ
କାଜିୟାକ, “ହାଏରେ, ଏନ୍ ମାରାଙ୍ଗ ନାଗାରରେୟାଃ ଦୁକୁ, ଚିମିନ୍
ବରଝାନ୍ରିୟା ! ଚିମିୟାଙ୍ଗ କା ସାହାତିଙ୍ଗୟାଃ ଲେକା ମେନାଃ
! ଅକ ମାରାଙ୍ଗ ନାଗାର ଉନ୍ରାଃ ଲିଜାଃ, ବାଇଗିନିଆ ଲିଜାଃ
ଆତଃ ସିନ୍ଦୁର୍ ରାଙ୍ଗରେୟାଃ ଲିଜାଃ ତୁସିଙ୍ଗୟାକାନ୍ ତାଇକେନାଏ,
ଆତଃ ସୋନା, ମଣି, ମତିତେ ସିଙ୍ଗରାଅକାନ୍ ତାଇକେନା ।
୧୭ ମେନ୍ଦ ମିଦ ଘାଡ଼ିରେଗି ନେ ସବେନ୍ ଖୁଜ୍ କଏ ଆଦକେଦା
!” ଦାଆଃ ଜାହାଜ୍ ଚାଲାଅତାନ୍କଆଃ ଆଗୁଆଲ୍ ଆତଃ ଏନାରେ
ଦୁବାକାନ୍କ, ଦାଆଃ ଜାହାଜ୍ ଚାଲାଅତାନ୍କ, ଆତଃ ଦରେୟାରେ

କିରିଙ୍ଗ ଆଖିରିଙ୍ଗତାନ ହଡ଼କ ସାଙ୍ଗିନରେ ତିଙ୍ଗୁୟାନାକ ।
 ୧୮ ଆଡ଼଼ ଜିୟନଃତାନ ନାଗାରରେୟାଃ ସୁକୁଲ୍ ନେଲ୍‌କେଦ୍‌ତେ,
 କାଉରିତାନଲଃ କାଜିକେଦାକ, “ନେ ମାରାଙ୍ଗ ନାଗାର୍ ଲେକା ଆଡ଼଼
 ଜେତା ନାଗାର୍ କା ତାଇକେନା ।” ୧୯ ଇନ୍‌କୁ ଆକଆଃ ବହଃରେ
 ଧୁଡ଼ିକ ହେରକେଦ୍‌ତେ ଏୟନତାନଲଃ କାଜିକେଦାକ, “ତିମିନ୍
 ବରଞ୍ଜାନଗିୟା, ନାଗାରରେୟାଃ ଦୁରଦାସା କା ସାହାତିଙ୍ଗୟ୍‌ୟା ଲେକା
 ହବାକାନା ! ଦରେୟାରେ ସେନ୍‌ତାନ ଦାଆଃ ଜାହାଜ୍‌କ ଆୟାଃ
 ଖୁଜ୍‌ତେଗି କିସାଣ୍‌କାନ ତାଇକେନା ! ମେନ୍‌ଦ ମିଦ୍ ଘାଡ଼ିରେଗି
 ସବେନାଃ ଜିୟନ୍‌ୟାନା !”

୨୦ ହେ ସିର୍ମାରେନ୍ ହଡ଼କ, ଇନିଃ ଜିୟନକାନ ହରାତେ
 ରାସକାଅଃପେ । ହେ ପାରମେଶ୍ୱାରଆଃ ହଡ଼କ, ପ୍ରେରିଡ଼କ ଆଡ଼଼
 ନାବୀକ ରାସକାଅଃପେ ! ତିଆଃତି ଆପେ ନାଗେନ୍ତେ ଅକନାଃ
 ରିକାକାଦ୍ ତାଇକେନାଏ, ଏନାମେନ୍ତେ ପାରମେଶ୍ୱାର୍ ଇନିଃକେ
 ସାଜାଇ ଏମାକାଇଜାଏ ।

୨୧ ଏନ୍ତେ ମିଆଁଦ୍ ପୁରାଃ ପେଡ଼େୟାନ୍ ଦୁଁଡ଼, ଜାନ୍ତାଦିରି ଲେକା
 ମିଆଁଦ୍ ଦିରି ଇଦିକେଦ୍‌ତେ ଦରେୟାରେ ହୁରାଙ୍ଗକେଦ୍‌ତେ
 କାଜିକେଦା, “ମାରାଙ୍ଗ ନାଗାର୍ ବାବିଲୋନ୍, ନେ'ଲେକା
 ହୁରାଙ୍ଗଅଃଆଏ ଯେ, ଇନିଃକେ ଆଡ଼଼ମିସା ଜେତାଏ କାକ ନେଲ୍
 ଦାଡ଼ିୟା । ୨୨ ବାନାମ୍ ସାଡ଼ିତାନକଆଃ ସାଡ଼ି, ମାନଞ୍ଜକଆଃ ଲାବ୍‌ଜା
 ଦୁରାଙ୍ଗ, ମୁରଲି ସାଡ଼ି, ବିଙ୍ଗୁଲ୍ ସାଡ଼ି ତିଉଲ୍‌ଆ ଆମାଃତାଃରେ
 ଆଡ଼଼ କା ଆୟୁମଃଆ । ଜେଡ଼ନାଃଗି ବାବାଇ ହଡ଼କ ଆମାଃତାଃରେ
 ଆଡ଼଼ ତିଉଲ୍‌ଆ କାକ ନେଲ୍‌ଆ, ଚାଏ ଜାନ୍ତାଦିରିରେ ରିଦେତାନ
 ଲାବ୍‌ଜା କା ଆୟୁମଃଆ । ୨୩ ଆମାଃତାଃରେ ଆଡ଼଼ ତିଉଲ୍‌ଆ
 ଦିମି କା ଜୁଲ୍‌ଆ, ଚାଏ ନାଞ୍ଜା କଡ଼ାକୁଡ଼ିକିନାଃ ଲାବ୍‌ଜା କା
 ଆୟୁମଃଆ । ତିଆଃତି ଆମାଃତାଃରେ କିରିଙ୍ଗ ଆଖିରିଙ୍ଗତାନ ହଡ଼କ
 ଅତେଦିଶ୍ୱମରେ ପୁରାଃଗି ପେଡ଼େୟାନ୍‌ଗିକ ତାଇକେନା, ଆମାଃ
 ଯାଦୁଟଣାତେ ଆମ୍ ସବେନ୍ ହଡ଼କକେ ବେଦାକେଦ୍‌ତେ ଦହକାଦ୍‌କ
 ତାଇକେନାମ୍ ।”

୨୪ ଆଡ଼଼ ନେ ବାବିଲୋନ୍ ନାଗାରରେ ଅତେଦିଶ୍ୱମରେନ୍ ପୁରାଃ
 ନାବୀକ ଆଡ଼଼ ପାରମେଶ୍ୱାରଆଃ ହଡ଼କଆଃ ମାୟୋମ୍ ଲିଙ୍ଗିକାନ

ତାଇକେନା । ନେ ସବେନ୍ ପାପ୍ ନାଗେନ୍ତେ ଜନିଃ ସାଜାଇ
ନାମାକାଦାଏ ।

୧୯

ସିର୍ମାରେ ରାସକାରେୟାଃ ଦୁରାଙ୍ଗ

୧ ଏନ୍ ତାୟମ୍‌ତେ ଆଇଙ୍ଗ୍ ସିର୍ମାରେ ପୁରାଃ ଗାଦେଲ୍ ହଡ଼କକେ
କାଉରିକେଦ୍‌ତେ ଜାଗାର୍‌ତେୟାଃ ଆୟୁମ୍‌କେଦ୍‌କଆଇଙ୍ଗ୍ ।
ଇନ୍‌କୁ କାଜିତାଇକେନାକ, “ପାର୍‌ମେଶ୍‌ବରାଆଃ ସାହାରାଅ
ରିକାଏପେ । ଜୀଉବାଞ୍ଚାଅ, ମାନାରାଙ୍ଗ୍ ଆତଃ ପେଡ଼େଃ ଆରୁଆଃ
ପାର୍‌ମେଶ୍‌ବରାଆଃ ତାନାଃ । ୨ ପାର୍‌ମେଶ୍‌ବରାଆଃ ବିଚାର୍ ସାର୍‌ତି
ଆତଃ ନ୍ୟାୟ୍ ତାନାଃ । ଆପାଙ୍ଗିର୍ କାମି ହରାତେ ଅତେଦିଶୁମ୍‌କେ
ସଡ଼ରାକାଦ୍ ବେଶ୍ୟା କୁଡ଼ି ନାଗେନ୍ତେ ଠାଉକାଗି ସାଜାଇ
ଏମାକାନା । ପାର୍‌ମେଶ୍‌ବରାଆଃ ଦାସିକଆଃ ମାୟୋମ୍ ଲିଙ୍ଗିକାଦ୍
ହରାତେ, ଇନିଃକେ ପାର୍‌ମେଶ୍‌ବରା ସାଜାଇ ଏମାକାଇଜାଏ ।”
୩ ଆଇଙ୍ଗ୍ ଇନ୍‌କୁକେ ଆତଃମିସା କାଉରିକେଦ୍‌ତେ କାଜିତାନ୍
ଆୟୁମ୍‌କେଦ୍‌କଆଇଙ୍ଗ୍, “ପାର୍‌ମେଶ୍‌ବରାଆଃ ସାହାରାଅ ରିକାଏପେ ।
ଏନ୍ ମାରାଙ୍ଗ୍ ନାଗାର୍‌କେ ଜିୟନେତାନ୍ ସେଙ୍ଗେଲ୍‌ରେୟାଃ ସୁକୁଲ୍
ଜାନାଅ ଜାନାଅଗି ଚେତାନ୍‌ତେ ସୁକୁଲ୍‌ଃଆ ।” ୪ ରାଜଗାଦିରେ
ଦୁବାକାନ୍ ପାର୍‌ମେଶ୍‌ବରାଆଃ ଆୟାବ୍‌ରେ ବାର୍‌ହିସି ଉପୁନିୟା
ପ୍ରାଚିନକ ଆତଃ ଉପୁନିୟା ଜାଁତୁକ ଅମ୍‌ୟାୟାନ୍‌ଲଃ ଜହାର୍‌କେଦ୍‌ତେ
କାଜିକେଦାକ, “ଆମେନ୍ ! ପାର୍‌ମେଶ୍‌ବରାଆଃ ସାହାରାଅ ହବାଅଃକା
।”

ମିଶ୍ରିହନ୍‌ଆଃ ଆଣ୍ଡି ଭୋଜି

୫ ଏନ୍ତେ ରାଜଗାଦିଏତେ ମିଆଁଦ୍ ଲାବ୍‌ଜା ଆୟୁମ୍‌ୟାନା,
“ପାର୍‌ମେଶ୍‌ବରାଆଃ ଦାସିକ ଆତଃ ଆଇଃକ୍‌କେ ବରଭାକ୍ତିତାନ୍
ହୁଡ଼ିଙ୍ଗ୍, ମାରାଙ୍ଗ୍ ସବେନ୍ ହଡ଼କ ଇନିୟାଃ ସାହାରାଅ ରିକାଏପେ
।” ୬ ଆଇଙ୍ଗ୍ ଆତଃଗି ଗାଦେଲ୍ ହଡ଼କଆଃ ଲାବ୍‌ଜା ଲେକା,
ଦରେୟାରେୟାଃ ଆଲ୍‌ପୁଙ୍ଗ୍ ସାଡ଼ିତାନ୍ ଲେକା, ରିମିଲ୍ ସାଡ଼ିତାନ୍
ଲେକା ଆତଃ ଠେରତାନ୍‌ରେୟାଃ ସାଡ଼ି ଲେକା ମିଆଁଦ୍ ସାଡ଼ିଙ୍ଗ୍
ଆୟୁମ୍‌କେଦା, “ପାର୍‌ମେଶ୍‌ବରାଆଃ ସାହାରାଅ ହବାଅଃକା, ତିଆଃତି

ଆରୁଆଃ ପ୍ରାଭୁ ପୁରାଃ ପେଡ଼େୟାନ୍ ପାରମେଶ୍ଵାର୍ ତାନିଃ, ଇନିଃ ଏସ୍‌କାର୍ ଆରୁଆଃ ରାଜା ତାନିଃ ! ^୭ ଲାୟା ରାସ୍‌କାତାନ୍‌ଲଃ ଏଲା ହିନ୍ଦୁଃପେ, ଇନିୟାଃ ମାଇନାନ୍‌ରୁ ରିକାଏୟା, ମିଣ୍ଡିହନ୍‌ଆଃ ଆଣ୍ଡିରେୟାଃ ଦିପିଲି ସେଟେରାକାନା, ଏନାମେନ୍ତେ ଆୟାଃ ନାଞ୍ଜା କୁଡ଼ି ଆପାନ୍‌କେ ସେକାଡେନ୍‌ତାନା । 「ଆୟାଃ ତୁସିୟେନ୍‌ ନାଗେନ୍ତେ ଫାର୍‌ତି ଆଡଃ ପୁରାଃ ପୁଣ୍ଡି ଝାକ୍‌ମାକ୍ ଉନ୍‌ରାଃ ଲିଜାଃ ନାମାକାଦାଏ ।」 ପାରମେଶ୍ଵାର୍‌ଆଃ ହଡ଼କଆଃ ଧାର୍‌ମାନ୍ କାମି ହବାଅଃତାନା ଏନ୍ ନାରାମ୍ ଲିଜାଃ ।

^୮ ☆ଏନ୍ତେ ଦୁଁଡ଼ ଆଇଙ୍ଗ୍‌କେ କାଜିକେଦିୟାଁ, “ଅଲ୍‌କେଦତେ ଦହେମେ, ଅକନ୍‌କ ମିଣ୍ଡିହନ୍‌ଆଃ ଆଣ୍ଡି ଭୋଜିରେ କେଡ଼ାକାନାକ ଇନ୍‌କୁ ଧାଇନ୍‌ଗିୟାକ ।” ଇନିଃ ଆଡଃଗି କାଜିକେଦାଏ, “ନେଆଁ ପାରମେଶ୍ଵାର୍‌ଆଃ ସାର୍‌ତି ବାଚାନ୍‌ ତାନାଃ ।”

^{୧୦} ଆଇଙ୍ଗ୍ ଏନ୍ ଦୁଁଡ଼କେ ସୁନ୍‌ସାର୍ ରିକା ନାଗେନ୍ତେ ଆୟାଃ କାଟା ସୁବାରେଇଙ୍ଗ୍ ଉୟୁଃୟାନା । ମେନ୍‌ଦ ଇନିଃ ଆଇଙ୍ଗ୍‌କେ କାଜିକେଦିୟାଁ, “ଏନ୍ ଲେକା ଆଲମ୍ ରିକାଏୟା । ଆଇଙ୍ଗ୍ ଆମାଃ ଗାତିଦାସି ତାନିଙ୍ଗ୍ ଆଡଃ ଆମାଃ ହାଗା ମିଶିକ ଲେକାଗି ଆଇଙ୍ଗ୍ ଯାଶୁଆଃ ଗାଞ୍ଜା ଏମ୍‌ନିଃ ତାନିଙ୍ଗ୍ । ଆପେ ଲେକା ଆଇଙ୍ଗ୍ ହଗି ଯାଶୁ ଉଦୁବାକାଦ୍ ସାନାର୍‌ଡିକେଇଙ୍ଗ୍ ତେଲାକାଦା । ପାରମେଶ୍ଵାର୍‌କେ ଏସ୍‌କାର୍ ସୁସାରିମେ ।” ଚିଆଃଚି ଯାଶୁ ନାଗେନ୍ତେ ଗାଞ୍ଜା ହବାଅଃତାନା, ଆୟାର୍‌କାଜିରାଃ ଏନେଟେଦ୍ ଆମ୍ ଲେକ୍‌ନାଃ ।

ପୁଣ୍ଡି ସାଦମ୍‌ରେ ଦୁବାକାନ୍‌ନିଃ

^{୧୧} ଏନ୍ତେ ଆଇଙ୍ଗ୍ ସିର୍ମା ନିଜାକାନ୍ ନେଲ୍‌କେଦାଇଙ୍ଗ୍ । ଏନ୍ତାଃରେ ପୁଣ୍ଡି ସାଦମ୍‌ରେ ଦୁବାକାନ୍‌ନିଃକେ ନେଲ୍‌କିଜାଇଙ୍ଗ୍ । ଏନ୍ ସାଦମ୍‌ରେ ଦୁବାକାନ୍‌ନିୟାଃ ନୁଡୁମ୍ ପାତିୟାର୍‌ରଃନିଃ ଆଡଃ ସାର୍‌ତି । ଇନିଃ ନ୍ୟାୟ ଲେକାତେ ବିଚାର୍ ରିକାଃଏ ଲାଡ଼ାଇ ରିକାଃଏ । ^{୧୨} ଇନିୟାଃ ମେଦ୍ ଜୁଲଃତାନ୍ ସେଙ୍ଗେଲ୍ ଲେକା ଆଡଃ ଇନିୟାଃ ବହଃରେ ପୁରାଃଗି ମୁକୁର୍ ତାଇକେନା । ଇନିୟାଃ ତେତାନ୍‌ରେ ମିଆଁଦ୍ ନୁଡୁମ୍ ଅଲ୍‌କାନ୍ ତାଇକେନା, ମେନ୍‌ଦ ଏନା ଚିନାଃ ତାନାଃ,

☆ ୧୯:୯ ୧୯:୯ ମାଥୁଜ ୨୨:୨,୩.

ଏନା ଆଇଠକକେ ବାଗିକେଦ୍‌ତେ ଜେତାଏ କାକ ସାରିୟା ।
 ୧୩ ଇନିଠ ତୁସିଙ୍ଗାକାନ୍ ଲିଜାଠ ମାୟୋମ୍‌କାନ୍ ତାଇକେନା । ଇନିୟାଠ
 ନୁତୁମ୍ “ପାର୍‌ମେଶ୍‌ବରାଆଠ ବାଚାନ୍ ମେନ୍ତେ ସାରିୟା ତାଇକେନା
 ।” ୧୪ ସିର୍ମାରେନ୍ ଫାଉଦକ, ନିରାଲ୍, ପୁରାଠ ପୁଣ୍ଡି ଫାଉତି ଆତଠ
 ଝାକ୍‌ମାକ୍ ଉନ୍‌ରାଠ ଲିଜାଠ ତୁସିଙ୍ଗାୟାନ୍‌ଲଠ, ପୁଣ୍ଡି ସାଦମ୍‌ ଚେତାନ୍‌ରେ
 ଦୁବକେଦ୍‌ତେ ଇନିଠକେକ ଅତଙ୍ଗ୍‌ଲ୍ ତାଇକେନା । ୧୫ ☆ଇନିୟାଠ
 ମଚାଏତେ ମିଆଁଦ୍ ଲେସେରାକାନ୍ ତାରାଉଡ଼ି ଅତଙ୍ଗ୍‌ଅଥା ।
 ଏନାଲଠ ଅତେରେନ୍ ସବେନ୍ ହଡକକେ ହାରାଅକଥା । ଆତଠ ଇନିଠ
 ଇନ୍‌କୁକେ ମେଡେଦ୍‌ରାଠ ସଚାତେ ହୁମାଠକଥା ଆତଠ ପେଡେୟାନ୍
 ପାର୍‌ମେଶ୍‌ବରାଆଠ ପୁରାଠ ଖ୍‌ସ୍ ଲେକାନ୍ ଦାଖ୍‌ନାଡ଼ିକେ ଘାନାରେ
 ଆଇଠକ୍‌ଗି ପେରାଅକେଦ୍‌ତେ ଏନାଏତେ ଦାଖ୍‌ରାସି ଅତଙ୍ଗ୍‌ୟେଆ
 । ୧୬ ଇନିୟାଠ ଲିଜାଠ ଚେତାନ୍‌ରେ ଆତଠ ବୁଲୁରେ ନେ ନୁତୁମ୍
 ଅଲ୍‌କାନ୍ ତାଇକେନା, “ରାଜାକଆଠ ରାଜା ଆତଠ ପ୍ରାଭୁକଆଠ ପ୍ରାଭୁ
 ।”

୧୭ ଏନ୍ତେ ଆଇଙ୍ଗ୍ ମିଆଁଦ୍ ଦୁଁଡକେ ସିଙ୍ଗି ଚେତାନ୍‌ରେ
 ଡିଙ୍ଗୁଆକାନ୍ ନେଲ୍‌କିୟାଇଙ୍ଗ୍ । ଥାଲା ସିର୍ମାରେ ଆଫିରତାନ୍
 ସବେନ୍ ଚେଣ୍ଟକକେ କାଉରିକେଦ୍‌ତେ କାଜିକେଦ୍‌କଥା, “ଏଲା,
 ପାର୍‌ମେଶ୍‌ବରାଆଠ ମାରାଙ୍ଗ୍ ଭୋଜିରେ ମେସାନ୍ ନାଗେନ୍ତେ ହୁଣ୍ଡିନ୍‌ପେ
 ! ୧୮ ରାଜା, ପାଲ୍‌ଟାନ୍, ସିପାଲ, ସାଦମ୍, ସାଦମ୍‌ରେ ଦୁବାକାନ୍,
 କିରିଙ୍ଗାୟାକାନ୍ ଦାସି, ପେଡେୟାନ୍ ହଡ, କା ପେଡେୟାନ୍ ହଡ, ନେ
 ସବେନ୍‌କଆଠ ଜିଲୁକେ ହିଜୁଠକେଦ୍‌ତେ ଜମେପେ ।”

୧୯ ଏନ୍ତେ ଆଇଙ୍ଗ୍ ନେଲ୍‌କେଦାଇଙ୍ଗ୍, ଏନ୍ ସାଦମ୍‌ରେ ଦୁବାକାନ୍‌ନିଠ
 ଆତଠ ଆୟାଠ ପାଲ୍‌ଟାନ୍‌କଆଠ ବିରୁଧ୍‌ରେ ଲାଡ଼ାଇ ନାଗେନ୍ତେ ଏନ୍
 ଜାଁତୁ ଆତଠ ଅତେଦିଶୁମ୍‌ରେନ୍ ସବେନ୍ ରାଜା ଆତଠ ଇନ୍‌କୁଆଠ
 ସବେନ୍ ପାଲ୍‌ଟାନ୍‌କ ମିଦ୍‌ତାଠରେ ହୁଣ୍ଡିୟାନାକ । ୨୦ ☆ଏନ୍
 ମାପାଠତୁପୁଇଙ୍ଗ୍‌ରେ ଜାଁତୁ ଆତଠ ଇନିୟାଠ ଆୟାଠରେ ଆକ୍‌ଦାନ୍‌ଅ
 କାମିକ ରିକାତାନ୍, ଏନ୍ ହସଡ ନାବୀ ସାନାବ୍‌ୟାନ୍‌ଲଠ ତନଲ୍‌ରେ
 ଦହୟାନା । ଅକନ୍‌କଆଠରେ ଜାଁତୁରାଠ ଚିହ୍ନା ତାଇକେନା ଆତଠ
 ଅକନ୍‌କ ଆୟାଠ ମୁରୁଡକେକ ସେଞ୍ଜା ତାଇକେନା, ଇନ୍‌କୁକେ

☆ ୧୯:୧୫ ୧୯:୧୫ ଉତ୍କଳ କାଜି ୧୪:୨୦.

☆ ୧୯:୨୦ ୧୯:୨୦ ଉତ୍କଳ କାଜି

ଏନ୍ ଜାଁତୁ ଆୟାଃ ଆକଦାନ୍ଦାଅ କାମିତେ ବେଦାକ ତାଇକେନା । ଜାଁତୁ ଆତଃ ଏନ୍ ହସଡ ନାବୀ ହୁଆଙ୍ଗାଡାରେ ଜାନିଦଗି ହୁରାଙ୍ଗାୟାନାକିନ୍ । ୨୧ ଆତଃ ଇନକିନାଃ ପାଲଗାନ୍ଦକ ଆତଃ ସାଦମ୍ରେ ଦୁବାକାନକ, ମଚାଏତେ ଅତଙ୍ଗଅଃତାନ୍ ତାରାଉଡ଼ିଲଃ ମାଆଃୟାନାକ, ଆତଃ ସବେନ୍ ଚେଣୈକ ଆକଆଃ ଇଛାସାନାଙ୍ଗ ଲେକା ଇନକୁଆଃ ଜିଲୁ ଜମ୍ବେଦାକ ।

୨୦

ମିଦ୍ ହାଜାର୍ ବାରାଷ୍ରେୟାଃ ରାଇଜ୍

୧ ଏନ୍ଦ୍ ଆଇଙ୍ଗ୍ ଆତଃମିଆଁଦ୍ ଦୁଁଡ଼କେ ସିମାଏତେ ଆଡ଼ଗୁନ୍ତାନ୍ ନେଲକିୟାଇଙ୍ଗ୍ । ଇନିୟାଃ ତିଃଇରେ ହୁଆଙ୍ଗାଡାରେୟାଃ ଚାଡ଼ି ଆତଃ ମିଆଁଦ୍ ହାମ୍ପାଲ୍ ସିକ୍ତି ତାଇକେନା । ୨ ଇନିଃ ଏନ୍ ମାରାଙ୍ଗ୍ ବିଙ୍ଗ୍, ଚାଏ ସାଏତାନକେ ସାବ୍ବକେଦ୍ରେ ମିଦ୍ ହାଜାର୍ ବାରାଷ୍ ଜାକେଦ୍ ସିକ୍ତିତେ ତଲକିୟାଏ, ୩ ଆତଃ ହୁଆଙ୍ଗାଡାରେ ହୁରାଙ୍ଗାକେଦ୍ରେ ଏନାରେୟାଃ ଦୁଆର୍ ହାଣ୍ଡେଦକେଦାଏ ଆତଃ ଏନ୍ ଚେତାନ୍ରେ ମୋହର୍ ଏମ୍ବେଦାଏ । ମିଦ୍ ହାଜାର୍ ବାରାଷ୍ ଆଉରି ପୁରାଃଅ ଜାକେଦ୍ ଇନିଃ ଆତଃ ଜେତାନ୍ ଦିଶୁମ୍ରେନ୍ ହଡ଼କକେ ବେଦା କାଏ ଦାଡ଼ିୟା । ନେଆଁ ତାୟମ୍ରେ ଘାଡ଼ିକାଦ୍ ନାଙ୍ଗ୍ ଇନିଃକେ ଆତଃମିସା ରାଡ଼ାଅଃଆ ।

୪ ଏନ୍ଦ୍ ଆଇଙ୍ଗ୍ ନେଲକେଦାଇଙ୍ଗ୍, ଚିମିନ୍ ରାଜଗାଦିକ ଆତଃ ଏନାକରେ ଦୁବାକାନ୍ ହଡ଼କକେ ବିଚାର୍ ନାଗେନ୍ଦ୍ ଆକ୍ତେୟାର୍ ଏମାକାନା । ଆତଃଗି ଚିମିନ୍ ଗଜାକାନ୍ ହଡ଼କଆଃ ଆମ୍ବାକକେଇଙ୍ଗ୍ ନେଲକେଦକଆ, ଇନକୁ ଯାଶୁ ଉଦୁବାକାଦ୍ ସାନାରୁତି ଆତଃ ପାର୍ମେଶ୍ଵାର୍ଆଃ ବାଚାନକେ ଉଦୁବ୍ବକେଦ୍ ହରାତେ ଏନ୍ ହଡ଼କ ଗନଏଃ ସାଜାଇ ନାମାକାଦ୍ ତାଇକେନାକ । ଇନକୁ ଜାଁତୁ ଚାଏ ମୁରୁଡ଼କକେ କାକ ଜହାର୍କାଦ୍କ ତାଇକେନା, ଚାଏ ମିଲଙ୍ଗ୍ ଆତଃ ତିଃଇରେ ଜାଁତୁରାଃ ଚିଙ୍ଗାଁ କାକ ଖଦାକାନ୍ ତାଇକେନା । ଇନକୁ ଖ୍ରୀଷ୍ଟଲଃ ମିଦ୍ ହାଜାର୍ ବାରାଷ୍ ରାଇଜେ ନାଗେନ୍ଦ୍ ଜୀଉବିନିଦାକାନ୍ ତାଇକେନାକ । ୫ ଏନ୍ ମିଦ୍ ହାଜାର୍ ବାରାଷ୍ ଆଉରି ପୁରାଃଅ ଜାକେଦ୍ ଏଚାଃ ଜେତାନ୍ ଗଜାକାନ୍ ହଡ଼କଆଃ ଜୀଉବିନିରିଦ୍ କା ହବାକାନ୍ ତାଇକେନା । ନେଆଁଦ୍ ପାହିଲା ଜୀଉବିନିରିଦ୍ ତାନାଃ

। ^୬ ଗଜାକାନ୍ ହତକଥାଃ ନେ ପାହିଲା ଜୀଉବିନିରିଦ୍ରେ ଅକନ୍ଦକ ହିସାକ ନାମାକାଦା, ଇନ୍ଦୁ ଚିମିନ୍ ଧାଇନ୍ ଆତଃ ପାବିତାର୍ଗିୟାଃକ ! ଇନ୍ଦୁଥାଃ ବାର୍ଯ୍ୟା ଗନ୍ଧଃ କା ହବାଅଃଥା । ଇନ୍ଦୁ ପାର୍ମେଶ୍ଵାର୍ଥାଃ ଆତଃ ଖ୍ରୀଷ୍ଟାଃ ଯାଜାକ୍ ହବାକେଦ୍ରେ ଖ୍ରୀଷ୍ଟଲଃ ମିଦ୍ ହାଜାର୍ ବାରାଷ୍ଟ ଜାକେଦ୍ ରାଇଜେୟାକ ।

ସାଏତାନ୍ରାଃ ଚୁଣ୍ଡ ହାରାଥ

^୭ ମିଦ୍ ହାଜାର୍ ବାରାଷ୍ଟ ପୁରାୟାନ୍ ତାୟମ୍ରେ ସାଏତାନ୍କେ ତଲାକାନ୍ହେତେ ରାଡ଼ାଅଃଥା, ^୮ ଗୋଗ୍ ଆତଃ ମାଗୋଗ୍ ଲେକା ଅତେରେୟାଃ ଚାରିୟସାଃରେ ଦରେୟାରେନ୍ ଗିତିଲ୍ ଲେକା ଛିତିବିତିକାନ୍ କିଲିକଥାଃ କା ଲେକା ଦାଡ଼ିୟଃ ହତକକେ ସାଏତାନ୍ ବେଦାକେଦ୍ରେ ଲାଡ଼ାଇ ନାଗେନ୍ତେ ମିଦ୍ରେ ହୁଣ୍ଡିକଥା । ^୯ ଇନ୍ଦୁ ଅତେରେୟାଃ ଚାରିୟସାଃ ସେନ୍କେଦ୍ରେ ପାର୍ମେଶ୍ଵାର୍ଥାଃ ହତକଥାଃ ତାଇନଃ ଠାୟାଦ୍ କୁମ୍ପାକକେ ଆତଃ ପାର୍ମେଶ୍ଵାର୍ଥାଃ ଦୁଲାଡ଼ ନାଗାର୍କେ କେସେଦ୍ ବିୟୁରେୟାକ । ମେନ୍ଦ୍ ସିମ୍ପାଏତେ ସେଙ୍ଗେଲ୍ ଉୟୁଃକେଦ୍ରେ ଇନ୍ଦୁକେ ଜିୟନ୍ତକଥା, ^{୧୦} ଆତଃ ଅକ ଜୁଲଃତାନ୍ ହୁଆଙ୍ଗାଡ଼ାରେ ଜାତୁ ଆତଃ ହସଡ଼ ନାବୀ ହୁରାଙ୍ଗାନ୍ ତାଇକେନାକ, ହସଡ଼ନିଃ ସାଏତାନ୍ ହଗି ଏନାରେ ହୁରାଙ୍ଗାଅଃଥା । ଏନ୍ତାଃରେ ଇନ୍ଦୁ ନିଦାସିଙ୍ଗି ଜାନାଥ ଜାନାଥ ଦୁକୁକ ନାମେୟା ।

ଚୁଣ୍ଡ ରିଚାର୍

^{୧୧} ଏନ୍ତେ ଆଇଙ୍ଗ୍ ମିଆଁଦ୍ ମାରାଙ୍ଗ୍ ପୁଣ୍ଡି ରାଜଗାଦି ଆତଃ ଏନାରେ ମିହୁଡ଼୍ ଦୁବାକାନ୍ନିଃକେଇଙ୍ଗ୍ ନେଲ୍କିୟା । ଇନିୟାଃ ହେପାଦ୍ହେତେ ଅତେ ଆତଃ ସିମ୍ପା ନିରୁୟାନା ଆତଃ ଇନ୍ଦିନାଃ ନାଗେନ୍ତେ ଉକ୍ତଃ ନାଙ୍ଗ୍ ଠାୟାଦ୍ କା ନାମୟାନା । ^{୧୨} ଏନ୍ତେ ଆଇଙ୍ଗ୍ ଗଜାକାନ୍କକେ, ମାପୁରାଙ୍ଗକକେ ଆତଃ ହୁପ୍ତିଙ୍ଗକକେ ପାର୍ମେଶ୍ଵାର୍ଥାଃ ରାଜଗାଦି ଆୟାର୍ରେ ତିଙ୍ଗୁଆକାନାଇଙ୍ଗ୍ ନେଲ୍କେଦ୍କଥା । ଆତଃ ପୁଥୁକ ଅଟାଃୟାନା, ଏନ୍ ପୁଥୁକଏତେ ଜୀଦାନ୍ ପୁଥୁ ନୁଡୁମ୍ ମିଆଁଦ୍ ପୁଥୁ ତାଇକେନା । ଏନ୍ ଜୀଦାନ୍ ପୁଥୁରେ ହତକଥାଃ କାମିଡଦାମ୍ ବିଷାଏରେ ଅକ୍ନାଃ ଅଲାକାନ୍ ତାଇକେନା, ଏନ୍ ଲେକାତେ ଇନ୍ଦୁଥାଃ ବିଚାର୍ ହବାୟାନା । ^{୧୩} ଏନ୍ତେ ଦରେୟା ଭିତାର୍ରେ ଗଜାକାନ୍ ହତକ ବିରିଦ୍ୟାନାକ । ଗନ୍ଧଃଗାଡ଼ାରେ

ଗଜାକାନ୍ ହତକ ହଗି ବିରିଦ୍‌ୟାନାକ । ଇନ୍‌କୁ ସବେନ୍‌କ ଆକଆଃ
ଆକଆଃ କାମିଉଦାମ୍ ଲେକାତେ ବିଚାର୍‌ୟାନାକ । ୧୪ ଏନ୍ତେ ଗନଏଃ
ଆତଃ ଗନଏଃ ଗାତାକେ, ଏନ୍ ହୁଆଙ୍‌ଗାଡ଼ାରେ ହୁରାଙ୍‌ ଏଣ୍ଡାୟାନା
। ନେ ହୁଆଙ୍‌ଗାଡ଼ା ହବାଅଃତାନା ବାରସା ଗନଏଃ । ୧୫ ଅକନ୍
ହତକଆଃ ନୁଡୁମ୍ ଜୀଦାନ୍ ପୁଥ୍‌ରେ କା ଅଲ୍‌କାନ୍ ତାଇକେନା,
ଇନ୍‌କୁ ହଗି ସବେନ୍‌କ ହୁଆଙ୍‌ଗାଡ଼ାରେ ହୁରାଙ୍‌ୟାନାକ ।

୨୧

ନାଞ୍ଜା ସିର୍ମା ଆତଃ ନାଞ୍ଜା ଅତେ

୧ ☆ଏନ୍ତେ ଚୁଣ୍ଡୁର ଆଇଙ୍‌ ନାଞ୍ଜା ସିର୍ମା ଆତଃ ନାଞ୍ଜା ଅତେ
ନେଲ୍‌କେଦାଇଙ୍‌ । ପାହିଲ୍‌ରେୟାଃ ଅତେ, ସିର୍ମା ଆତଃ ଦରେୟା କା
ନେଲ୍‌ୟାନା । ୨ ☆ଏନ୍ତେ ଆଇଙ୍‌ ସିର୍ମାରେନ୍ ପାର୍‌ମେଶ୍ଵାର୍‌ତାଃଏତେ
ପାବିତାର୍ ନାଗାର୍ ଲାତାର୍‌ତେ ଆଡ଼ଗୁଃତାନ୍ ନେଲ୍‌କେଦାଇଙ୍‌ । ନେ
ପାବିତାର୍ ନାଗାର୍‌ଗି ନାଞ୍ଜା ଯୀରୁଶାଲେମ୍ ତାନାଃ । କଡ଼ା ନାଗେନ୍ତେ
କୁଡ଼ି ଜେ'ଲେକା ସିଙ୍‌ରାଅକାନ୍‌ଗି ତାଇନାଃ, ଏନ୍‌ଲେକାଗି ନେଆଁ
ସାପ୍‌ଡ଼ାଅକାନ୍ ତାଇକେନା । ୩ ଆତଃ ସିର୍ମାରେୟାଃ ରାଜ୍‌ଗାଦିଏତେ
ମିଆଁଦ୍ ଲାବ୍‌ଜା ଆୟ୍‌ମ୍‌କେଦାଇଙ୍‌, “ନାହାଁଃଦ ପାର୍‌ମେଶ୍ଵାର୍‌ଆଃ
ତାଇନଃ ଠାୟାଦ୍ ହତକ ଆଲ୍‌ରେ ମେନାଃ, ଇନିଃ ଇନ୍‌କୁଆଃ
ଆଲ୍‌ରେ ତାଇନା ଆତଃ ଇନ୍‌କୁ ଆୟାଃ ହତକ ହବାଅଆଃକ ।
ପାର୍‌ମେଶ୍ଵାର୍ ଇନ୍‌କୁଲଃ ତାଇନାଏ ଆତଃ ଇନ୍‌କୁଆଃ ପାର୍‌ମେଶ୍ଵାର୍
ହବାଅଆଃଏ । ୪ ଇନିଃ ଇନ୍‌କୁଆଃ ମେଦ୍ ଦାଆଃ ଜଦେୟାଏ ।
ଗନଏଃ, ଏୟମ୍, ରାନାଃ, ଆତଃ ହାସୁ ଜେଡ଼ନାଃ କା ହବାଅଆ ।
ସବେନ୍ ମାରିତେୟାଃକ କା ନେଲ୍‌ୟାନା ।”

୫ ରାଜ୍‌ଗାଦିରେ ଦୁବାକାନ୍ ହତ କାଜିକେଦାଏ, “ହେଗି, ଆଇଙ୍‌
ସବେନାଃକେଇଙ୍‌ ନାଞ୍ଜାକାଦା ।” ଆତଃ ଇନିଃ ଆଇଙ୍‌କେ
କାଜିକେଦିୟାଁ, “ନେ ସବେନ୍ କାଜି ଅଲ୍‌କେଦ୍‌ତେ ଦହେମେ, ଚିଆଃଚି
ନେଆଁ ସାର୍‌ଚି ଆତଃ ପାତିୟାର୍‌ରଃତେୟାଃ ତାନାଃ ।” ୬ ଆତଃଚି
ଇନିଃ କାଜିକେଦିୟାଁଏ, “କାମି ଚାବାକାନା । ଆଇଙ୍‌ ସୁରୁଇନିଃ
ଆତଃ ଚାବାଏନିଃ, ମୁନ୍‌ ଆତଃ ଚୁଣ୍ଡୁ ତାନିଙ୍‌ । ତେତାଙ୍‌ତାନିଃକେ

☆ ୨୧:୧ ୨୧:୧ ୨ ପାଡ଼ରାୟ ୩:୧୩.

☆ ୨୧:୨ ୨୧:୨ ଉତ୍କଳ କାଜି ୩:୧୨.

ଜୀଦାନରେୟାଃ ସେତେଜ୍ ଦାଆଃ ବେଗାର୍ ଗନଙ୍ଗେତେ ନୁଁଏ ନାଙ୍ଗ୍ ଏମାଲୟାଲଙ୍ଗ୍ ।^୭ ଅକନକ ଜିତାଅଃଆକ, ଆଇଙ୍ଗ୍ ଇନକ୍କୁକେ ନେ ନାଲା ଏମାକଆଇଙ୍ଗ୍, ଆଇଙ୍ଗ୍ ଇନକ୍କୁଆଃ ପାର୍ମେଶ୍ଵାର୍ ହବାଅଃଆଇଙ୍ଗ୍ ଆତଃ ଇନକ୍କୁ ଆଇଁୟାଃ ହନକ ହବାଅଃଆକ ।
 「 ମେନ୍ଦ ବରଏତାନକ, କା ବିଶ୍ଵାସ୍ତାନକ, ଏତ୍କାନ ଚାଇଲ୍ ଚାଲାନକ, ହତ୍ତ ଗଗଏଃକ, ଆପାଙ୍ଗିର୍ କାମିତାନକ, ଦେଅଁଣାତାନକ, ମୁରୁତ୍ ସୁନୁସାରକ, ଆତଃ ହସତ୍ତ କାଜିତାନକ, ନେଲେକାନ ସବେନ୍ ହତ୍ତକଆଃ ଠାୟାଦ୍ ହବାଅଃତାନା ଜୁଲଃତାନା ହୁଆଙ୍ଗାଡ଼ା । ନେଆଁଗି ଇନକ୍କୁଆଃ ବାର୍ସା ଗନଏଃ ତାନାଃ ।”

ନାଞ୍ଜା ଯୀରୁଶାଲେମ୍

^୮ ଏୟା ଚୁଣ୍ଡି ଦୁକୁହାସୁତେ ପେରେଜାକାନ ଏୟା ତୁଭା ସାବାକାଦ୍ ଏୟା ଦୁଁଡକଏତେ ମିହୁଡ୍ ଆଇଙ୍ଗ୍ତାଃତେ ହିଜୁଃକେଦ୍ତେ କାଜିକେଦିୟା, “ହିଜୁଃମେ, ଆଇଙ୍ଗ୍ ନାଞ୍ଜା ଆଣ୍ଡିକାନ କୁଡିକେଇଙ୍ଗ୍ ଉଦୁବାମେୟା, ଇନିଃ ମିଣ୍ଡିହନଆଃ କୁଡି ତାନିଃ ।”^{୧୦} ଏନ୍ତେ ପାବିତାର୍ ଆମ୍ବା ଆଇଙ୍ଗ୍କେ ଆକ୍ତେୟାରକିଦିୟା ଆତଃ ଦୁଁଡ୍ ଆଇଙ୍ଗ୍କେ ମିଆଁଦ୍ ମାରାଙ୍ଗ୍ ସାଲାଙ୍ଗି ବୁରୁ ଚୁଟିତେ ଇଦିକିଦିୟା, ଇନିଃ ଆଇଙ୍ଗ୍କେ ପାବିତାର୍ ନାଗାର୍ ଯୀରୁଶାଲେମ୍କେ ଉଦୁବାଦିୟା । ଆଇଙ୍ଗ୍ ଏନ୍ ନାଗାର୍କେ ପାର୍ମେଶ୍ଵାର୍ତାଃଏତେ ସିର୍ମାଏତେ ଆଡ୍ଗୁଃତାନ ନେଲକେଦାଇଙ୍ଗ୍ ।^{୧୧} ଏନ୍ ନାଗାର୍ ପାର୍ମେଶ୍ଵାର୍ଆଃ ମାନାରାଙ୍ଗ୍ରେ ଚାମ୍କାଅଃ ତାଇକେନା, ଏନାରେୟାଃ ମାର୍ସାଲ୍ ପୁରାଃ ଗନଙ୍ଗ୍ଆନ୍ ମତି ଆତଃ ସିଙ୍ଗିରାଃ ନିରାଲ୍ ଆଏନା ଲେକା ଝାଲ୍ସାଃଅ ତାଇକେନା ।^{୧୨} ଏନାରେ ମିଆଁଦ୍ ମାରାଙ୍ଗ୍ ସାଲାଙ୍ଗି ପାଚ୍ରି ତାଇକେନା । ଏନାରେ ଗେଲ୍ବାର୍ ଦୁଆର୍ ତାଇକେନା, ଏନାକେ ଗେଲ୍ବାର୍ ଦୁଁଡକ ହରତାଇକେନାକ ଆତଃ ଏନ୍ ଦୁଆର୍ ତେତାନରେ ଇସ୍ରାଏଲ୍ ହତ୍ତକଆଃ ଗେଲ୍ବାର୍ କିଲିକଆଃ ନୁତୁମ୍ ଅଲାକାନ ତାଇକେନା ।^{୧୩} ଆତଃ ଏନ୍ ପାଚ୍ରିରେୟାଃ ଉପୁନ୍ସାଃରେ ଆପିୟା ଦୁଆର୍ ତାଇକେନା, ପୁରାଦ୍ସାଃରେ ଆପିୟା ଦୁଆର୍, ଉତ୍ତାର୍ସାଃରେ ଆପିୟା ଦୁଆର୍, ଦାକ୍ଷିଣ୍ଡାଃରେ ଆପିୟା ଦୁଆର୍, ପାଶ୍ଚିମ୍ସାଃରେ ଆପିୟା ଦୁଆର୍ ତାଇକେନା ।^{୧୪} ନାଗାର୍ରେୟାଃ ନେ ପାଚ୍ରି ଗେଲ୍ବାର୍ ଦିରିତେ ବାଇୟାକାନ

ନିହଂଗାଡ଼ା ତାଇକେନା ଆଡ଼ଃ ଏନ୍ ନିହଂଗାଡ଼ା ଚେତାନ୍ରେ
 ମିଶ୍ରିହନ୍‌ଆଃ ଗେଲ୍‌ବାର୍ ପେରିଡ଼କଆଃ ନୁଡୁମ୍ ଅଲ୍‌କାନ୍
 ତାଇକେନା । ୧୫ ଆଇଁୟାଃଲଃ ଜାଗାର୍‌ତାନ୍ ଦୁଡ଼ିଆଃ ଡିଃଇରେ
 ନାଗାର୍, ପାର୍‌ରି ଆଡ଼ଃ ଦୁଆର୍କକେ ସଙ୍ଗ୍‌ଏ ନାଗେନ୍ତେ ମିଆଁଦ୍
 ସୋନାରାଃ ସଙ୍ଗ୍‌ଏ ସଟା ତାଇକେନା । ୧୬ ଏନ୍ ନାଗାର୍‌ରେୟାଃ
 ଚାରିୟସାଃ ମିଦ୍‌ଗି ତାଇକେନା, ଏନାରାଃ ଚାକାର୍ ଆଡ଼ଃ ଜିଲିଙ୍ଗ୍
 ମିଦ୍‌ଗି ତାଇକେନା । ଦୁଡ଼ି ଆୟାଃ ସଙ୍ଗ୍‌ଏ ସଟାତେ ନାଗାର୍କକେ
 ସଙ୍ଗ୍‌କେଦା । ଏନାରେୟାଃ ଚାକାର୍ ୨,୪୦୦ କିଲୋମିଟର୍
 ତାଇକେନା । ଏନାରେୟାଃ ଜିଲିଙ୍ଗ୍ ଆଡ଼ଃ ସାଲାଙ୍ଗି ଚାକାର୍କଲଃ
 ମିଦ୍‌ଗି ତାଇକେନା । ୧୭ ଦୁଡ଼ି ଏନ୍ ପାର୍‌ରିରେୟାଃ ସାଲାଙ୍ଗି ହଗି
 ସଙ୍ଗ୍‌କେଦାଏ, ଏନା ୬୦ ମିଟର୍ ତାଇକେନା । ୧୮ ଏନ୍ ପାର୍‌ରି
 ପୁରାଃ ଗନଙ୍ଗ୍‌ଆଁନ୍ ଝାକ୍‌ମାକ୍ ଦିରିତେ ବାଇୟାକାନ୍ ତାଇକେନା,
 ଏନ୍ତେ ଏନ୍ ନାଗାର୍ ଫାର୍‌ଚି ସୋନା ଆଡ଼ଃ କାଁର୍‌ତେ ବାଇୟାକାନ୍
 ତାଇକେନା । ୧୯ ନାଗାର୍‌ରେୟାଃ ଚାରିୟସାଃରେ ତାଇକାନ୍
 ପାର୍‌ରିରେୟାଃ ନିହଂଗାଡ଼ାରେ ସବେନ୍ ଲେକାନ୍ ଗନଙ୍ଗ୍‌ଆଁନ୍
 ଦିରିତେ ସିଙ୍ଗ୍‌ରାଅକାନ୍ ତାଇକେନା । ପାହିଲା ନିହଂଗାଡ଼ା
 ହିରାତେ, ଏଗାଃ ନିହଂଗାଡ଼ା ମଣିତେ, ଆପିୟାତେୟାଃ ରାଙ୍ଗ୍‌ବିରାଙ୍ଗ୍
 ଗନଙ୍ଗ୍‌ଆଁନ୍ ଦିରିତେ, ଉପୁନିୟାତେୟାଃ ଝାଲ୍‌କାଅଃତାନ୍ ହାରିୟାର୍
 ଦିରିତେ ବାଇୟାକାନ୍ ତାଇକେନା । ୨୦ ମଣେୟାତେୟାଃ ପୁଲକ୍
 ମଣିତେ, ତୁରିୟାତେୟାଃ ମାଣିକ୍ୟ ମଣିତେ, ଏୟାତେୟାଃ ପୁଷ୍ପରାଗ୍
 ମଣିତେ, ଇରାଲିୟାତେୟାଃ ଫିରୋଜ୍ ମଣିତେ, ଅରେୟାତେୟାଃ
 ଗୋମେଦକ୍ ମଣିତେ, ଗେଲେୟାତେୟାଃ ଲଶୁନୀୟ ମଣିତେ,
 ଗେଲ୍‌ମିଆଁଦ୍ ଇନ୍ଦ୍ରନିଲ୍ ମଣିତେ ଆଡ଼ଃ ଗେଲ୍‌ବାର୍‌ତେୟାଃ
 ବୁଗିନ୍‌ସହାନ୍ ମଣିତେ ବାଇୟାକାନ୍ ତାଇକେନା । ୨୧ ଗେଲ୍‌ବାର୍
 ଦୁଆର୍କ ତାଇକେନା ଆଡ଼ଃ ଗେଲ୍‌ବାର୍ ମୋଡି ତାଇକେନା ।
 ମିମିଆଦ୍ ଦୁଆର୍କ, ମିମିଆଦ୍ ମୋଡିତେ ବାଇୟାକାନ୍ ତାଇକେନା,
 ନାଗାର୍‌ରେୟାଃ ହରା ଫାର୍‌ଚି ସୋନା ଆଡ଼ଃ କାଁର୍ ଲେକା ସୁଗାଡ଼ାନ୍‌ଗି
 ବାଇୟାକାନ୍ ତାଇକେନା ।

୨୨ ଆଇଙ୍ଗ୍ ନାଗାର୍‌ରେ ଜେତାନ୍ ମାନ୍ଦିର୍ କାଇଙ୍ଗ୍ ନେଲ୍‌କେଦା,
 ଚିୟାଃଚି ପୁରାଃ ପେଡେୟାନ୍ ପ୍ରାଭୁ ପାର୍‌ମେଶ୍ୱାର୍ ଆଡ଼ଃ ମିଶ୍ରିହନ୍

ଏନାରେନ୍ ମାନ୍ଦିର ତାନକିନ୍ । ୨୩ ଏନ୍ ନାଗାରକେ ମାର୍ଯ୍ୟାଲେ ନାଗେନ୍ତେ ଏନ୍ତାଃରେ ସିଙ୍ଗି ଚାଏ ଚାଣ୍ଡୁ କା ଲାଗାତିଙ୍ଗୟାଃ, ଚିୟାଃତି ପାରମେଶ୍ଵାରଆଃ ମାନାରାଙ୍ଗରେ ଏନା ମାର୍ଯ୍ୟାଲଃତାନା ଆତଃ ମିଣ୍ଡିହନ୍ ଏନାରେୟାଃ ଦିମି ତାନିଃ । ୨୪ ଅତେରେନ୍ ସବେନ୍ ହଡକ ଇନିୟାଃ ମାର୍ଯ୍ୟାଲରେ ହିନ୍ଦୁଃସେନଃ ରିକାଏୟାକ । ଅତେଦିଶ୍ଵମରେନ୍ ରାଜାକ ଆକଆଃ ମାନାରାଙ୍ଗକେ ପାରମେଶ୍ଵାରତାଃକ ଆଉଇୟା । ୨୫ ନାଗାରରେୟାଃ ସବେନ୍ ଦୁଆରକ ସବେନ୍ ଇମତା ନିଜାକାନଗି ତାଇନା । ଏନା ଚିତ୍ତଲାଅ କା ହାଣ୍ଡେଦଃଆ, ଚିଆଃତି ଏନ୍ତାଃରେ ଚିତ୍ତଲାଅ କା ନୁବାଗଃଆ । ୨୬ ସବେନ୍ ଦିଶ୍ଵମରେନ୍ ମାନାରାଙ୍ଗ ଆତଃ ମାଇନାନ୍ ନେ ନାଗାରରେ ହିନ୍ଦୁଃକେଦତେ ମିଦତାଃରେ ହୁଣ୍ଡିୟଃଆ । ୨୭ ଜେତାନ୍ ସଡରାକାନ୍ତେୟାଃକ ନେ ନାଗାରତେ କା ଆଉଅଃଆ । ହିଲାଙ୍ଗଆଃ ଲେକା କାଜିକାମିତାନ୍କ ଆତଃ ହସଡ କାଜିତାନ୍କ, ଜେତାଏ ନେ ନାଗାର କାକ ବଲ ଦାଡିୟା । ଅକନ୍କଆଃ ନୁତୁମ୍ ମିଣ୍ଡିହନ୍ଆଃ ଜୀଦାନ୍ ପୁଅରେ ଅଲ୍ଲାକାନା, ଇନ୍କୁ ଏସକାର୍ ନେ ନାଗାରରେ ବଲ ଦାଡିୟାକ ।

୨୨

୧ ଏନ୍ତେ ଏନ୍ ଦୁଡ୍ଡ, ନାଞ୍ଜା ଅତେଦିଶ୍ଵମରେ ଜୀଦାନ୍ ଦାଆଃରାଃ ଗାଡାଏ ଉଦୁବାଦିୟା, ଏନା ଫାରତି ଆତଃ ନିରାଲଗି ତାଇକେନା । ନେ ଗାଡା ପାରମେଶ୍ଵାରଆଃ ଆତଃ ମିଣ୍ଡି ହନ୍ଆଃ ରାଜଗାଦିହେତେ ଅତଙ୍ଗକେଦତେ, ୨ ନାଗାରରେୟାଃ ଆଲା ମାଲା ହରାରେ ଲିଙ୍ଗିୟଃତାନା । ଗାଡାରେୟାଃ ବାରାନ୍ ସାଃରେ ଜୀଦାନ୍ରେୟାଃ ଦାରୁକ ତାଇକେନା, ଏନା ବାରାଷ୍ଟରେୟାଃ ମିପିଆଦ୍ ମାହ ନାରେ ଚାଏ ମିଦ୍ ବାରାଷ୍ଟରେ ଗେଲ୍‌ବାରସାଃ ଜ'ଜଅଃଆ, ଆତଃ ଏନାରେୟାଃ ସାକାମ୍ତେ ହାସୁ ଦୁକୁଃତାନ୍ ହଡକ ବୁଗିୟଃଆ । ୩ ପାରମେଶ୍ଵାରଆଃ ହରାତେ ସାର୍‌ପାଅକାନ୍ ଜେତାନ୍ ବିଷାଏ ଏନ୍ ନାଗାରରେ କା ନେଲଃଆ । ପାରମେଶ୍ଵାର ଆତଃ ମିଣ୍ଡି ହନ୍ଆଃ ରାଜଗାଦି, ଏନ୍ ନାଗାରରେ ତାଇନାଃ ଆତଃ ଏନ୍ତାଃରେ ଆୟାଃ ଦାସିକ ଇନିୟାଃ ସୁନୁସାରକ ରିକାୟା । ୪ ଇନ୍କୁ ଇନିୟାଃ ମେଦମୁହାଡକ ନେଲେୟା ଆତଃ ଇନ୍କୁଆଃ ମଲଙ୍ଗରେ ଇନିୟାଃ ନୁତୁମ୍ ଅଲଃଆ । ୫ ଏନ୍ତାଃରେ କା ନୁବାଗଃଆ ଆତଃ ଦିମି ଚାଏ

ସିଦ୍ଧିରାଃ ମାର୍ଯ୍ୟାଲ୍ ଇନ୍ଦ୍ରୁଆଃ ଲାଗାତିଙ୍ଗ୍ କା ହବାଅଃଆ, ଚିୟାଃତି ପ୍ରାଭୁ ପାର୍ମେଶ୍ଵାର୍ ଇନ୍ଦ୍ରୁଆଃ ମାର୍ଯ୍ୟାଲ୍ ହବାଅଃଆଏ ଆତଃ ଇନ୍ଦ୍ରୁ ଜାନାଅ ଜାନାଅ ରାଜା ଲେକାକ ରାଇଜେୟା ।

ୟୀଶୁଆଃ ହିନିଦ୍ରୁଃ ରୁହାଡ୍

୬ ଦୁର୍ଦ୍ଦ ଆଇଙ୍ଗ୍‌କେ କାଜିକେଦିୟାଁ, “ନେ ସବେନ୍ କାଜିକ ସାରୁତି ଆତଃ ପାତିୟାରରଃ ଲେକାନାଃ ତାନାଃ । ଅକ୍‌ନାଃକ ଜାଲ୍‌ଦିଗି ହବାଅଃଆ, ଏନା ଆୟାଃ ଦାସିକକେ ଉଦୁବ୍‌କ ନାଗେନ୍ତେ ନାବୀକକେ ଆମ୍ବିକ୍ ସେଣାଁ ଏମାକତାନ୍ ପ୍ରାଭୁ ପାର୍ମେଶ୍ଵାର୍ ଆୟାଃ ଦୁର୍ଦ୍ଦକେ କୁଲାକାଇଜା ।”

୭ ଯୀଶୁ କାଜିତାନାଏ ଆୟୁମେପେ, “ଆଇଙ୍ଗ୍ ଜାଲ୍‌ଦିଗିଇଙ୍ଗ୍ ହିଦ୍ରୁଃତାନା, ଅକନ୍‌କ ନେ ପୁଥ୍‌ରେ ଉତ୍କଳଦୁବ୍‌କାନ୍ ଆୟାରକାଜିକେ ମାନାତିୟାଃକ, ଇନ୍ଦ୍ରୁ ସୁକୁତାନଗିୟାକ ।”

୮ ଆଇଙ୍ଗ୍ ଯୋହାନ୍, ନେ ସବେନାଃ ଆଇଙ୍ଗ୍‌ଗି ଆୟୁମାକାଦାଇଙ୍ଗ୍ ଆତଃ ନେଲାକାଦାଇଙ୍ଗ୍ । ଆଇଙ୍ଗ୍ ଆୟୁମ୍‌କେଦ୍‌ତେ ନେଲ୍‌କେଦ୍ ତାୟମ୍‌ତେ, ଅକ ଦୁର୍ଦ୍ଦ ଆଇଙ୍ଗ୍‌ତାଃରେ ଏନାଏ ଉଦୁବ୍‌କେଦା, ଆଇଙ୍ଗ୍ ଇନିୟାଃ କାଟାସୁବାରେ ଅମ୍ବାଃକେଦ୍‌ତେ ସୁନ୍‌ସାର୍ ନାଙ୍ଗ୍ ସେନ୍ ତାଇକେନାଇଙ୍ଗ୍ । ୯ ମେନ୍‌ଦ ଇନିଃ କାଜିକିୟାଁଏ, “ଏନ୍‌ଲେକା ଆଲମ୍ ରିକାଏୟା ଚିଆଃତି ଆଇଙ୍ଗ୍‌ହ୍ ଆମାଃ ଲେକା ମିହୁଡ୍ ତାନିଙ୍ଗ୍ । ଆମାଃ ଅକ ହାଗାକ, ନାବୀତାନକ ଆତଃ ଅକ ସବେନ୍‌କ, ନେ ପୁଥ୍‌ରେୟାଃ କାଜି ଲେକା ମାନାତିଙ୍ଗ୍ ତାନ୍‌କଆଃ ଗାତିଦାସି ତାନିଙ୍ଗ୍ । ପାର୍ମେଶ୍ଵାର୍‌ଆଃ ସୁନ୍‌ସାର୍ ରିକାଇପେ ।” ୧୦ ଇନିଃ ଆଇଙ୍ଗ୍‌କେ ଆତଃଗି କାଜିକେଦିୟାଁ, “ନେ ପୁଥ୍‌ରେୟାଃ ଆୟାରକାଜିକକେ ଆଲମ୍ ଉକୁଇୟା, ଚିୟାଃତି ନେ ସବେନାଃ ହବାଅଃରେୟାଃ ନେତା ନାଡ଼େଃ'ୟାନ୍‌ଗିୟା । ୧୧ ଏନାମେନ୍ତେ ନେ କାଜି ସାରିକେଦ୍‌ତେ, ଅକଏକେ ଚିଲ୍‌କା ସାନାଙ୍ଗ୍ ଏନ୍‌ଲେକାଗି ରିକାଏକା । ଏଡ୍‌କାନ୍ କାମିତାନ୍ ହଡ୍ ଆତଃଗି ଏଡ୍‌କାନ୍ କାମିକାଏ, ସଡ୍‌ରାକାନ୍ ହଡ୍ ସଡ୍‌ରାକାନ୍‌ଗି ତାଇନ୍‌କା, ଧାର୍‌ମାନ୍ ହଡ୍ ଆତଃଗି ଧାରାମ୍ କାମି କାମିକାଏ, ପାବିତାର୍ ହଡ୍ ଆତଃଗି ପାବିତାର୍‌ରଃକା ।”

୧୨ ଯୀଶୁ କାଜିତାନାଏ, “ଆୟୁମେପେ, ଆଇଙ୍ଗ୍ ମିପିଆଦ୍ ହଡ୍‌କକେ ଆକଞ୍ଜା କାମିରେୟାଃ ଗନଙ୍ଗ୍ ଏମାକ ନାଗେନ୍ତେ ନାଲା

ସାବକେଦତେ ଜାଲଦିଗିଇଙ୍ଗ ହିଜୁଃତାନା । ୧୩ ✨ଆଇଙ୍ଗ ସୁରୁଇନିଃ
ଆତଃ ଚାବାଏନିଃ, ମୁନୁ ଆତଃ ରୁଣ୍ଡୁ ତାନିଙ୍ଗ ।”

୧୪ ଅକନକ ଆକଆଃ ଆପନାଃ ଲିଜାଃ ସାଫାକାଦାକ, ଇନକୁ
ସୁକୁତାନଗିୟାକ । ଜୀଦାନ ଦାରୁରେୟାଃ ଜ ଜମେ ନାଗେନ୍ତେ ଆତଃ
ଦୁଆର୍ ହରାତେ ବଲ ନାଙ୍ଗ ଇନକୁଆଃ ଆକ୍ତେୟାର୍ ମେନାଃ ।
୧୫ ମେନଦ ଏଡକାନ ଚାଇଲ ଚାଲାନକ, ଦେଅଁଣାତାନକ, ହଡ
ଗଗଏଃକ, ମୁରୁଡ ସେଞ୍ଜାତାନକ, ହସଡ ହଡକ, ବେଦାତାନକ,
ଆତଃ ନେ ସବେନାଃ ଦୁଲାଡ୍ତାନ ସବେନ ହଡକ ନାଗାରରେୟାଃ
ବାହାରିରେ ତାଇନାକ ।

୧୬ “ଆଇଙ୍ଗ ଯୀଶୁ, କାଲିସିୟାକରେ ଆପେୟାଃ ରୁଗିନାଃ
ନାଗେନ୍ତେ ନେ ସବେନ ବିଷାଏକ ଉଦୁବେ ନାଙ୍ଗ ଆଇୟାଃ ଦୁଡକେ
କୁଲାଇଜାଇଙ୍ଗ । ଆଇଙ୍ଗ ଦାଉଦଆଃ କିଲିରେନ, ଆତଃ ଏନ୍
ଜୁଲଃତାନ ଜନଃଇପିଲ୍ ତାନିଙ୍ଗ ।”

୧୭ ପାବିତାର୍ ଆମ୍ବା ଆତଃ ଏନ୍ ନାଞ୍ଜା ଆଣ୍ଡିକାନ କୁଡି
କାଜିତାନାକିନ୍, “ହିଜୁଃମେ,” ନେ କାଜି ଆୟୁମ୍ତାନ ସବେନକ
କାଜିୟାକ, “ହିଜୁଃମେ,” ଜେତାଏ ତେତାଙ୍ଗତାନିଃ ହିଜୁଃକାଏ ।
ଜୀଦାନରେୟାଃ ଦାଆଃ ନୁଁଏ ନାଗେନ୍ତେ ଅକଏ ସାନାଙ୍ଗତାନିଃ
ହିଜୁଃକେଦତେ ବେଗାର୍ ଗନଙ୍ଗତେ ନୁଁଏକା ।

ରୁଣ୍ଡୁ କ୍ଷାଜି

୧୮ ଆଇଙ୍ଗ ଯୋହାନ୍, ନେ ପୁଥ୍ରେ ଅଲ୍ଲାନ ସବେନ
ଆୟାରକାଜି କାଜିକାନତେୟାଃକେ ଅକନକ ଆୟୁମେୟାକ,
ଇନକୁକେ ଆଇଙ୍ଗ ତେତାଅକ ତାନାଇଙ୍ଗ, ଜେତାଏ ନେ ପୁଥ୍ରେୟାଃ
ଅନଲିରେ ଜେଡନାଃ ମେସାଏ ରେଦ, ପାର୍ମେଶ୍ୱାର୍ ନେ ପୁଥ୍ରେ
ଅଲ୍ଲାନ ଦୁକୁହାସୁକଏ ଏମାକଆ, ମେନ୍ତେ ସାରୁଦ୍ ଏମେତାନାଇଙ୍ଗ
। ୧୯ ଆତଃ ନେ ପୁଥ୍ରେ ଅଲ୍ଲାନ ଆୟାରକାଜିକଏତେ ଜେତାଏ
ଜେଡନାଃ ଆଡ୍ମେରେଦ, ପାର୍ମେଶ୍ୱାର୍ ଇନିଃକେ ନେ ପୁଥ୍ରେ
ଅଲ୍ଲାନ ଜୀଦାନ ଦାରୁରେୟାଃ ଜ'ହେତେ ଆତଃ ପାବିତାର୍
ନାଗାରହେତେ ହିଗାଡିୟା ।

✨ ୨୨:୧୩ ୨୨:୧୩ ଉତ୍କଳ କାଜି ୧:୮; ଉତ୍କଳ କାଜି ୧:୧୭; ୨:୮.

୨୦ ନେ ସବେନ୍ ବିଷାଏରେୟାଃ ଗାଞ୍ଜା ଏମ୍ତାନନ୍ନିଃ କାଜିତାନାଏ,
“ନେଆଁ ସାର୍ତ୍ତିଗି ହବାଅଃଗିୟା । ଆଇଙ୍ଗ୍ ସାର୍ତ୍ତିଗି ଜାଲ୍ଦିଗିଇଙ୍ଗ୍
ହିଜୁଃଆ ।” ଏନାଗି ହବାଅଃକା । ହେ ପ୍ରାଭୁ ଯାଶୁ, ହିଜୁଃମେ ।
୨୧ ପ୍ରାଭୁ ଯାଶୁଆଃ ସାୟାଦ୍ ମିମିଆଦ୍ ସବେନ୍କ ଆଟ୍‌କାରେପେ ।
ଆମେନ୍ ।

ପାରମେଶ୍ଵାରଆଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵାରଆଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

ପାରମେଶ୍ଵାରଆଃ ଜୀନିଦ୍ ବାଚାନ୍
ନାଞ୍ଜା ନିୟମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6